

www.banglainternet.com
represents

JUGBANI

Kazi Nazrul Islam

প্রকাশ করেছেন :
জোহরা খানম
৯, অ্যান্টেনী বাগান লেন,
কলিকাতা-৯

ছেপেছেন :
মনীমোহন সাহা
রূপশ্রী প্রেস (প্রাঃ) লিঃ
৯, অ্যান্টেনী বাগান লেন,
কলিকাতা-৯

প্রচ্ছদ শিল্পী :
খালেদ চৌধুরী
তৃতীয় সংস্করণ ১৩৬৪
১৭৫৭

প্রমীলা নজরুল ইসলাম কর্তৃক সর্বস্ব সংরক্ষিত]

দাম দুই টাকা

সূচীপত্র

নবষুগ	৯
গেছে দেশ ছুঃখ নাই,	
আবার তোরা মানুষ হ'	১৪
ডায়ারের স্মৃতিস্তুপ	১৯
ধর্মঘট	২৪
লোকমান্ন তিলকের মৃত্যুতে	
বেদনাভুর কলিকাতার দৃশ্য	২৭
মুহাজিরিন হত্যার জন্য দায়ী কে ?	৩০
বাঙলা সাহিত্যে মুসলমান	৩৩
ছুঁৎমার্গ	৩৭
উপেক্ষিত শক্তির উদ্বোধন	৪৩
মুখবন্ধ	৪৭
রোজ-কেয়ামত বা প্রলয় দিন	৫১
বাঙালীর ব্যবসাদারী	৫৭
আমাদের শক্তি স্থায়ী হয় না কেন ?	৬২
কালো আদমীকে গুলি মারা	৬৪
শ্যাম রাখি না কুল রাখি	৬৭
লাট-প্রেমিক আলি ইমাম	৭১

ভাব ও কাজ	৭৫
সত্য-শিক্ষা	৭৯
জাতীয় শিক্ষা	৮১
জাতীয় বিশ্ববিদ্যালয়	৮৪
জাগরণী	৮৭

১৯২২ সাল আমাদের জাতীয়-মুক্তি-আন্দোলনের ইতিহাসে এক যুগসন্ধিক্ষণ। একদিকে সাম্রাজ্যবাদী বৈদেশিক সরকারের শোষণ ও অত্যাচারে দেশ তখন জর্জরিত, অণুদিকে দেশবাসী অজ্ঞতা ও কুসংস্কারে আচ্ছন্ন। এই অণায়, অবিচার, ভীকৃততা ও কুসংস্কারের বিরুদ্ধে লেখনী ধারণ করেছিলেন বাংলার বিদ্রোহী-কবি নজরুল ইসলাম। দৈনিক 'নবযুগের' সম্পাদকীয় স্তম্ভে অনেক জ্বালাময়ী ও আবেগপূর্ণ প্রবন্ধ তিনি লেখেন। তারই কতকগুলো নিয়ে এ পুস্তক প্রকাশিত হয়।

তদানীন্তন ইংরাজ সরকার ইহার প্রচণ্ড আঘাতে সম্ভ্রান্ত হয়ে এ পুস্তকের প্রচার ও মুদ্রণ বে-আইনী ঘোষণা করেন। স্বাধীনতা-লাভের পরই ইহা পুনর্মুদ্রিত হয়। বর্তমান মুদ্রণ তারই পরবর্তী সংস্করণ।

নবযুগ

আজ মহাবিশ্বে মহাজাগরণ, আজ মহামাতার মহা আনন্দের দিন, আজ মহামানবতার মহাযুগের মহা উদ্বোধন ! আজ নারায়ণ আর কীরোদসাগরে নিজিত নন । নরের মাঝে আজ তাঁহার অপূর্ব মুক্তি-কাণ্ডাল বেশ । ঐ শোনো, শৃঙ্খলিত নিপীড়িত বন্দীদের শৃঙ্খলের ঝনঝঙ্কার । তাহারা শৃঙ্খল-মুক্ত হইবে, তাহারা কারাগৃহ ভাঙিবে । ঐ শোনো মুক্তি-পাগল যুতুঞ্জয় ঈশানের মুক্তি-বিষাণ ! ঐ শোনো মহামাতা জগদ্ধাত্রীর শুভ শঙ্খ ! ঐ শোনো ইস্রাফিলের শিঙায় নব-সৃষ্টির উল্লাস-ঘন-রোল ! ঐ যে ভীম রণ-কোলাহল, তাহাতেই মুক্তিকামী দৃপ্ত তরুণের শিকল টুটার শব্দ ঝন ঝন করিয়া বাজিতেছে ! সান্নিক ঋষির ঋক্ মন্ত্র আজ বাণী লাভ করিয়াছে অগ্নি পাথারের অগ্নি কল্লোলে । আজ নিখিল উৎপীড়িতের প্রাণ-শিখা জ্বলিয়া উঠিয়াছে ঐ মন্ত্র-শিখার পরশ পাইয়া । আজ তাহারা অন্ধ নয়, তাহাদের চোখের উপরকার কৃষ্ণ পর্দা তীব্র বহি-ঘাতে ছিন্ন হইয়া গিয়াছে । তাহাদের নয়নে আজ মুক্তজ্যোতিঃ বিস্কুরিত । আজ নূতন করিয়া—মহাগগনতলে দাঁড়াইয়া ঐ অনাদি অসীম মুক্ত শূন্যতার পানে তাহারা চাহিয়া আছে, কোথায় সে অনন্তমুক্তি, আর কোথায় তাহারা পড়িয়া আছে বন্ধন-জর্জরিত । নরে আর নারায়ণে আজ আর ভেদ নাই । আজ নারায়ণ মানব । তাঁহার হাতে স্বাধীনতার বাঁশী । সে বাঁশীর সুরে সুরে নিখিল মানবের অণুপরমাণু ক্ষিপ্ত হইয়া সাড়া

ইস্রাফিল—প্রলয়-শিঙা-মুখে অপেক্ষমান স্বর্গীয় দূত ।

দিয়াছে। আজ রক্তপ্রভাবে দাঁড়াইয়া মানব নব প্রভাতী ধরিয়াছে—
 ‘পোহাল পোহাল বিভাবরী, পূর্ব তোরণে শুনি বাঁশরী!’ এ সুর
 নবযুগের। সেই সর্বনাশা বাঁশীর সুর রুশিয়া শুনিয়াছে, আয়ল্যাণ্ড
 শুনিয়াছে, তুর্ক শুনিয়াছে, আরো অনেকে শুনিয়াছে, এবং সেই সংক্ষে
 শুনিয়াছে আমাদের হিন্দুস্থান,—জর্জরিত, নিপীড়িত, শৃঙ্খলিত
 ভারতবর্ষ।

ভারত যেদিন জাগিল, সেদিন নিজের পানে চাহিয়া সে নিজেই
 লজ্জায় মরিয়া গেল। সেদিন সর্বাপেক্ষা অপমানিত পদানত ঘৃণ্য
 সে। কত শত বর্ষের কত সহস্র শৃঙ্খলের কত লক্ষ বাঁধনই না
 মোচড় খাইয়া খাইয়া দাগ কাটিয়া বসিয়া গিয়াছে—তাহার অস্থি
 পঞ্জর ভেদ করিয়া মর্মেরও মর্মস্থলে! কত গোলা, কত বল্লম, কত
 তলোয়ারই না তাহার বুক বাঁজরা করিয়া দিয়াছে! পৃষ্ঠে তাহার
 নিষ্করুণ বেত্রাঘাত ও ছুঁর্বিনীত পদাঘাতের ছুঁর্বিসহ বেদনা-ঘা। গর্দানে
 তাহার নির্দয় খামখেয়ালী পশুশক্তির বিপুল জগদল শিলা। চক্ষে তাহার
 সাতপুরু করিয়া কাপড় বাঁধা। সেই যে গা মোড়া দিয়া উঠিল,
 অমনি তাহার আগেকার কাঁচা ঘায়ে সপাং সপাং করিয়া জল্লাদের
 লোহ-হস্তের কাঁটার চাবুক বসিল। অসহনীয় সে নির্মম অপমানে,
 সে যখন ক্ষিপ্তের মত হাত পা ছুঁড়িয়া গর্দানের বোঝা জোর করিয়া
 ছুঁড়িয়া ফেলিয়া শির উঁচু করিয়া তাকাইল, তখন কসাইএর ভোঁতা
 ছোরা দিয়া কচ্লাইয়া কচ্লাইয়া তাহার প্রাণপ্রিয় সন্তানগুলিকে
 তাহারই বকের উপর রাখিয়া হত্যা করা হইল। হা হা করিয়া যখন
 মা তাহার বাছাদের রক্ষা করিতে গেল, তখন তাহারই দলিত শিশুর
 কলিজা মথিত রক্তের বিপুল কাপটা তাহার মুখে ছিটাইয়া দেওয়া
 হইল! সেই সন্তানের রক্তমাখানো দৃষ্টি দিয়া সে জল ভরা চোখে
 দেখিল, পূর্বতোরণে অগ্নিরাগে লেখা রহিয়াছে ‘নবযুগ’। নয়ন দিয়া
 তাহার হু হু করিয়া অশ্রুর শত পাগল-ঝোরা ছুটিল। সে তাহার
 কোলের কাটা সন্তানের মুণ্ড ফেলিয়া ছুই ব্যগ্র বাহর ব্যাকুল
 আলিঙ্গন মেলিয়া নবযুগকে আহ্বান করিল, ‘তুমি এস!’ নবযুগ

সেই ধ্যানমগ্ন কোলে খাঁপাইয়া পড়িয়া পায়ে মাথা রাখিয়া বলিল,
‘আর আমায় ছাড়িও না মা। এমনই করিয়া যুগে যুগে আমায়
আল্লাহ করিয়ো।’

আবার দূরে সেই সর্বনাশা বাঁশীর সুর বাজিয়া উঠিল।
কশিয়া বলিল, ‘মারো অত্যাচারীকে। ওড়াও স্বাধীনতা-বিরোধীর
শির। ভাঙো দাসত্বের নিগড়। এ বিশ্বে সবাই স্বাধীন। মুক্ত
আকাশের এই মুক্ত মাঠে দাঁড়াইয়া কে কাহার অধীনতা স্বীকার
করিবে? এই ‘খোদার উপর খোদকারী’ শক্তিকে দলিত কর।
এই স্বার্থের শাসনকে শাসন কর।’ ‘আল্লাহ্ আকবর’ বলিয়া তুর্কী
সাদা দিল। তাহার শূন্য নত শিরে আবার অর্ধচন্দ্রলঙ্ঘিত কৃষ্ণশিখ
ফেজের রক্ত-রাগ স্বাধীনতাপহারীর অন্তরে মহাভীতির সঞ্চার
করিল। শিথিল মুষ্টির ভুলুপ্তি রবাব আবার আশ্ফালন করিয়া
উঠিল। আইরিশ উঠিয়া দাঁড়াইয়া বলিল, ‘যুদ্ধ শেষ হয় নাই।
এখনো বিশ্বে দানবশক্তির বজ্রমুষ্টি আমাদের টুঁটি টিপিয়া ধরিয়া
রহিয়াছে। এ অসুর শক্তি ধ্বংস না হইলে দেবতা বাঁচিবে না।
যজ্ঞ জলুক! এ হোম-শিখায় যদি কেহ যোগ না দেয়, আমরা
আমাদের প্রাণ আহুতি দিব।’ এমন সময় ভারত জাগিল। এত
দিনে ভারতের বোধিসত্ত্ব বুদ্ধ আঁখি মেলিয়া চাহিলেন। ভারত
ব্যাপিয়া হর্ষ-বাণীর মহাকল্লোল কলকল নিনাদে ধ্বনিত হইল
‘আবিরাবির্মএধি’! আবির্ভাব হও! আবির্ভাব হও! সারা বিশ্ব
কান পাতিয়া সে মুক্তি-কল্লোল শুনিল। যুগাবতারের কাঙাল বেশে
করুণ নয়ন পাতে সারা বিশ্বের আর্ত-নিখিলের বন্ধন-কাতরতা আর
মুক্তি-লিপ্সা মূর্তি ধরিয়া ফুটিয়া উঠিল। একই ছুখে আজ ছুখী
জনগণ দেশ জাতি সমাজের বহির্বন্ধন ভুলিয়া পরস্পর পরস্পরকে
বুকে ধরিয়া আলিঙ্গন করিল। আজ তাহারা এক, তাহারা একই
ব্যথায় ব্যথিত, নিপীড়িত সত্য মানবাত্মা। আজ কেহ কাহাকেও

আল্লাহ্ আকবর—ঈশ্বর মহান। ফেজ—তুর্কী-সৈনিকের রক্ত-শিরঙ্গাণ। আবিরাবির্মএধি—
আবির্ভাব হও!

বাহির হইতে দেখে নাই। অন্তর দিয়া পরস্পরের বন্ধন-বেদনাতুর অন্তর দেখিয়াছে। তাহাদের উত্তীর্ণিত জাগ্রত রবে—ঐ দেখ—বুঝি বন্ধন-প্রয়াসীর মুখ কালো হইয়া গেল, হস্ত-মুষ্টি শিথিল হইয়া গেল।

ঐ শোন নবযুগের অগ্নিশিখ নবীন সম্রাসীর মন্ত্র-বাণী। ঐ বাণীই রণক্লান্ত সৈনিককে নব প্রেরণায় উদ্বুদ্ধ করিয়া তুলিতেছে। ঐ শোনো তরুণ কণ্ঠের বীরবাণী,—আমাদের মধ্যে ধর্মবিদ্বেষ নাই, জাতিবিদ্বেষ নাই, বর্ণবিদ্বেষ নাই, আভিজাত্য-অভিমান নাই। আজ আমরা আমাদের এই মুক্তি-কামী নিহত ভাইদের রক্তপূত সবুজ প্রাস্তরে দাঁড়াইয়া তাহাদের পবিত্র স্মৃতির তর্পণ করিতেছি। পরস্পর পরস্পরকে ভাই বলিয়া, একই অবিচ্ছিন্ন মহা আত্মার অংশ বলিয়া অন্তরের দিক হইতে চিনিয়াছি। এই রক্ত-সমাধি-পাশে দাঁড়াইয়া আমরা যেন সব স্বার্থ তুলিয়া যাই। একই বিশ্বে একই বিশ্বমাতার বড় ছোট ভাই বলিয়া যেন করুণা-ধারায় আমাদের বুক সিক্ত হইয়া ওঠে। আজ এ মহামিলনে যেন এতটুকু দীনতা না থাকে। এই মহামানবের সাগরতীরে শ্মশান-বেলায় আমাদের এই যুগ-বাহিত মহামিলন পবিত্র হউক, শাস্ত হউক !

দাঁড়াও জন্মভূমি জননী আমার! একবার দাঁড়াও! যেদিন তুমি সমস্ত বাধা বন্ধন মুক্ত, মহা-মহিমময়ী বেশে স্বাধীন বিশ্বের পানে অসঙ্কোচ-দৃষ্টি তুলিয়া তাকাইবে, সেদিন যেন নিজের এই ক্ষতবিক্ষত অঙ্গ কাঁজরাপারা বন্ধ, মৃত-শোণিতলিপ্ত ক্রোড় দেখিয়া কাঁদিয়োনা। তোমার পুত্র-শোকাতুর বকের নিবিড় বেদনা সে দিন যেন উছলিয়া উঠেনা মা! সে দিন তুমি তোমার মুক্ত শিশুদের হাত ধরিয়া বিশ্বমঞ্চে বীরপ্রসূ জননীর মত উঁচু হইয়া দাঁড়াইয়ো। ঐ দূর সাগর পার হইতে তোমার মুখে সে দিন যেন নব প্রভাতের তরুণ হাসি দেখি। যে বীর পুত্র তাহার তরুণ অসমাপ্ত জীবনের সমস্ত আশা আকাঙ্ক্ষা তোমার মুক্তির জগ্ন বলিদান দিয়া বিদায় লইয়াছে, সে দিন তাহাকেই হয়ত তোমার বেশী করিয়া মনে পড়িবে। কিন্তু সে দিন আর চোখের

জল ফেলিয়োনা মা । বুক-জোড়া হাহাকার তোমার সে দিন কোলের
সন্তানদেবে দেখিয়া ভুলিতে চেষ্টা করিয়ো ।

এস ভাই হিন্দু ! এস মুসলমান ! এস বৌদ্ধ ! এস খ্রিস্টিয়ান !
আজ আমরা সব গণ্ডি কাটাইয়া সব সঙ্কীর্ণতা, সব মিথ্যা, সব স্বার্থ
চিরতরে পরিহার করিয়া প্রাণ ভরিয়া ভাইকে ভাই বলিয়া ডাকি ।
আজ আমরা আর কলহ করিব না । চাহিয়া দেখ, পাশে তোমাদের
মহাশয়নে শায়িত ঐ বীর ভ্রাতৃগণের শব । ঐ গোরস্থান—ঐ শ্মশান
ভূমিতে—শোন শোন তাহাদের তরুণ আত্মার অতৃপ্ত ক্রন্দন ! এ
পবিত্র স্থানে আজ স্বার্থের দ্বন্দ্ব মিটাইয়া দাও ভাই ! ঐ শহীদ
ভাইদের মুখ মনে কর, আর গভীর বেদনায় মুক শুদ্ধ হইয়া যাও !
মনে কর, তোমাকে মুক্তি দিতেই সে এমন করিয়া অসময়ে বিদায়
লইয়াছে ! উহার সে ত্যাগের অপমান করিয়োনা, ভুলিয়োনা !
আজ আর কলহ নয়, আজ আমাদের ভাই-এ ভাই-এ, বোনে বোনে
মায়ের কাছে অহুযোগের আর অভিযোগের এই মধুর কলহ হইবে
যে, কে মায়ের কোলে চড়িবে আর কে মায়ের কাঁধে উঠিবে ।

‘গেছে দেশ দুঃখ নাই,
আবার তোরা মানুষ হ’

স্বাধীনতা হারাইয়া আমরা যখন আত্মশক্তিতে অবিশ্বাসী হইয়া পড়িলাম এবং আকাশ-মুখো হইয়া কোন অজানা পাষণ্দেবতাকে লক্ষ্য করিয়া কেবলই কান্না জুড়িয়া দিলাম, তখন কবির কণ্ঠে আশার বাণী দৈব-বাণীর মতই দিকে দিকে বিঘোষিত হইল, ‘গেছে দেশ দুঃখ নাই, আবার তোরা মানুষ হ’! বাস্তবিক, আজ আমরা অধীন হইয়াছি বলিয়া চিরকালই যে অধীন হইয়া থাকিব, এরূপ কোন কথা নাই। কাহাকেও কেহ কখনো চিরদিন অধীন করিয়া রাখিতে পারে নাই, কারণ ইহা প্রকৃতির নিয়ম-বিরুদ্ধ। প্রকৃতির বিরুদ্ধে যুদ্ধ ঘোষণা করিয়া কেহ কখনো জয়ী হইতে পারেনা। আজ যাহারা স্বাধীন হইয়া নিজের অধীনতার কথা ভুলিয়া অন্যকেও আবার অধীনতার জাঁতায় পিষ্ট করিতেছে তাহারাও চিরকাল স্বাধীন ছিল না। শক্তি লাভ করিয়া যাহারা শক্তির এমন অপব্যবহার করিতেছে, কে জানে প্রকৃতি তাহাদের এই অপরাধের পরিণাম কত নির্মম হইয়া লিখিয়া রাখিয়াছে! ‘এয়সা দিন নেহি রহেগা,’ চিরদিন কারুর সমান যায় না। আজ শূন্যে কপর্দকহীন ফকির, কাল তাহার পক্ষে বাদশাহ্ হওয়া কিছুই বিচিত্র নয়। অত্যাচারীকে অত্যাচারের প্রতিফল ভোগ করিতেই হইবে। আজ আমি যাহার উপর প্রভুত্ব করিয়া তাহার প্রকৃতি-দত্ত স্বাধীনতা, মনুষ্যত্ব ও সম্মানকে হনন করিতেছি, কাল সেই আবার আমারই মাথায় পদাঘাত করিবে না তাহা কে বলিতে পারে? শক্তি সম্পদের ন্যায় ব্যবহারেই বৃদ্ধি, অন্যায় অপচয়ে তাহার লয়।

অন্যকে কষ্ট দিয়া তাহার 'আহা-দিল' নিতে নাই, বেদনাতুরের আন্তরিক প্রার্থনায় আল্লার আরাধা টলিয়া যায়। শক্তির অপব্যবহারের জন্য রোম-সাম্রাজ্য গেল, জার্মাণীর মত মহাশক্তিরও পরাজয় হইল। কত উত্থান, কত পতন এই ভারত দেখিয়াছে, দেখিতেছে এবং দেখিবে। এই অত্যাচারের বিরুদ্ধে বিবেক সর্বদাই মানবের পশু-শক্তিকে সতর্ক করিতেছে। বিবেকের ক্ষমতা অসীম। যাহারা পশু-শক্তির ব্যবহার করিয়া বাহিরে এত দুর্বীর দুর্জয়, অন্তরে তাহারা বিবেকের দংশনে তেমনি ক্ষত-বিক্ষত, অতি দীন। তাহারা তাহাদের অন্তরের নীচতায় নিজেই মরিয়া যাইতেছে, শুধু লোক-লজ্জায় তাহাকে দাস্তিকতার মুখোশ পরাইয়া রাখিয়াছে। সিংহের চামড়ার মধ্য ভেঁতে লুকানো গর্দভ মূর্তি বাহির হইয়া পড়িবেই। নীল শূণ্যের দুর্ভাগি বেশী দিন টিকিবে না। তাই বলিতেছিলাম, বাহিরের স্বাধীনতা গিয়াছে বলিয়া অন্তরের স্বাধীনতাকেও আমরা যেন বিসর্জন না দিই। আজ যখন সমস্ত বিশ্ব মুক্তির জন্য, শৃঙ্খল ছিড়িবার জন্য উন্মাদের মত সমস্ত শক্তি প্রয়োগ করিতেছে, স্বাধীনতা যজ্ঞের হোমানলে আবালবৃদ্ধ বনিতা দলে দলে আসিয়া নিজের স্রংপিও উপড়াইয়া দিতেছে, তাহাদের মুখে শুধু এক বুলি 'মুক্তি মুক্তি—মুক্তি'। হস্তে তাহাদের মুক্তির নিশান—মুখে তাহাদের মুক্তির বিষণ্ণ, শিয়রে তাহাদের মুক্তির তৃপ্তি-ভরা মহা-গৌরবময় যুত্যা।—তখনও, মুক্তির সেই যুগান্তরের নবযুগেও, আমরা কিনা পলে পলে দাসত্বের, মনুষ্যত্ব-হীন আত্ম-সম্মানশূন্য ঘৃণ্য কাপুরুষের মত অধোদিকেই গড়াইয়া চলিতেছি। এতদূর নীচ হইয়া গিয়াছি আমরা যে, কেহ এই কথা বলিলে উণ্টো আবার কোমর বাঁধিয়া তাহার সঙ্গে তর্ক জুড়িয়া দিই। আমাদের এই তর্কের সব চেয়ে সাধারণ সূত্র হইতেছে, দাসত্ব—গোলামী ছাড়িয়া দিলে খাইব কি করিয়া? কি নীচ প্রশ্ন! যেন আমাদের শুধু কুকুর বিড়ালের মত

আহা-দিল—যন্ত্রণা পেয়ে ব্যথিত নিঃশ্বাস আর নীরব অভিযোগ। আরাধা—ভগবানের সিংহাসন।

উদয় পূর্তির জন্মই জন্ম ! এত নীচ অন্তঃকরণ লইয়া যাহারা বেহায় মত বেহুদা তর্ক করিতে আসে, তাহাদের উপর খোদার বজ্র কেন ভাঙিয়া পড়ে না, তাহা বলিতে পারি না ! আজ সারা বিশ্ব যখন ও-রকম মরার মত বাঁচিয়া থাকার চেয়ে মরিয়া মুক্তিলাভের জন্ম প্রাণ লইয়া ছিনিমিনি খেলিতেছে, তখনও আমাদের এই রকম হৃদয়-হীনতার, গোলামী মনের পরিচয় দিতে এতটুকু লজ্জা হয় না ! বড়ই ছুঃখে তাই বলিতে হয়, ‘এ অভাগা দেশের বৃকে বজ্র হানো হানো প্রভু, যদিও না ভাঙছে মোহ-ভার।’ আমাদের এ মোহ ভার ভাঙিবে কে ? এ শৃঙ্খল মোচন করিবে কে ? আছে, উত্তর আছে, এবং তাহা, ‘আমরাই!’ নির্বোধ মেঘ-যুগের মত এক স্থানে জড় হইয়া শুধু মাথাটা লুকাইয়া থাকিলে নেকরে বাঘের হিংস্র আক্রমণ হইতে রক্ষা পাইব না, তাহা হইলে আমাদের ঐ নেকড়ে বাঘের মত করিয়া কান ধরিয়া টানিয়া লইয়া গিয়া হত্যা করিবে।

দেশের পক্ষ হইতে আহ্বান আসিতেছে, কিন্তু কাজে আমরা কেহই সাড়া দিতে পারিতেছি না। অনেকে আবার বলেন যে, অন্তে কে কি করিতেছে আগে দেখাও, তারপর আমাদের কাছে বলিও। এই প্রশ্ন ফাঁকিবাজের প্রশ্ন ! দেশমাতা সকলকে আহ্বান করিয়াছেন, যাহার বিবেক আছে, কর্তব্য-জ্ঞান আছে, মনুষ্যত্ব আছে সেই বুক বাড়াইয়া আগাইয়া যাইবে। তোমার কি নিজের ব্যক্তিত্ব নাই যে, কে কি করিল আগে দেখিয়া তবে তুমি তার পিছু পিছু পোঁ ধরিবে ? নেতা কে ? বিবেকই তো তোমার নেতা, তোমার কর্তব্য-জ্ঞানই তো তোমার নেতা ! দেশ-নায়ক যাহারা, তাঁহারা তো তোমার বিবেকেরই প্রতিধ্বনি করেন। কর্তব্য-জ্ঞানের কাছে ত্যাগের কাছে সম্ভব অসম্ভব কিছুই নাই। সুতরাং ‘ইহা সম্ভব, উহা অসম্ভব’ বলিয়া, ছেলে-মানুষি করাও আর এক বোকামি। যাহা সম্ভব তাহা করিবার জন্ম তোমার ডাক পড়িত কি জন্ম ? অসম্ভব বলিয়াই তো দেশ তোমার বলিদান চাহিয়াছে ! স্বার্থের গণ্ডি না পারাইয়া ভিক্ষা দেওয়া

বেহুদা—বাজে।

যায়, ত্যাগ বা বলিদান দেওয়া যায় না। তোমার যতটুকু শক্তি আছে প্রয়োগ কর, দেশের কাছে খোদার কাছে অসঙ্কোচে দাঁড়াইবার পাথেয় সঞ্চয় কর, তোমার বিবেকের কাছে তুমি অগাধ শান্তি পাইবে! ইহাই তোমার পুরস্কার। অন্তে জাহান্নমে যাইবে বলিয়া ক'তুমিও তার পিছু পিছু সেখানে যাইবে?

আজ আমাদের শুধু ক্রান্তি, শুধু শ্রান্তি কেন? 'এমন করে কদিন খাবি, না গোলেমাতে যদিন যায়' করে আর কতদিন চলিবে? আমরা আমাদের দেশের জন্ত, মুক্তির জন্ত কি দুঃখ দৈন্যকে বরণ করিয়া লইতে পারিব না? ত্যাগ, বিসর্জন, উৎসর্গ বলিদান ছাড়া কি কখনও কোনো দেশ উদ্ধার হইয়াছে, না হইতে পারে? স্বার্থত্যাগ করিতে হইলে দুঃখ কষ্ট সহ্য করিতেই হইবে, ত্যাগ কখনো আরাম-কেদারায় শুইয়া হয় না। কিন্তু এই দুঃখ কষ্ট, ইহা তা বাহিরের; একটা সত্য মহান পবিত্র কার্য করিতে গেলে যে আত্মতৃপ্তি অসম্ভব করা যায়, অন্তরে যে ভাস্বর স্নিগ্ধ দীপ্তির উদয় হইয়া সকল দেহ-মন আলোয় আলোকময় করিয়া দেয়, সারা দেশের ভাইদের বোনদের যে প্রশংসা-ভরা স্নেহ-কল্যাণময় অশ্রু-কাতর দৃষ্টি ও সারা মুক্ত বিশ্বের সাবাসি পাওয়া যায়, তাহা এই বাহিরের দুঃখ কষ্টকে কি ঢাকিয়া দিতে পারে না? কার মূল্য বেশী? বাহিরের এই নগণ্য দুঃখ কষ্টের, না অন্তরের স্বর্গীয় তৃপ্তির? তুমি কি চাও?—কুকুর বিড়ালের মত ঘৃণ্য-মরা মরিতে, না মানুষের মত মরিয়া অমর হইতে? তুমি কি চাও?—শৃঙ্খল, না স্বাধীনতা? তুমি কি চাও?—তোমাকে লোকে মানুষের মত ভক্তিপ্রদা করুক, না পা-চাটা কুকুরের মত মুখে লাথি মারুক? তুমি কি চাও?—ঔষধ-মস্তকে উন্নত-শীর্ষ হইয়া বুক ফুলাইয়া দাঁড়াইয়া পুরুষের মত গৌরব দৃষ্টিতে অসঙ্কোচে তাকাইতে, না নাস্তা শিরে প্রভুর ক্রীপাদপদ্য মস্তকে ধারণ করিয়া কুজ পৃষ্ঠে গোলামের মত অবনত হইয়া হজুরীর মতলবে শরমে চক্ষু নত করিয়া থাকিতে? যদি এই শেষের দিকটাই তোমার লক্ষ্য হয়, তবে তুমি জাহান্নামে যাও!

তোমার সারমেয় গোষ্ঠি লইয়া খাও দাও আর পা চাট ! আর, যাহারা ত্যাগকে বরণ করিয়া লইতে পারিবে, যাহারা ঘরে মুখ মলিন দেখিয়া গলিয়া যাইবে না, যাহাদের জান দিবার মত গোদী আছে, আঘাত সহিবার মত বৃকের পাটা আছে, তাহারা বাহির হইয়া আইস ! দেশমাতার দক্ষিণ হস্ত, আর কল্যাণ-মন্ত্রপূত অশ্রু-পুষ্প তোমাদেরই মাথায় ঝরিয়া পড়িবার জন্য উন্মুখ হইয়া রহিয়াছে। আমরা চাই লাঞ্চার চন্দনে আমাদের উলঙ্গ-অঙ্গ অলুপ্ত করিতে ! কল্যাণের মৃত্যুঞ্জয় কবচ আমাদের বাহুতে উষ্ণীষে বাঁধা, ভয় কি ? মনে পড়ে, সে-দিন দেশ-মাতার আহ্বান নিয়া মাতা সরলা দেবী বাংলার কণ্ঠ্যরূপে পাঞ্জাব হইতে সাহায্য চাহিতে আসিয়াছিলেন। কে কে সাড়া দিলে এ জাগ্রত মহা-আহ্বানে ? এমন ডাকেও যদি সাড়া না দাও, তবে জানিব তোমরা মরিয়াছ। বৃথাই এ আহ্বান, এ ক্রন্দন তোমার মা ! যদি পার, সঞ্জীবনী সুধা লইয়া আইস তোমার এ মরা সন্তান বাঁচাইতে। যদি তাহা না পার, তবে ইহাদিগকে ধূতুরার বীজ, খাওয়াইয়া পাগলা করিয়া দাও। ইহাতে তাহারা 'মানুষের মত' জাগিবে না, কিন্তু তবু জাগিবে ! জানি কুপুত্র অনেকে হয়, কুমাতা কখনো নয় ; কিন্তু আর এমন করিয়া স্নেহের প্রশ্রয় দিলে চলিবেনা মা, এখন তোমাকেই আঘাত দিয়া আমাদের জাগাইতে হইবে। আমরা পরের আঘাত চোখ বুজিয়া সহ্য করি, কিন্তু স্বজনের আঘাত সহিতে পারি না। তাই আর শুধু ডাকাডাকিতে কোন ফল হইবে না। তোমার রুদ্ধ মূর্তি দিকে দিকে প্রকটিত হউক ! যদিই এই রুদ্ধ ভীষণতার মধ্যে রণ-চণ্ডীর মহামারীর মধ্যে আমাদের মনুষ্যত্ব জাগে, যদি আঘাত খাইয়া খাইয়া অপমানিত অবমানিত হইয়া আবার আমরা জাগি। তাই আবার বলিতেছি, তোমরাও সাথে সাথে বল,

‘গেছে দেশ দুঃখ নাই, আবার তোরা মানুষ হ’ !

ডায়ারের স্মৃতিস্তম্ভ

আমাদের হিন্দুস্থান যেমন কীর্তির শ্মশান, বীরত্বের গোরস্থান, তেমনি আবার তাহার বুক অত্যাচারী আততায়ীর আঘাতে ছিন্নভিন্ন। সেই সব আঘাতের কীর্তিস্তম্ভ বুক ধরিয়া স্তম্ভিতা এই ভারতবর্ষ ছনিয়ার মুক্তাবুকে দাঁড়াইয়া আজ শুধু বুক চাপড়াইতেছে। অত্যাচারীরা যুগে যুগে যত কিছু কুকীর্তি রাখিয়া গিয়াছে, এইখানে তাহাদের সব কিছুই স্মৃতিস্তম্ভ আমাদের চোখে শূলের মত বাজিতেছে। কিন্তু এই যে সেদিন জালিয়ানওয়ালাবাগের হত্যাকাণ্ড সংঘটিত হইয়া গেল, যেখানে আমাদের ভাইরা নিজের বুকের রক্ত দিয়া আমাদের একমুখ করিয়া গেল, সেই জালিয়ান-ওয়ালাবাগে নিহত সব হতভাগ্যেরই স্মৃতিস্তম্ভ বেদনা-শেলের মত আমাদের সামনে জাগিয়া থাক, ইহা খুব ভাল কথা,—কিন্তু সেই সঙ্গে তাহাদেরই ছশমন্ ডায়ারকে বাদ দিলে চলিবে না। ইহার যে স্মৃতিস্তম্ভ খাড়া করা হইবে, তাহার চূড়া হইবে এত উচ্চ যে ভারতের যে কোন প্রাস্তর হইতে তাহা যেন স্পষ্ট মূর্ত হইয়া চোখের সামনে জাগিয়া উঠে। এ ডায়ারকে ভুলিব না, আমাদের মুমূর্ষু জাতিকে চিরসজাগ রাখিতে যুগে যুগে এমনই জ্বলদ কসাইএর আবির্ভাব মস্ত বড় মঙ্গলের কথা। ডায়ারের স্মৃতিস্তম্ভ যেন আমাদের সামনে ডায়ারের স্মৃতি ভুলিতে না দেয়। ইহার জন্ত আমাদেরই সর্বাগ্রে উঠিয়া লাগিতে হইবে। নতুবা আমরা অকৃতজ্ঞতার বদনামের ভাগী হইব। এই যে আজ আমাদের নূতন করিয়া জাগরণ, এই যে আঘাত দিয়া সুপ্ত চেতনা, আত্মসম্মানকে জাগাইয়া তোলা, ইহার মূল কে?—ডায়ার।

মানুষের, জাতির, দেশের যখন চরম অবনতি হয়, তখনই এইরূপ নরপিশাচ জালিমের আবির্ভাব অত্যাবশ্যক হইয়া পড়ে। মানুষ যখন নিজের প্রকৃতিদত্ত অধিকারের কথা ভুলিয়া যায়, শত বন্ধনের মধ্যে তাহার জীবনের গতি-চাক্ষুণ্য হারাইয়া ফেলে, তখন তাহার আর মান অপমান জ্ঞান থাকে না, প্রভুর দেওয়া দয়ার দানকে গোলামের মত সে মহাদান বলিয়া মাথায় তুলিয়া বরণ করিয়া লয় এবং তাহার ভৃত্য-জীবন সার্থক হইল মনে করে। তাহার মন এত ছোট হইয়া যায়, তাহার আশা এত হয় ও হীন হইয়া পড়ে যে, সে ভাবিতেও পারে না—যে দান মাথায় করিয়া আজ সে গৌরব অনুভব করিতেছে, যে দানকে সে শিরোপা করিয়া (অভিরুচি অনুসারে কখনও পেছনে লেজুড়ের মত জুড়িয়া) মুক্ত স্বাধীন বিশ্বের কাছে বক্ষক্ষীত করিয়া বেড়াইতেছে তাহার দাম এক কথায় ‘পাঁচ জুতি’!

মনুষ্যত্বের এ অবমাননা ও লাঞ্ছনা শুধু ভিক্ষুকের জাতিই হাসিমুখে নিজেদের গৌরব বলিয়া মানিয়া লইতে পারে। অন্তরে যাহারা ঘৃণ্য নীচ আর ছোট হইয়া গিয়াছে, আত্মসম্মান-জ্ঞান যাহাদের এত অসাড় হিম হইয়া গিয়াছে, তাহাদিগকে জাগাইয়া তুলিতে চাই—এই ডায়ারের দেওয়া অপমানের মত বজ্র-বেদন।

এই ডায়ারের মত দুর্দান্ত কশাই সেনানী যদি সেদিন আমাদের এমন কুকুরের মত করিয়া না মারিত, তাহা হইলে কি আজিকার মত আমাদের এই হিম-নিরেট প্রাণ অভিমান-ক্লোভে গুমরিয়া উঠিতে পারিত—না, আহত আত্মসম্মান আমাদের এমন দলিত সর্পের মত গর্জিয়া উঠিতে পারিত? কখনই না। আজ আমাদের সত্যিকার শোচনীয় অবস্থা সাদা চোখে দেখিতে পারিয়াছি এই ডায়ারেরই জন্ত। ডায়ারের প্রচণ্ড পদাঘাত, পৈশাচিক খুনখারাবী আমাদের স্পষ্ট করিয়া আমাদের ঘৃণ্য হীন অবস্থা সম্বন্ধে সচেতন করিয়া দিয়াছে। আরো জানাইয়া দিয়াছে যে,—যে নিষ্ঠীবন মাথায়

শিরোপা—পুরস্কার।

করিয়া, প্রভুর-দেওয়া যে চাপ্রাস পরিয়া, যে ছিন্ন জুতার মালা
 গলায় হুলাইয়া আমরা আহ্মকের মত ছুনিয়ার স্বাধীন জাতিদের
 সামনে দাঁড়াইয়া--গোলামীর খুটা গোরব দেখাইতে গিয়া শুধু
 হাত্তান্দ হইয়াছিলাম, তাহাতে কেহ আমাদের প্রশংসা ত করেই
 মাই, উন্টো আরো, 'হট্ট যাও গোলামকা জাত্' বলিয়া অবলীলাক্রমে
 লাঠির ঠুঁতো, বুটের টক্কর লাগাইয়াছে। তাহারা স্বাধীন,—আজাদ।
 তাহারা আমাদের এ হীন নীচতা, এত হয়ে ভীকুতা, এমন ঘৃণ্য
 কাপুরুষতাকে পা দিয়া মাড়াইয়া যাইবে না ত কি মাথায় তুলিয়া
 লইবে? অক্ষ আমরা, আমাদের অবস্থা দেখিতে পাইতেছিলাম
 না,—সে অক্ষ যুচাইয়া দিয়াছে এই ডায়ার! আমাদের
 এই নিলক্ষ কাপুরুষতাকে ভীম পদাঘাতে দূর করিয়া দিয়াছে এই
 জেমারেল ডায়ার। গোলামের সঙ্গে প্রভুর সম্বন্ধ কি রকম তাহাই
 সে নির্মম কঠোরভাবে জানাইয়া দিয়াছে। অন্য প্রতারকদের মত
 গলায় পায়ে শৃঙ্খল পরাইয়া আদর দেখাইতে যায় নাই সে,—সে
 নারীর সামনে উলঙ্গ করিয়া মেথরের হাতে বেত্র দিয়া তোমার পিঠের
 চামড়া তুলিয়াছে! গর্দানে পাথর চাপা দিয়া বুকের উপর হাঁটাইয়াছে,
 তাহাদের পায়ে তোমাদিগকে সিজ্জা করাইয়া ছাড়িয়াছে।—আর,
 তবে তোমরা জাগিতে পারিয়াছ! তোমাদিগকে জাগাইতে চাই এম্নি
 প্রচণ্ড নির্মম কশাই-শক্তি! এত নির্মমভাবে, এমন পিশাচের মত
 বেত্রাঘাত না করিলে তোমরা জাগিতে না, তোমাদের মা-বোনদের
 সামনে উলঙ্গ করিয়া হাত পা বাঁধিয়া পশুর মত না পিটাইলে
 তোমাদের আত্মসম্মান-জ্ঞান ফিরিয়া আসিত না! ডায়ারের বুট
 এমন করিয়া তোমাদের কলিজা মথিত না করিয়া গেলে তোমাদের
 চেতনা হইত না! তোমাদের মুখের সামনে তোমাদের আত্মীয়-
 আত্মীয়ের মুখে এম্নি করিয়া থুথু না দিলে তোমাদের মানব-শক্তি
 ক্ষেপিয়া উঠিত না!—তাই আজ আমরা ডায়ারকে প্রাণ ভরিয়া
 আশীর্বাদ করিতেছি, 'খোদা তোমার মঙ্গল করুন।' তুমি যে

সিজ্জা—সাপ্তাহিক প্রগতি।

মঙ্গল দিয়া গিয়াছে আমাদের সারা ভারতবাসীকে, তাহা আমরা কখনও ভুলিব না, আমরা নিমকহারামের জাতি নই। নিশ্চয়ই ভুলিব তোমার স্মৃতিস্তম্ভ, মহৎ প্রতিহিংসারূপে নয়, প্রতিদান স্বরূপে। আজ আমাদের এ মিলনের দিনে তোমাকে ভুলিতে ত পারিব না ভাই! এই মহামানবের সাগরতীরে ভারতবাসী জাগিয়াছে—বড় সুন্দর মোহন মূর্তিতে জাগিয়াছে। সেই তোমার আনন্দের হত্যার দিনে, সেই জালিয়ানওয়ালাবাগের হতভাগাদের রক্তের উপর দাঁড়াইয়া হিন্দু-মুসলমান ছই ভাই গলাগলি করিয়া কাঁদিয়াছে। ছুংখের দিনেই প্রাণের মিলন সত্যিকার মিলন হয়। আজ আমাদের এ মিলন যে স্বার্থের উপর ভিত্তি করিয়া নয় ভাই, আজ আমরা পরস্পর পরস্পরকে সমান ব্যথায় ব্যথী, একই মায়ের পেটের ভাই বলিয়া আলিঙ্গন করিয়াছি। কাঁদিয়াছি—গলা জড়াজড়ি করিয়া কাঁদিয়াছি!—আমাদের ভাইদের খুন; মাখানো সমাধির উপর দাঁড়াইয়া আমরা এক ভাই অন্য ভাইকে চিনিয়াছি, আর বড় প্রাণ ভরিয়াই গাহিয়াছি—

‘আমরা মিলেছি আজ মায়ের ডাকে,

এমন ঘরের হয়ে পরের মতন ভাই ছেড়ে ভাই কদিন থাকে !’

আজ এস ডায়ার, আমাদের এই মহামিলনের পবিত্র দৃশ্য দেখিতে তোমাকেও আমন্ত্রণ করিতেছি! আজ ঈর্ষা ঘেঁষ ভুলিয়া গিয়াছি ভাই, তোমারও জন্ম আমাদের বুকের আসন পাতা রহিল।

এস ভাই হিন্দু! এস ভাই মুসলমান! তোমার আমার উপর অনেক ছুংখ ক্লেশ, অনেক ব্যথা বেদনার ঝড় বহিয়া গিয়াছে; আমাদের এ বাঞ্ছিত মিলন বড় ছুংখের, বড় কষ্টের ভাই! খোদা যখন আমাদের জাগাইয়াছেন, তখন আর যেন আমরা না ঘুমাই। যদি এতটুকু ঘুমের খোঁমার আসে, তবে যেন এই ডায়ারকে স্মরণ করিয়া আবার আমরা হুঙ্কার দিয়া খাড়া হইতে পারি, ডায়ার-স্মৃতি-স্তম্ভের ঐ আকাশের মর্ম-ভেদী চূড়া দেখিয়া যেন মনুষ্যত্বের শক্তির

খোমার—তল্লা।

লাড়া আমাদের মাঝে গর্জন করিয়া উঠে । আমাদের এ মিলন যদি
মিথ্যা হয়, তবে যেন আমাদেরকে সচেতন করিতে যুগে যুগে এই
জাঘারের বজ্র বেদনার আবির্ভাব হয় ।—আমাদের প্রীতি-বন্ধন অক্ষয়
হোক ! আমাদের এ মহামিলন চিরন্তন হোক ! আমরা আজ সব
সঙ্কীর্ণতা, অস্বাভাবিকতার সকল দুঃখ ক্লেশ ভুলিয়া ভাইকে ভাইএর কোল
বাড়াইয়া দিই । এস ভাই, আর একবার হাত ধরাধরি করিয়া এই
খোলা আকাশে মুক্ত মাঠে দাঁড়াই ।

www.banglainternet.com

ধর্মঘট

দেশে একটা প্রবাদ আছে, ‘যে এলো চষে সে রইলো বসে, নাড়া-কাটাকে ভাত দাও এক থালা কসে।’ হলের দংশন জ্বালা যথেষ্ট থাকলেও কথাটা অক্ষরে অক্ষরে সত্য। স্বয়ং ‘নাড়া-কাটা’ প্রভুরাও এ কথাটা ভাল করিয়াই বুঝেন, কিন্তু বুঝিয়াও যে না বুঝিবার ভাগ করেন বা প্রতিকারের জন্ত নিজেদের দারাজ দস্ত্ সামলান না, ইহা দেখিয়া বাস্তবিকই আমাদের মনুষ্যত্বে বিবেকে আঘাত লাগে এবং তাহারই বিরুদ্ধে বিদ্রোহ পতাকা ভুলিলেই হইল ‘ধর্মঘট’। চাষী সমস্ত বৎসর ধরিয়া হাড়-ভাঙা মেহনৎ করিয়া মাথার ঘাম পায়ে ফেলিয়াও দু-বেলা পেট ভরিয়া মাড়ভাত খাইতে পায় না, হাঁটুর উপর পর্যন্ত একটা টেনা বা নেঙট ছাড়া তাহার আর ভালো কাপড় পিরাণ পরা সারা-জীবনেও ঘটিয়া উঠেনা, ছেলে মেয়ের শাদ-আরমান মিটাইতে পায়না, অথচ তাহারই ধান চাল লইয়া মহাজনরা পায়ের উপর পা দিয়া বারমাসে তেত্রিশ পার্বণ করিয়া নওয়াবী চালে দিন কাটাইয়া দেন! কয়লার খনির কুলিদিগকে আমরা স্বচক্ষে দেখিয়াছি, তাহাদের কেহ ত্রিশ চল্লিশ বৎসরের বেশী বাঁচেনা; তাহারা দিবারাত্রি খনির নীচে পাতালপুরীতে আলে। বাতাস হইতে নিজেদের বক্ষিত করিয়া কয়লার গাদায় কেরোসিনের ধূঁয়ার মধ্যে কাজ করিয়া শরীর মাটি করিয়া ফেলে। কোম্পানী তো তাহাদেরই দৌলতে লক্ষ লক্ষ টাকা উপার্জন করিতেছেন, কিন্তু এ-হতভাগাদের স্বাস্থ্য আহার প্রভৃতির দিকে ভুলিয়াও চাইবেন না। এই কুলিদিগের চেহারার দিকে তাকাইয়া কেহ কখনো চিনিতে

দারাজ দস্ত্—বিপুল হস্ত। শাদ-আরমান—সাধ ইচ্ছা।

পারিবেন না যে, ইহারা মানুষ কি প্রেতলোক-ফের্তা বীভৎস নর-কঙ্কাল। দোষ কাহাদের? কর্তাদের মতে দোষ অবশ্য এই অভ্যাসগোত্রেরই। কারণ পেট বড় মুদ্রুই এবং পেটের জন্মই ইহারা এমন করিয়া আত্মহত্যা করে।

আমরা মাত্র এই ছুই একটি নজির দিয়াই ক্ষান্ত হইলাম। দেশের সমস্ত কল-কারখানায়, আড়তে গুদামে ‘ভাবিয়া চিন্তিয়া মানুষ হত্যার’ এই রূপ শত শত বীভৎস নগ্নতা দেখিতে পাইবেন। আমাদের ক্ষমতা নাই যে, তাহা ভাষায় বর্ণনা করিয়া বলি। যাহারা এই সব কল-কারখানায় পরোক্ষ বা প্রত্যক্ষভাবে এতটুকুও সংশ্লিষ্ট আছেন, বা একদিনের অন্তরও গুদিক মাড়াইয়াছেন, তাহারাই আমাদের এই বর্ণনার চেয়ে এর সত্যতা কতগুণ বেশী বৃদ্ধিতে পারিবেন। আজকাল বিশ্বমানবের মধ্যে Larger humanity বলিয়া যে একটা মনোবৃত্তির মানবতার স্বর্গীয় ভাব জাগিয়াছে, এই কল-কারখানার আশঙ্কায় কত বা কর্তৃপক্ষেরই সে দিকটা যেন একেবারে পাষাণ হইয়া গিয়াছে। তাহাদের চোখের সামনে রাত্রিদিন মনুষ্যত্ব-বিবর্জিত কত অমানুষিক পাশবতা তাহাদেরই এই সব কারখানায় আড়তে অগ্নিপ্রস্তুত হইতেছে, কিন্তু তাহারা নির্বাক নিশ্চল! নিজেরা ‘মজা-সে’ আকর্ষণ ভোগের মধ্যে থাকিয়া কুলি মজুরদের আবেদন নিবেদনকে শূণ্যের চোকর লাগাইতেছেন! সবারই অন্তরে একটা বিদ্রোহের ভাব আজ-সম্মানের স্কুল সংস্করণরূপে নিদ্রিত থাকে, যেটা খোঁচা খাইয়া খাইয়া জর্জরিত না হইলে মরণ-কামড় কামড়াইতে আসে না। কিন্তু ঠিক তাতে এই মনুষ্যত্ব-বিহীন ভোগ-বিলাসী কর্তার দল ভয়ানক দৃষ্টি হঠাৎ উঠেন, তাহারা তখনও বৃদ্ধিতে পারেন না যে, এ অভ্যাসগোত্রের বৈদ্যনাথ বোকা নেহাৎ অসহ্য হওয়াতেই তাহাদের এ-বিদ্রোহের মাথা-ঝাঁকানি। উন্নত আমেরিকা-ইউরোপেই ইহার প্রথম প্রচলন। লেখানে এখন লোকমতের উপরই শাসন প্রতিষ্ঠিত, এই গণতন্ত্র বা ডিমোক্রাসিই সেদেশে সর্বসর্বা; তাই শ্রমজীবীদেরও ক্ষমতা

সেখানে অসীম। তাহারা যে রকম মজুরি পায়, তাহাদের স্বাস্থ্য শিক্ষা
 আহার বিহার প্রভৃতির যে রকম সুখ সুবিধা, তাহার তুলনায় আমাদের
 দেশের শ্রমজীবীগণের অবস্থা কশাইখানার পশু অপেক্ষাও নিকৃষ্ট।
 তাই এতদিন নির্বিচারে মৌন থাকিয়া মাথা পাতিয়া সমস্ত অত্যাচার
 অবিচার সহিয়া সহিয়া শেষে যখন আজ রক্তমাংসের শরীরে তাহা
 একেবারে অসহ্য হইয়া উঠিল, তখন তাহারাও মুখ ফিরাইয়া দাঁড়াইল।
 এই বুরোক্র্যাসি বা আমলাতন্ত্র-শাসিত দেশেও তাহারা যখন তাহাদের
 দুঃখ-কষ্ট-জর্জরিত ছিন্নভিন্ন অন্তরে এমন বিদ্রোহ-ধ্বজা তুলিল,
 তখন যাঁহার অন্তঃকরণ বা Sentiment বলিয়া জিনিষ আছে, তিনিই
 বুঝিতে পারিবেন, ইহাদের দুঃখ কষ্ট, অভাব অভিযোগ কত বেশী
 অসহনীয় তীব্র হইয়া উঠিয়াছে। এই ধর্মঘটের আগুন এখন দাউ
 দাউ করিয়া সারা ভারতময় জ্বলিয়া উঠিয়াছে এবং ইহা সহজে
 নিভিবার নয়, কেননা ভারতেও এই পতিত উপেক্ষিত নিপীড়িত
 হতভাগাদের জন্য কাঁদিবার লোক জন্মিয়াছে, এ দেশেও মহত্তর
 মানবতার অনুভব সকলেই করিতেছেন। সুতরাং শ্রমজীবিদলেও
 সেই সঙ্গে তথাকথিত গণতন্ত্র ও ডিমোক্র্যাসির জাগরণও এ দেশে
 দাবানলের মত ছড়াইয়া পড়িতেছে এবং পড়িবে। কেহই উহাকে
 রুখিতে পারিবে না। পশ্চিম হইতে পূর্বে ক্রমেই ইহা বিস্তৃতি
 লাভ করিতেছে এবং করিবে। এ ধর্মঘট ক্রিষ্ট মুমূর্ষু জাতের শেষ
 কামড়, ইহা বিদ্রোহ নয়।

লোকমান্য তিলকের মৃত্যুতে
বেদনাতুর কলিকাতার দৃশ্য
(স্মৃতি)

আজ মনে পড়ে সেই দিন আর সেই ক্ষণ—বিকাল আড়াইটা
যখন কলিকাতার সারা বিক্ষুব্ধ জনসত্ত্ব টাউনহলের থিলাফৎ-
আন্দোলন-সভায় তাহাদের বুকভরা বেদনা লইয়া সম্রাটের-সম্রাট
বিশ্বপিতার দরবারে তাহাদের আর্ন্ত-প্রার্থনা নিবেদন করিতেছিল,
আর পুত্রহীনা জননী মত সারা আকাশ জুড়িয়া কাহার আকুলধারা
ব্যাকুলবেগে করিতেছিল ! সহসা নিদারুণ অশনিপাতের মত আকাশ
বাতাস মন্থন করিয়া গভীর আর্ন্তনাদ উঠিল,—‘তিলক আর নাই।’
আমাদের জননী জন্মভূমির বীরবাহু, বড় স্নেহের সন্তান—‘তিলক
আর নাই।’ হিন্দুস্থান কাঁপিয়া উঠিল—কাঁপিতে কাঁপিতে মূর্ছিত
হইয়া পড়িল ! ওরে, আজ যে তাহার বুকে তাহারই হিমালয়ের
কাধনজন্মধা ধসিয়া পড়িল ! হিন্দুস্থানের আকাশে বাতাসে কোন্
প্রিয়তম-পুত্রহারা অভাগী মাতার মর্মবিদারী কাৎরানি আর বুক-
চাপড়ানি রনিয়া রনিয়া গুমরিয়া ফিরিতে লাগিল, ‘হায় মেরি ফরজন্দ
(হায় আমার সন্তান)—আহ্ মেরি বেটা !’ এই আর্ন্তকান্নার রেশ,
যখন কলিকাতায় আসিয়া প্রতিধ্বনি তুলিল, তখনকার অবস্থা বর্ণনা
করিবার ক্ষমতা আমাদের নাই। এত মর্মভেদী কান্না প্রকাশের ভাষা
নাই ভাষা নাই। মহাবাহু মহাপুরুষ অগ্রজের মৃত্যুতে কনিষ্ঠ ভ্রাতারা
মেঘন প্রাণ ভরিয়া গলা-ধরাধরি করিয়া ফোঁপাইয়া ফোঁপাইয়া কাঁদে,
লোম্বিন দিন-শেষে ব্যাকুল বৃষ্টিধারার মধ্যে দাঁড়াইয়া আমরা তেমনি
করিয়া কাঁদয়াছি ! হিন্দু-মুসলমান,—মাড়োয়ারী, বাঙালী, হিন্দুস্থানী

কোন ভেদাভেদ ছিল না, কোন জাতিভিচার ছিল না,—তখন শুধু মনে হইতেন, আজ এই মহাগণতন্ত্রে দাঁড়াইয়া আমরা একই বাণ্যায় বার্ষিক বেদনাতুর মামণাণা, ছাটি গেছারা ছোট ভাই ! এখানে ভেদ নাই ! ভেদ নাই ! সোদন আমাদের সে কান্না দেখিয়া মহাশূন্য স্তম্ভিত হইয়া গিয়াছে ঐরা আকাশের ঝরা থামিয়া গিয়াছে,—শুধু সে-কার মেঘ-ভরা বেদনাগ্নুত অপলক দৃষ্টি আমাদের নাক্সা শিরে স্তব্ধ আনত হইয়া চাহিয়া থাকিয়াছে ! তাই মনে হইতে-ছিল, বুঝি সারা বিশ্বের বুকের স্পন্দন থামিয়া গিয়াছে ! এই স্তম্ভিত নিস্তব্ধতাকে ব্যথা দিয়া সহসা লক্ষকণ্ঠের ছিন্ন-ক্রন্দন কারবালা-মাতমের (কারবালার শোকোচ্ছ্বাস) মত মোচড় খাইয়া উঠিল, 'হায় তিলক !' ওরে, এ কোন্ অসহনীয় ক্রন্দন ? হায়, কাহার এ লক্ষ কণ্ঠের শ্রান্ত রোদন ?—মনে পড়ে, সমস্ত বড়বাজার ছাপাইয়া হারিসন রোডের সমস্ত স্থান ব্যাপিয়া রোক্তমান লক্ষ লক্ষ লোক—মাড়োয়ারী, বাঙ্গালী, হিন্দু-মুসলমান, বৃদ্ধ, যুবক, শিশু, কন্যা—শুধু বুক চাপড়াইতেছে, 'হায় তিলকজি ! আহ তিলকজি !' মৃত্যুর অমাত্রা শত শত কুম্ভ পতাকা পশ্চিমা-ঝঞ্ঝায় থর থর করিয়া কাঁপিতেছে, আর তাহারই নিম্নে মালা-চন্দন বিভূষিত বিগত তিলকের জীবন্ত প্রতিমূর্তি ! তাহাই কাঁধে করিয়া অযুত লোক চলিয়াছে, জাহবীর জলে বিসর্জন দিতে ! বাড়ীর বারান্দায় জানালায় থাকিয়া আমাদের মাতা ভগিনিগণ এই পুণ্যস্থার আলেখ্যের উপর তাঁহাদের পুত অশ্রুরাশি ঢালিয়া ভাসাইয়া দিতেছিলেন ! বলিলাম, ধন্য ভাই তুমি ! এমনি মরণ, সুখের মরণ, সার্থক মরণ যেন আমরা সবাই মরিতে পারি ! তোমার চিরবিদায়ের দিনে এই শেষ আশীষবাণী করিয়া যাও ভাই, এমনি প্রার্থিত মহামৃত্যু যেন এই দুর্ভাগা ভারত-বাসীর প্রত্যেকেরই হয় !.....ওরে ভাই, আজ যে ভারতের একটি স্তম্ভ ভাঙ্গিয়া পড়িল ! এ পড়-পড় ভারতকে রক্ষা করিতে এই মুক্ত জাহবীতে দাঁড়াইয়া, আয় ভাই, আমরা হিন্দু-মুসলমান কাঁধ দিই ! নহিলে এ ভয়সৌধ যে আমাদেরই শিরে পড়িবে ভাই ! আজ বড়-

ভাইকে হারাইয়া, এই একই বেদনাকে কেন্দ্র করিয়া, একই লক্ষ্যে
দৃষ্টি রাখিয়া যেন আমরা পরস্পরকে গাঢ় আলিঙ্গন করি !
মনে রাখিও ভাই, আজ মশানে দাঁড়াইয়া এ স্বার্থের মিলন নয়, এ
মিলন পবিত্র, স্বর্গীয় ! ঐ দেখ, এ মিলনে দেবদূতরা তোমাদের
নাক্ষা-শিরে পুষ্প-বৃষ্টি করিতেছেন । মায়ের চোখের জলেও হাসি
ছল ছল করিতেছে !

মুহাজিরিন হত্যার জন্য দায়ী কে ?

আমরা ইহারই মধ্যে ভুলিয়া যাই নাই হতভাগ্য হাবিবুল্লাহর হত্যা-বীভৎসতা। আজও মনে পড়ে সেই দিন, যেদিন খবর আসিয়াছিল যে, সামরিক পুলিশের সঙ্গে একদল মুহাজিরিন গোলমাল করায় কাঁচাগাড়ী নামক স্থানে মুহাজিরিনদের উপর গুলিবর্ষণ করা হয়। একদল ভারতীয় সৈন্য তিন তিনবার গুলিবর্ষণ করে, তাহাতে মাত্র একজন নিহত ও একজন আহত হয়। কোন্ মুর্থ বিশ্বাস করিবে একথা ?

আমরা বলি, একটি আঘাতের বদলেই তিন তিন বার গুলিবর্ষণ করা, এ কোন্ সভ্য দেশের রীতি ? তোমাদের ত সিপাহী-সৈন্যের অভাব নাই—বিশেষ করিয়া সেই সীমান্ত দেশে। চল্লিশটি নিরস্ত্র লোককে, তাহারা যদি সত্যি অগ্নায় করিয়া থাকে, সহজেই ত গেরেফতার করিয়া লইতে পারিতে। তাহা না করিয়া তোমরা চালাইয়াছিলে গুলি ! আর কাহাদের উপর ? যাহারা স্বদেশের, স্বজনের মায়া মমতা ত্যাগ করিয়া চিরদিনের জন্য তোমাদের হাত হইতে নিষ্কৃতি লাভ করিতে চলিয়াছিল !

কিন্তু আর আমরা দাঁড়াইয়া মার খাইব না, আঘাত খাইয়া খাইয়া, অপमानে বেদনায় আমাদের রক্ত এইবার গরম হইয়া উঠিয়াছে। কেন, তোমাদের আত্মসম্মান জ্ঞান আছে, আর আমাদের নাই ? আমরা কি মাণুষ নই ? তোমাদের একজনকে মারিলে আমাদের এক হাজার লোককে খুন কর, আর আমাদের হাজার লোককে পাঁঠা কাটা করিয়া কাটিলেও তোমাদের কিছু বলিতে পাইব না ?

মহুগুহের, বিবেকের, আত্মসম্মানের স্বাধীনতার উপর এত জুলুম কেহ কখনও সহ্য করিতে পারে কি ? এই যে সেদিন হতভাগারা হাজার বছরের পরিচিত, সারা জীবনের সুখ-দুঃখ-স্মৃতি-বিজড়িত, বাপদাদার ভিটাবাড়ী, আত্মীয় পরিজন জননীজন্মভূমির মায়া মমতা ত্যাগ করিয়া, বড় দুঃখে বড় কষ্টে জীবনের সঙ্গে জড়ানো এইসব স্নেহ-স্মৃতির বন্ধন জোর করিয়া ছিঁড়িয়া এক মুক্ত স্বাধীন অজানার দিকে পাড়ি দিতেছিল, ইহাদের বেদনা বুঝিবার অন্তর তোমাদের আছে কি ? মহুগুহের এই যে মস্তবড় একটা দিক, পরের বেদনবে আপন করিয়া নেওয়া,—ইহা কি আর তোমাদের আছে ? স্বাধীনতাকে, মহুগুহকে এমন নির্মমভাবে ছুই পায়ে মাড়াইয়া চলিবে আর কতদিন ? এই অত্যাচারের, এই মিথ্যার বনিয়াদে খাড়া করা তোমাদের ঘর—মনে কর কি, চিরদিন খাড়া থাকিবে ? এই সব অপকর্মের, এই সব অমার্জনীয় পাপের, এই সব নির্মম উৎপীড়নের জন্য বিবেকের যে দংশন তাহা হইতে তোমাদের রক্ষা করিবে কে ? এ মহাশাস্তির ভীষণতা আজো কি তোমার চক্ষে পড়ে নাই ? তোমাদের অত্যাচারে, জুলুমে নিপীড়িত হইয়া, মানবাত্মার—মহুগুহের এত পাশবিক অবমাননা সহ্য করিতে না পারিয়া মানুষের মত যাহারা স্পৃষ্ট করিয়া বলিয়া দিতে পারিল যে, এখানে আর ধর্ম কর্ম চলিবে না, এবং চিরদিনের মত তোমাদের সংশ্রব ছাড়িয়া তোমাকে সালাম করিয়া বিদায় লইল,—সেই বিদায়ের দিনেও তাহাদের উপর সামান্য পশুর মত ব্যবহার করিতে তোমার লজ্জা হইল না, দ্বিধা হইল না ! সামান্য খুঁটিনাটি ধরিয়া, ছল করিয়া গায়ে পড়িয়া তাহাদের সাথে গোলমাল বাধাইলে, হত্যা করিলে ! আবার হত্যা করিলে আমাদেরই ভারতীয় সৈন্য দ্বারা ! যাহাকে হত্যা করিলে, তাহাকে হত্যা করিয়াও ছাড় নাই তাহার লাশ তিন দিন ধরিয়া আটকাইয়া রাখিয়া পচাইয়া গলাইয়া ছাড়িয়াছ ! মৃতের প্রতিও এত আক্রোশ, এত অসম্মান কেবল তোমাদের সভ্য জাতিই একা দেখাইতে পারিতেছে ! তোমাদেরি কিচনার—লর্ড কিচনার মেহেদীর কবর

হইতে অস্থি উত্তোলন করিয়া ঘোড়ার পায়ে বাঁধিয়া ঘোড় দৌড় করিয়াছে, তোমাদের এই সৈন্যদল যে তাহারই শিষ্য। না জানি আরো কত বাছাদের, আমাদের কত মা-বোনদের খুলি উড়াইয়াছ, তোমরাই জান। আমাদের যে ভাই আজ তোমাদের হাতে শহীদ হইল, সে এমন এক মুক্ত স্বাধীন দেশে গিয়া পৌঁছিয়াছে যেখানে তোমাদের গুলি পৌঁছিতে পারে না ! সে যে মুক্তির সন্ধানেই বাহির হইয়াছিল ! মনে রাখিও, সে খোদার আরশের পায়া ধরিয়া ইহার দাদ (বিচার) মাগিতেছে ! দাও, উত্তর দাও ! বল তোমার কি বলিবার আছে !

বাঙলা সাহিত্যে মুসলমান

আমাদের বাঙলার মুসলমান সমাজ যে বাঙলা ভাষাকে মাতৃভাষা বলিয়া স্বীকার করিয়া লইয়াছেন এবং অত্যল্পকাল মধ্যে আশাতীত ভাবে উন্নতি দেখাইয়াছেন, ইহা সকলেই বলিবেন ; এবং আমাদের পক্ষে ইহা কম স্লাঘার বিষয় নহে । সাধারণ অসাধারণ প্রায় সকল বাঙালী মুসলমানই এখন বাঙলা পড়িতেছেন, বাঙলা শিখিবার চেষ্টা করিতেছেন, ইহা বড়ই আশা ও আনন্দের কথা । বাঙলা সাহিত্যে পাকা আসন দখল করিবার জন্য সকলেরই মনে যে একটা তীব্র বাসনা জাগিয়াছে, এবং ইহার জন্য আমাদের এই নূতন পথের পথিকগণ যে বেশ তোড়জোড় করিয়া লাগিয়াছেন, ইহা নিশ্চয়ই সাহিত্যে আমাদের জীবনের লক্ষণ । ইহারই মধ্যে আমাদের কয়েকজন তরুণ লেখকের লেখা দেখিয়া আমাদের খুবই আশা হইতেছে যে, ইহারা সাহিত্যে বহু উচ্চ আসন পাইবেন ।

এখন আমাদের বাঙলা সাহিত্যে স্থায়ী প্রভাব বিস্তার করিতে হইলে সর্বপ্রথম আমাদের লেখার জড়তা দূর করিয়া তাহাতে ঝর্ণার মত চেউভরা চপলতা ও সহজ মুক্তি আনিতে হইবে । যে সাহিত্য জড়, যাহার প্রাণ নাই, সে নির্জীব-সাহিত্য দিয়া আমাদের কোন উপকার হইবে না, আর তাহা স্থায়ী সাহিত্যও হইতে পারে না । বাঙলা সাহিত্যে রবীন্দ্রনাথ ছাড়া খুব কম লেখকেরই লেখায় মুক্তির জন্য উদ্যম আকাজক্ষা ফুটিতে দেখা যায় । হইবে কোথা হইতে ? সাহিত্য হইতেছে প্রাণের অভিব্যক্তি, যাহার নিজের প্রাণ নাই, যে নিজে জড় হইয়া গিয়াছে, সে লেখার প্রাণ দিবে কোথা হইতে ? যাহার নিজের বুক রঙ-এর আলপনা ফুটে না, সে চিত্রে রঙ ফুটাইবে কেমন করিয়া ? আমাদের অধিকাংশই হইয়া গিয়াছি জড়, কেননা আমাদের জীবন ভয়ানক একঘেয়ে ;

তাহাতে না আছে কোন বৈচিত্র্য, না আছে কোন সৌন্দর্য। তা ছাড়া, 'বোঝার উপর শাকের আঁটির' মত আমরা নাকি আবার জন্ম হইতেই দার্শনিক, কাজেই বয়স কুড়ি পার না হইতেই আমরা গম্ভীর হইয়া পড়ি অস্বাভাবিক রকমের। আর, গম্ভীর হইলেই অমনি নির্জীব অচেতন প্রাণীর মত হাত পা গুটাইয়া বসিয়া থাকিতে হইবে। এই যে চলার আনন্দ হইতে বঞ্চিত থাকিয়া জড়-ভরতের মত বসিয়া থাকা, ইহাই আমাদের প্রাণশক্তিকে টুঁটি টিপিয়া মারিতেছে। সাহিত্যের মুক্তধারায় থাকিবে চলার আনন্দ, শ্রোতের বেগ এবং ঢেউ-এর কল-গান ও চঞ্চলতা।

আমাদিগকে, বিশেষ করিয়া আমাদের তরুণ সম্প্রদায়কে এই দিকে বিশেষ লক্ষ্য রাখিতে হইবে। অনেক যুবকের লেখা দেখিয়া মনে হয়, ইহা যেন কোন এক জরাগ্রস্ত বুড়োর লেখা; তাহাতে না আছে প্রাণ, না আছে চিন্তা-শক্তি, না আছে ভাব—শুধু আবর্জনা, কঙ্কাল আর জড়তা। ইহা বড়ই দুঃখের কথা। সাহিত্যকে এই প্রাণের সোণার-কাঠি দিয়া জাগাইবার যে যাদু-শক্তি, ইহা লাভ করিতে হইলে আমাদের তরুণ সাহিত্যিক সম্প্রদায়কে সর্বপ্রথম শরীরের দিকে দৃষ্টি রাখিতে হইবে। শরীর নীরোগ হইলে মনে আপনি একটা বিমল আনন্দ উছলিয়া পড়িতে থাকে। দেখিবেন, যে সাহিত্যিকের স্বাস্থ্য যত বেশী প্রফুল্লচিত্ত, তাঁর লেখা তত বেশী স্বাস্থ্য-সম্পন্ন, তত বেশী কল-মুখর। নবীন সাহিত্যিকগণ সর্বদা প্রফুল্লচিত্ত থাকিবার জন্য যদি এক আঁধুটু করিয়া সঙ্গীতের আলোচনা করেন, তাহা হইলে দেখিবেন তাঁহাদের লেখার মধ্যে এই সঙ্গীত, সুরের এই ঝঙ্কার উন্মুক্ত প্রফুল্লচিত্তের এই মোহন-বিকাশ ফুটিয়া উঠিয়া তাঁহাদের লেখার মধ্যে এক নূতন মাদকতা, অভিনব শক্তি দান করিতেছে। অধিকাংশ 'পুঁয়ে মারা' পিলে-রোগাক্রান্ত সাহিত্যিকের লেখাই দেখিবেন অসুস্থ (morbid); ইহাই সাহিত্যের স্বচ্ছ ধারায় আবিলতা আনে। যাঁহার চিত্ত যত নিরাবিল, নির্মল, উন্মুক্ত, হাস্য-মুখর, তাঁহার লেখাও তত নূতন

নূতন সম্পদে ভরা (rich)। ইউরোপের লোকেরা যেমন স্বাস্থ্য-সম্পন্ন, খেলাধুলা, দৌড় ধাপ, মারামারি, হাসি খুসী যেমন তাহাদের নিত্যকার সঙ্গী, তাহাদের লেখার মধ্যেও ঠিক তাহাদের জীবনের ঐসব গুণ সুন্দরভাবে ফুটিয়া উঠিতেছে।

অপর পক্ষে, উহারই বিপরীত সমস্ত দোষসম্পন্ন বলিয়া আমাদের লেখা, আমাদের সাহিত্য-সৃষ্টি আবার তেমনি সঙ্কীর্ণ, ভণ্ডামি, অসত্য, রোগের বীজাণু প্রভৃতিতে ভরা। লেখকের লেখা হইতেছে তাঁহার প্রাণের সত্য অভিব্যক্তি। যেখানে লেখক সত্য, তাঁহার লেখাতেও সে সত্য সত্যভাবেই ফুটিয়া উঠিবে; যেখানে লেখক মিথ্যা, সেখানে সেই মিথ্যাকে তিনি হাজার চেষ্টা করিলেও লুকাইতে পারিবেন না। সাধারণের চক্ষে যদি না পড়ে, তবে জহরীর চক্ষে তাহা পড়িবে। সাহিত্যে এই প্রাণ, এই উদ্যম-চঞ্চলতা, এই উদার মুক্তি আনয়নের চেষ্টা আপাততঃ আমাদের মাত্র দুই একজন তরুণ সাহিত্যিক ভিন্ন অন্য কারুর লেখায় দেখিতে পাইতেছি না। সেই গডলিকা প্রবাহ। সাহিত্যে যে একটা নূতন ধারা চলিয়াছে, সে সম্বন্ধে আমাদের অনেক নূতন লেখক এখনও অন্ধ। এই সব কারণে সাহিত্যিকের, কবির, লেখকের প্রাণ হইবে আকাশের মত উন্মুক্ত উদার, তাহাতে কোন ধর্মবিদ্বেষ জাতিবিদ্বেষ, বড় ছোট জ্ঞান থাকিবে না। বাঁধ দেওয়া ডোবার জলের মত যদি সাহিত্যিকের জীবন পঙ্কিল, সঙ্কীর্ণ, সীমাবদ্ধ হয়, তাহা হইলে তাঁহার সাহিত্য-সাধনা সাংঘাতিক ভাবে ব্যর্থ হইবে। তাঁহার সৃষ্ট সাহিত্য আঁতুড় ঘরেই মারা যাইবে। যঁহার প্রাণ যত উন্মুক্ত, তিনি তত বড় সাহিত্যিক। কারণ, সাহিত্য হইতেছে বিশ্বের, ইহা একজনের হইতে পারে না। সাহিত্যিক নিজের কথা নিজের ব্যথা দিয়া বিশ্বের কথা বলিবেন, বিশ্বের ব্যথায় ছোওয়া দিবেন। সাহিত্যিক যতই কেন সূক্ষ্মতত্ত্বের আলোচনা করুন না, তাহা দেখিয়াই যেন বিশ্বের যে কোন লোক বলিতে পারে, ইহা তাঁহারই অন্তরের অন্তরতম কথা; ইহা তাঁহারই বুকে গুমরিয়া

মরিতেছিল, প্রকাশের পথ পাইতেছিল না। এইরূপেই বিশ্ব-সাহিত্য সৃষ্টি হয়, ইহাকেই বলে সাহিত্যে সার্বজনীনতা।

এই বিশ্ব-সাহিত্য সৃষ্টি করিতে পারিয়াছেন বলিয়াই আজ রবীন্দ্রনাথ এমন জগদ্বিখ্যাত হইয়া পড়িয়াছেন। যাহা বিশ্ব-সাহিত্যে স্থান পায় না, তাহা স্থায়ী সাহিত্য নয়, খুব জোর ছুদিন আদর লাভের পর তাহার মৃত্যু হয়। আমরাদিগকেও তাই এখন করিতে হইবে সাহিত্যে সার্বজনীনতা সৃষ্টি। অবশ্য, নিজের জাতীয় ও দেশীয় বিশেষত্বকে না এড়াইয়া, না হারাইয়া। যিনি যে দেশেরই হউন, সকলেরই অন্তরের কতকগুলি সত্য আছে, সূক্ষ্মতম ভাব আছে, যাহা সকল দেশের লোকের পক্ষেই সমান; সাহিত্য-সৃষ্টির সময় ভিতরের এইসব সূক্ষ্মদিকে দৃষ্টি রাখিতে হইবে। এইদিকে লক্ষ্য রাখিয়া জীবনের গূঢ় রহস্যকে বিশ্লেষণ করিয়া সত্যের সৌন্দর্য ও মঙ্গল ফুটাইয়া তুলিতে হইবে,—এই মহাশক্তি আমাদের তরুণ লেখক সম্প্রদায়কে অর্জন করিতে হইবে। সত্য যদি লক্ষ্য হয়, সুন্দর ও মঙ্গলের সৃষ্টি সাধনা ব্রত হয়, তবে তাঁহার লেখা সম্মান লাভ করিবেই করিবে। অণ্ডের ঠিক প্রাণে গিয়া আঘাত করিবার মত শক্তি পাইতে নিজের প্রাণ থাকা চাই। এসব কথা আমরা শুধু কোন বিশেষ লেখক সম্প্রদায়কে উল্লেখ করিয়া বলিতেছি না; ইহা ঔপন্যাসিক, কবি, ছোট গল্প-লেখক সকলেরই প্রতি প্রযোজ্য এই তিন রকমের লেখকের মধ্যে কেহই ছোট নন, কারণ প্রত্যেকেরই উদ্দেশ্য—সৃষ্টি। তিনিই আর্টিষ্ট, যিনি আর্ট ফুটাইয়া তুলিতে পারেন। আর্টএর অর্থ সত্যের প্রকাশ (Execution of truth) এবং সত্য মাত্রই সুন্দর, সত্য চিরমঙ্গলময়। আর্টকে সৃষ্টি, আনন্দ, বা মানুষ এবং প্রকৃতি, (man plus nature) ইত্যাদি অনেক কিছু বলা যাইতে পারে; তবে সত্যের প্রকাশই হইতেছে ইহার অশ্রুতম উদ্দেশ্য। আমাদের নবীন তরুণ আর্টিষ্ট সাহিত্যিক ও কবিগণ এই কয়েকটি কথা মনে রাখিয়া স্থায়ী সাহিত্য সৃষ্টির দিকে চেষ্টা ও প্রাণ প্রয়োগ করিবেন, ইহাই আমাদের বাসনা। আমাদের এ আশা পূর্ণ হউক।

ছুঁৎমার্গ

একবার এক ব্যঙ্গ-চিত্রে দেখিয়াছিলাম, ডাক্তার-বাবু রোগীর টিকি-মূলে ষ্টেথিস্কোপ বসাইয়া জোর গ্রাভারী চালে রোগ নির্ণয় করিতেছেন। আমাদের রাজনীতির দণ্ডমুণ্ড হঠা-কর্তা-বিধাতার দলও আমাদের হিন্দু-মুসলমানে প্রাণের মিল না হওয়ার কারণ ধরিতে গিয়া ঠিক ঐ ডাক্তারবাবুর মতই ভুল করিতেছেন। আদত স্পন্দন যেখানে, যেখান হইতে প্রাণের গতি-রাগ স্পষ্ট শুনিতে পাওয়া যায়, সেখানে ষ্টেথিস্কোপ না লাগাইয়া টিকি-মূলে যদি ব্যামো নির্ণয় করিতে চেষ্টা করা হয়, তাহা হইলে তাহা যেমন হাস্যাস্পদ ও ব্যর্থ, রাজনীতির দিক দিয়া হিন্দু-মুসলমানে প্রাণের মিলনের চেষ্টা করাও তেমনি হাস্যাস্পদ ও ব্যর্থ। সত্যিকার মিলন আর স্বার্থের মিলনে আসমান জমিন তফাৎ। প্রাণে প্রাণে পরিচয় হইয়া যখন দুইটি প্রাণ মানুষের-গড়া সমস্ত বাজে বন্ধনের ভয়-ভীতি দূরে সরাইয়া সহজ সঙ্কোচে মিশিতে পারে, তখনই সে মিলন সত্যিকার হয়; আর যে মিলন সত্যিকার, তাহাই চিরস্থায়ী, চিরন্তন। কোন একটা বিশেষ কার্য উদ্ধারের জন্য চির-পোষিত মনোমালিঙ্গটাকে আড়াল করিয়া বাহিরে প্রাণভরা বন্ধুত্বের ভান করিলে সে বন্ধুত্ব স্থায়ী তো হইবেই না, উপরন্তু সে স্বার্থও সিদ্ধি না হইতে পারে, কেননা মিথ্যার উপর ভিত্তি করিয়া কখনও কোন কার্যে পূর্ণ সাফল্য লাভ হয় না।

এখন কথা হইতেছে, আদত রোগ কোথায়? আমাদের গভীর বিশ্বাস যে, হিন্দু-মুসলমানের মিলনের প্রধান অন্তরায় হইতেছে এই ছোঁওয়া-ছুঁয়ির জঘন্য ব্যাপারটাই। ইহা যে কোন ধর্মেরই অঙ্গ হইতে পারে না, তাহা কোন ধর্ম সম্বন্ধে গভীর জ্ঞান না থাকিলেও আমরা জোর করিয়াই বলিতে পারি। কেননা

একটা ধর্ম কখনো এত সঙ্কীর্ণ অমুদার হইতেই পারে না। ধর্ম সত্যের উপর প্রতিষ্ঠিত এবং সত্য চিরদিনই বিশ্বের সকলের কাছে সমান সত্য। এইখানেই বুঝা যায় যে, কোন ধর্ম শুধু কোন এক বিশিষ্ট সম্প্রদায়ের জন্ত নয়, তাহা বিশ্বের। আর এই ছুঁৎমার্গ যখন ধর্মের অঙ্গ নয়, তখন নিশ্চয়ই ইহা মানুষের সৃষ্টি বা খোদার খোদকারী। মানুষের সৃষ্টি শৃঙ্খলা বা সমাজ-বদ্ধ সাময়িক সত্য হইতে পারে, কিন্তু তাহা তো শাস্ত্রত সত্য হইতে পারে না। এই জন্তই ‘সম্ভবামি যুগে যুগে’ রূপ মহাবাহীর উৎপত্তি। আমাদেরও হাদিসে সেই জন্ত প্রতি শত-বর্ষে একজন করিয়া ‘মুজাদ্দাদ’ বা সংস্কারক আসেন বলিয়া লিখিত আছে। ‘বেদাৎ’ বা মানুষের সৃষ্ট রীতিনীতির সংস্কার করাই এই সংস্কারকদের মহান লক্ষ্য।

হিন্দু ধর্মের মধ্যে এই ছুঁৎমার্গরূপ কুষ্ঠরোগ যে কখন প্রবেশ করিল তাহা জানি না, কিন্তু ইহা যে আমাদের হিন্দু ভ্রাতৃদের মত একটা বিরাট জাতির অস্থিমজ্জায় ঘুণ ধরাইয়া একেবারে নির্বীৰ্য করিয়া তুলিয়াছে, তাহা আমরা ভাইয়ের অধিকারের জোরে জোর করিয়া বলিতে পারি। আমরা যে তাঁহাদের সমস্ত সামাজিক শাসনবিধি একদিনেই উন্টাইয়া ফেলিতে বলিতেছি তাহা নয়, কিন্তু যে সত্য হয়ত একদিন সামাজিক শাসনের জন্তই শৃঙ্খলিত হইয়াছিল, তাহার কি আর মুক্তি হইবে না? বাঙলার মহাপ্রাণ মহাতেজস্বী পুত্র, স্বামী বিবেকানন্দ বলিয়াছেন যে, ভারতে যেদিন হইতে এই ‘শ্লেচ্ছ’ শব্দটার উৎপত্তি সেদিন হইতেই ভারতের পতন, মুসলমান আগমনে নয়। মানুষকে এত ঘৃণা করিতে শিখায় যে ধর্ম, তাহা আর যাহাই হউক ধর্ম নয়, ইহা আমরা চ্যালেঞ্জ করিয়া বলিতে পারি। এই ধর্মেই নরকে নারায়ণ বলিয়া অভিহিত করা হইয়াছে। কি উদার সুন্দর কথা! মানুষের প্রতি কি মহান পবিত্র পূজা! আবার সেই ধর্মেরই সমাজে মানুষকে কুকুরের চেয়েও ঘৃণ্য মনে করিবার মত হয়ে জঘন্য

ছুঁৎমার্গ বিধি : কি ভীষণ অসামঞ্জস্য ! আমাদের অগ্নিমন্ত্রে দীক্ষিত
দহনপূত কালাপাহাড়ের দলকে সেই জন্তু আমরা আজ প্রাণ হইতে
আবাহন করিতেছি, এই মাক্তাতার আমলের বিদ্রোহী-বন্ধন ভাঙিয়া
চুরমার করিয়া ফেলিতে। ‘আয়রে নবীন, আয়রে আমার কাঁচা!’
আমরা যে ধর্মটাকেই একেবারে উড়াইয়া দিতে চাহিতেছি, ইহা মনে
করিলে আমাদের ভুল বুঝা হইবে। আমরা অন্তর হইতেই বলিতেছি
যে, আমাদের সীমার মাঝে থাকিয়াই অসীমের সুর বাজাইতে
হইবে। নিজের ধর্মকে নানিয়া লইয়া সকলকে প্রাণ হইতে ছু-বাহু
বাড়াইয়া আলিঙ্গন করিবার শক্তি অর্জন করিতে হইবে। যিনি
সত্যিকার ভাবে স্বধর্মে নিষ্ঠ, তাঁহার এই উদার বিশ্বপ্রেম আপন
হইতেই আসে। যত ছোঁওয়া-ছুঁয়ির নীচ ব্যবহার ভণ্ড বক-ধার্মিক
আর বিড়াল-তপস্বী দলের মধ্যেই। ইহাদের এই মিথ্যা মুখোস
খুলিয়া ফেলিয়া ইহাদের অন্তরের বীভৎস নগ্নতা সমাজের চোখের
সম্মুখে খুলিয়া ধরিতে হইবে। এইখানে একটা গল্প মনে পড়িয়া
গেল। একদিন আমরা, এক ট্রেনে গিয়া উঠিলাম। আমাদের
কামরায় মালা-চন্দন-ধারী অনেকগুলি হিন্দু ভদ্রলোক ছিলেন।
আমরা কামরায় প্রবেশ করিবামাত্র অর্থাৎ আমাদের মাথায় টুপী ও
পগ্গ দেখিয়াই ছোঁওয়া যাইবার ভয়ে তাঁহারা তটস্থ হইয়া অন্য
দিকে গিয়া দাঁড়াইয়া রহিলেন। সেই বেকেরই এক প্রান্তে বসিয়া
এক পণ্ডিতজী বেদ বা ঐরূপ কোন শাস্ত্র-গ্রন্থ পাঠ করিয়া ঐ
ভদ্রলোকদের শুনাইতেছিলেন। তিনি আমাদের দেখিয়াই এবং
আমাদের অপ্রতিভ ভাব দেখিয়া হাসিয়া আমাদের হাত ধরিয়া
সাদরে নিজের পার্শ্বে বসাইলেন। ভদ্রলোকদের চক্ষু ততক্ষণে
কাণ্ড দেখিয়া চড়ক গাছ ! আমরাও তখন সহজ হইয়া পণ্ডিতজীকে
জিজ্ঞাসা করিলাম যে, তিনি পণ্ডিত ও আচারনিষ্ঠ ব্রাহ্মণ কুলতিলক
হইয়াও কি করিয়া আমাদের এমন করিয়া আলিঙ্গন করিতে
পারিলেন, অথচ এই ভদ্রলোকগণ আমাদের দেখিয়া কেন
একেবারে দশ হাত লাফাইয়া উঠিলেন ? ইহাতে তিনি হাসিয়া

বলিলেন, ‘দেখ বাবা, আমি হিন্দু ধর্মকে ভালবাসি ও সত্য বলিয়া জানি বলিয়া বিশ্বের সকলকে, সকল ধর্মকে ভালবাসিতে শিখিয়াছি। আমার নিজের ধর্মের প্রতি বিশ্বাস আছে বলিয়াই অল্প সকলকে বিশ্বাস করিবার ও প্রাণ দিয়া আনিঙ্গন করিবার শক্তি আমার আছে। যাহারা অল্প ধর্মকে ও অল্প মানুষকে ঘৃণা করে বা নীচ ভাবে, তাহারা নিজেই অন্তরে নীচ, তাহাদের নিজেরও কোন ধর্ম নাই। তবে ধর্মের যে ঘটটা দেখ, তাহা অন্তরের দীনতা, হীনতা ঢাকিবার ব্যর্থ প্রয়াস মাত্র !’ ইহা বানানো গল্প নয়, সত্য ঘটনা।

মানুষ হইয়া মানুষকে কুকুর-বিড়ালের মত এত ঘৃণা করা—মনুষ্যত্বের ও আত্মার অবমাননা করা নয় কি ? আত্মাকে ঘৃণা করা আর পরমাত্মাকে ঘৃণা করা একই কথা। সেদিন নারায়ণের পূজারী বলিয়াছিলেন, ‘ভাই, তোমার সে পরম দিশারী তো হিন্দুও নয়, মুসলমানও নয়,—সে যে মানুষ !’ কি সুন্দর বুদ্ধভরা বাণী ! এ যে নিখিল-কণ্ঠের সত্য-বাণীর মূর্ত প্রতীকনি। যাহার অন্তর হইতে এই উদ্বোধন-বাণী নির্গত হইয়া বিশ্বের পিষ্ট ঘৃণাহত ব্যথিতদের রক্তে রক্তে পরম শান্তির সুধা-ধারা ছড়াইয়া দেয়, তিনি মহা-ঋষি, তাঁহার চরণে কোটি কোটি নমস্কার ! যদি সত্যিকার মিলন আনিতে চাও ভাই, তবে ডাক—ডাক, এমনি করিয়া প্রাণের ডাক ডাক। দেখিবে দিকে দিকে অবহেলিত জন-সম্মুখ তোমার এই জাগ্রত মহা-আত্মানে বিপুল সারা দিয়া ছুটিয়া আসিবে। যাহারা স্বার্থপর, তাহারা মাথা কুটিয়া মরিলেও তো প্রাণের সাড়া কোথাও পাইবে না, যাহাকে পাইয়া তাহারা উল্লাসে নৃত্য করিবে তাহা বাহিরের লৌকিক ‘ডিটো’ দিয়া মাত্র। অন্তরের ডাক মহা ডাক। ডাকিতে হইলে প্রথমে বেদনায়—একেবারে প্রাণের আর্ত তারে গিয়া এমনি করিয়া ছোঁওয়া দিতে হইবে। আর তবেই ভারতে আবার নূতন সৃষ্টি জাগিয়া উঠিবে।

হিন্দু হিন্দু থাক, মুসলমান মুসলমান থাক, শুধু একবার এই মহাগগন-তলে সীমা-হারা মুক্তির মাঝে দাঁড়াইয়া—মানব !

তোমার কণ্ঠে সেই সৃষ্টির আদিম-বাণী ফুটাও দেখি ! বল দেখি, ‘আমার মানুষ ধর্ম।’ দেখিবে, দশদিকে সার্বভৌমিক সাড়ার আকুল স্পন্দন কাঁপিয়া উঠিতেছে। এই উপেক্ষিত জন-সম্মুখকে বুক দাও দেখি, দেখিবে এই স্নেহের ঈষৎ পরশ পাওয়ার গৌরবে তাহাদের মাঝে ত্যাগের একটা কি বিপুল আকাজক্ষা জাগে ! এই অভিমানী-দিগকে বুক দিয়া ভাই বলিয়া পাশে দাঁড় করাইতে পারিলেই ভারতে মহাজাতির সৃষ্টি হইবে, নতুবা নয়। মানবতার এই মহা-যুগে একবার গণ্ডী কাটিয়া বাহির হইয়া আসিয়া বল যে, তুমি ব্রাহ্মণ নও, শূদ্র নও, হিন্দু নও, মুসলমান নও, তুমি মানুষ—তুমি সত্য।

মহাত্মা গান্ধীজী ধরিয়াজেন এই মহা সত্যকে, তাই আজ বিক্ষুব্ধ জনসম্মুখ তাঁহাকে ঘিরিয়া এমন আনন্দের নাচ নাচিতেছে। তোমরা রাজনীতিক বুদ্ধি-তর্কের চটক দেখাইয়া লেখাপড়া-শেখা ভণ্ডদের মুঞ্চ করিতে পার, কিন্তু অমন ডাকটি আর ডাকিতে পারিবে না। আমরা বলি কি, সর্বপ্রথমে আমাদের মধ্য হইতে এই ছুঁৎমার্গকে দূর কর দেখি, দেখিবে তোমার সকল সাধনা একদিন সফলতার পুষ্পে পুষ্পিত হইয়া উঠিবে। হিন্দু মুসলমানকে ছুঁইলে তাঁহাকে স্নান করিতে হইবে, মুসলমান তাঁহার খাবার ছুঁইয়া দিলে তাহা তখনই অপবিত্র হইয়া যাইবে, তাঁহার ঘরের যেখানে মুসলমান গিয়া পা দিবে সেস্থান গোবর দিয়া (!) পবিত্র করিতে হইবে, তিনি যে আসনে বসিয়া হুকু খাইতেছেন, মুসলমান সে আসন ছুঁইলে তখনই হুকু জলটা ফেলিয়া দিতে হইবে,—মনুষ্যত্বের কি বিপুল অবমাননা ! হিংসা, ঘৃণা, জাতিগত রেষা-বৈষ্যের কি সাংঘাতিক বীজ বপন করিতেছ তোমরা ! অথচ মঞ্চে দাঁড়াইয়া বলিতেছ, ‘ভাই মুসলমান এস, ভাই ভাই এক ঠাই, ভেদ নাই ভেদ নাই !’ কি ভীষণ প্রতারণা ! মিথ্যার কি বিস্তীর্ণ মোহজাল ! এই দিয়া তুমি একটা অথচ জাতি গড়িয়া তুলিবে ? শুনিয়া শুধু হাসি পায়। এসো যদি পার, তোমার স্বধর্মে প্রাণ হইতে নির্ভীক রাখিয়া আকাশের মত উদার অসীম প্রাণ লইয়া এসো ! এসো তোমার সমস্ত সামাজিক বাধাবিলম্ব ছুঁপায়ে

দলিয়া মানুষের মত উচ্চ শিরে তোমার মুক্তবিথার নান্দা মনুষ্যত্ব
লইয়া । এসো, মানুষের বিরাট বিপুল বন্ধ লইয়া । সে মহা-আহ্বানে
দেখিবে আমরা হিন্দু মুসলমান ভুলিয়া যাইব । আমাদের এই
তরুণের দল লইয়া আমরা আজ কালপাহাড়ের দল সৃষ্টি করিব ।
আমরাই ভারতে আবার অখণ্ড জাতি গড়িয়া তুলিব । যে রক্ষণশীল
বৃদ্ধ এতটুকু ‘টুঁ’ করিবে, তাহার গর্দান ধরিয়া এই মুক্তির দিনে বাহির
করিয়া দাও । যে আমাদের পথে দাঁড়াইবে, তাহার টুঁটি টিপিয়া
মারিয়া ফেল । শুধু মানুষ বাঁচিয়া থাক ভাই,—ভারতে শুধু
চিরকিশোর মানুষেরই জয় হউক !

উপেক্ষিত শক্তির উদ্বোধন

‘হে মোর দুর্ভাগ্য দেশ ! যাদের করেছ অপমান

অপমানে হতে হবে তাদের সবার সমান !’ —রবীন্দ্রনাথ

আজ আমাদের এই নূতন করিয়া মহাজাগরণের দিনে আমাদের সেই শক্তিকে ভুলিলে চলিবে না—যাহাদের উপর আমাদের দশ আনা শক্তি নির্ভর করিতেছে, অথচ আমরা তাহাদিগকে উপেক্ষা করিয়া আসিতেছি। সে হইতেছে, আমাদের দেশের তথা-কথিত ‘ছোট লোক’ সম্প্রদায়। আমাদের আভিজাত্য-গর্বিত সম্প্রদায়ই এই হতভাগাদের এইরূপ নামকরণ করিয়াছেন। কিন্তু কোন যন্ত্র দিয়া এই দুই শ্রেণীর লোকের অন্তর যদি দেখিতে পারি, তাহা হইলে দেখিবে, ঐ তথাকথিত ‘ছোটলোক’-এর অন্তর কাচের ন্যায় স্বচ্ছ, এবং ঐ আভিজাত্য-গর্বিত ভোমাদের ‘ভদ্রলোকের’ অন্তর মসীময় অন্ধকার। এই ‘ছোট লোক’ এমন স্বচ্ছ অন্তর, এমন সরল মুক্ত উদার প্রাণ লইয়াও যে কোন কার্য করিতে পারিতেছে না, তাহার কারণ এই ভদ্র সম্প্রদায়ের অত্যাচার। সে বেচারী জন্ম হইতে এই ঘৃণা, উপেক্ষা পাইয়া নিজেকে এত ছোট মনে করে, সঙ্কোচ জড়তা তাহার স্বভাবের সঙ্গে এমন ওতপ্রোতভাবে জড়াইয়া যায় যে, সেও যে আমাদেরই মত মানুষ—সেও যে সেই এক আল্লাহ্-এর সৃষ্টি, তাহারও যে মানুষ হইবার সমান অধিকার আছে,—তাহা সে একেবারে ভুলিয়া যায়। যদি কেউ এই উৎপীড়নের বিরুদ্ধে বিদ্রোহাচরণ করে, অমনি আমাদের ভদ্র সম্প্রদায় তাহার মাথায় প্রচণ্ড আঘাত করিয়া তাহাকে অজ্ঞান করিয়া ফেলে। এই হতভাগাদিগকে—আমাদের এই সত্যিকার মানুষদিগকে আমরা এই রকম অবহেলা করিয়া চলিয়াছি বলিয়াই আজ আমাদের এত অধঃপতন ; তাই আমাদের দেশে জনশক্তি

বা গণতন্ত্র গঠিত হইতে পারিতেছে না। হইবে কিরূপে? দেশের অধিবাসী লইয়াই ত দেশ এবং ব্যক্তির সমষ্টিই ত জাতি। আর সে দেশকে, সে জাতিকে যদি দেশের, জাতির সকলে বুঝিতে না পারে, তবে তাহার উন্নতির আশা করা আর আকাশে অট্টালিকা নির্মাণের চেষ্টা করা একই কথা। তোমাদের এই আভিজাত্য-গর্বিত, ভণ্ড, মিথ্যুক ভদ্র সম্প্রদায় দ্বারা—(যাহাদের অধিকাংশেরই দেশের, জাতির প্রতি সত্যিকার ভালবাসা নাই) মনে কর কি দেশ-উদ্ধার হইবে, জাতি-গঠন হইবে? তোমরা ভদ্র সম্প্রদায়, মানি, দেশের দুর্দশা, জাতির দুর্গতি বুঝ, লোককে বুঝাইতে পার এবং ঐ দুর্ভাগ্যের কথা কহিয়া কাঁদাইতে পার, কিন্তু কার্যক্ষেত্রে নামিয়া কার্য করিবার শক্তি তোমাদের আছে কি? না, নাই। এ কথা যে নিরেট সত্য, তাহা তোমরাই বুঝ। কাজেই তোমাদের এই দেশকে, জাতিকে উন্নত করিবার আশা ঐ কথাতেই শেষ হইয়া যায়। কিন্তু যদি একবার আমাদের এই জনশক্তিকে উদ্বুদ্ধ করিতে পার, তাহাদিগকেও মানুষ বলিয়া ভাই বলিয়া কোল দিবার তোমার উদারতা থাকে, তাহাদিগের শক্তির উন্মেষ করিতে পার, তাহা হইলে দেখিবে, তুমি শত বৎসর ধরিয়া প্রাণপণে চেষ্টা সত্ত্বেও যে কাজ করিতে পারিতেছনা, একদিনে সেই কাজ সম্পন্ন হইবে। একথা হয়ত তোমার বিশ্বাস হইবে না, কিন্তু এই সে-দিনকার সত্যাপ্রহ, হরতালের কথা মনে কর দেখি,—একবার মহাত্মা গান্ধীর কথা ভাবিয়া দেখ দেখি! তিনি আজ ভারতে কি অসাধ্য সাধন করিতে পারিয়াছেন!

তিনি যদি এমনি করিয়া প্রাণ খুলিয়া ইহাদের সহিত না মিশিতেন, ইহাদের সুখ দুঃখের এমন করিয়া ভাগী না হইতেন, ইহাদিগকে যদি নিজের বুকের রক্ত দিয়া, তাহারা খাইতে পাইল না বলিয়া নিজেও তাহাদের সঙ্গে উপবাস করিয়া ইহাদিগকে নিতান্ত আপনাত্মক করিয়া না তুলিতেন, তাহা হইলে আজ তাঁহাকে কে মানিত? কে তাঁহার কথায় কর্ণপাত করিত? কে তাঁহার একটি

ইঙ্গিতে এমন করিয়া বুক বাড়াইয়া মরিতে পারিত ? তাঁহার আভিজাত্য-গৌরব নাই, পদ-গৌরবের অহঙ্কার নাই, অনায়াসে প্রাণের মুক্ত উদারতা লইয়া তোমাদের ঘৃণ্য এই 'ছোটলোক'কে বক্ষে ধরিয়া ভাই বলিয়া ডাকিয়াছেন,—সে আত্মানে জাতিভেদ নাই, ধর্মভেদ নাই, সমাজভেদ নাই,—সে যে ডাকার মত ডাক,—তাই নিখিল ভারতবাসী, এই উপেক্ষিত হতভাগারা তাঁহার দিকে এত হা হা করিয়া ব্যগ্রবাহু মেলিয়া ছুটিয়াছে। হায়, তাহাদের যে আর কেহ কখনও এমন করিয়া এত বুকভরা স্নেহ দিয়া আহ্বান করেন নাই। এ মহা-আত্মানে কি তাহারা সাড়া না দিয়া পারে ? যদি পার, এমনি করিয়া ডাক, এমনি করিয়া এই উপেক্ষিত শক্তির বোধন কর—দেখিবে, ইহারাই দেশে যুগান্তর আনিবে, অসাধ্য সাধন করিবে। ইহাদিগকে উপেক্ষা করিবার, মানুষকে মানুষ হইয়া ঘৃণা করিবার তোমার কি অধিকার আছে ? ইহা ত আত্মার ধর্ম নয়। তাহার আত্মা তোমার আত্মার মতই ভাস্বর, আর একই মহা আত্মার অংশ। তোমার জন্মগত অধিকারটাই কি এত বড় ? তুমি যদি এই চণ্ডাল বংশে জন্মগ্রহণ করিতে, তাহা হইলে তোমার মত ভদ্রলোকদের দেওয়া এই সব হত্যাদর উপেক্ষার আঘাত, বেদনার নির্মমতা একবার কল্পনা করিয়া দেখ দেখি—ভাবিতে তোমার আত্মা কি শিহরিয়া উঠিবে না ?

আমরা ভারতবাসীরাই শুধু আত্মার এত অবমাননা করিতে সাহস করি, আর তাই আমাদের এই শোচনীয় অধঃপতন,—তাই বিশ্বে মাথা তুলিয়া দাঁড়াইবার আমাদের স্থান নাই। এই আত্মার অপমানে যে সেই অনাদি অনন্ত মহা-আত্মারই অপমান করা হয়। ভয়ে অঙ্গ শিহরিয়া উঠে না কি ? খোদার সৃষ্টি—তাঁহার আনন্দের বিকাশ স্বরূপ এই মানুষকে ঘৃণা করিবার অধিকার তোমায় কে দিয়াছে ? তোমাকেই বা বড় হইবার অধিকার কে দিয়াছে, তুমি কিসের জন্ত ভদ্র বলিয়া মনে কর ? এ সব যে তোমারই নিজের সৃষ্টি,—খোদার উপর খোদাকারি। এ মহা-অপরাধের মহা শাস্তি হইতে তোমার রক্ষা নাই—রক্ষা নাই।

মানুষের প্রতি এই যে হিংসা দ্বেষ, তোমার দেশের, গাঁয়ের প্রতিবেশী ভাইদের প্রতি এই যে অকারণ ঘৃণা, আক্রোশ, ইহাই তোমার মুখের বর্ণ কালো করিয়া দিয়াছে—তোমার চেহারায় কালি ছড়াইয়া দিয়াছে। মরিতে ত বসিয়াছ,—যদি এখনও এই মৃত হতভাগ্যদের হাত ধরিয়া না উঠিয়া একা উঠিতে যাও, তবে আরো মার খাইয়া মরিবে। কিসের পতিত ইহারা? ইহাদের প্রাণ যত উন্মুক্ত—ইহাদের অন্তর যেমন সরল,—তুমি কি সে রকম হইতে পারে? হইতে পারে অশিক্ষিত সে, কিন্তু ইহার প্রাণ তোমার চেয়ে অনেক বড়, সে প্রাণে বিরাট বিপুল শক্তি-সিংহ সুপ্ত হইয়া রহিয়াছে,—যদি পার সেই শক্তিকে জাগাও।

আমাদের এই পতিত, চণ্ডাল, ছোটলোক ভাইদের বুকে করিয়া তাহাদিগকে আপন করিয়া লইতে, তাহাদেরই মত দীন বসন পরিয়া, তাহাদের প্রাণে তোমারও প্রাণ সংযোগ করিয়া উচ্চশিরে ভারতের বুকে আসিয়া দাঁড়াও, দেখিবে বিশ্ব তোমাকে নমস্কার করিবে। এস, আমাদের উপেক্ষিত ভাইদের হাত ধরিয়া আজ ভারত-বেদীর সামনে দাঁড়াইয়া বোধন-বাঁশীতে সুর দিই—

‘কিসের ছুঃখ, কিসের দৈন্য, কিসের লজ্জা, কিসের ক্লেশ!’

মুখবন্ধ

খুব সোজা করিয়া বলিতে গেলে নন-কো-অপারেশন হইতেছে বিছুটি বা আলকুসী, এবং আমলাতন্ত্র হইতেছেন ছাগল। ছাগলের গায়ে বিছুটি লাগিলে যেমন দিগ্বিদিক জ্ঞানশূন্য হইয়া ছুটাছুটি করিতে থাকে, এই আমলাতন্ত্রও তেমন অসহযোগিতা-বিছুটির জ্বালায় বে-সামাল হইয়া ছুটাছুটি আরম্ভ করিয়া দিয়াছেন। কিছুতেই যখন জ্বলন ঠাণ্ডা হয় না, তখন ছাগ বেচারী জলে গিয়া লাফাইয়া পড়ে, দেওয়ালে গা ঘসিতে থাকে, উন্টো ঘসাঘসির চোটে তাহার চামড়াটি দিব্যি ক্ষৌরকর্ম করার মতই লোমশূন্য হইয়া যায়। আমলা-তন্ত্রের গায়েও বিছুটি লাগিয়াছে এবং তাই তিনি কখনো জলে নামিতেছেন, কখনো ডাঙায় ছুটিতেছেন, আর কখনো বা দেওয়ালে গা ঘেসড়াইয়া খামকা নিজেরই মুনছাল তুলিতেছেন। তবু কিন্তু জ্বলন আর থামিতেছে না, বরং ক্রমেই বাড়িতেছে। এখন এই আমলাতন্ত্রের ল্যাজের ডগা হইতে মাথার চুল পর্যন্ত সমস্ত কিছুই এত অস্বাভাবিক রকমের বিপর্যস্ত হইয়া গিয়াছে যে, তাহা দেখিলে হাসিও পায় কান্নাও আসে। ‘ইহা যেন বহরমপুর বা কসৌলি প্রেরণের পূর্ব লক্ষণ। একটা গান আছে, ‘ও যার কপালে আগুন ধরে, তার নাইক কোথাও সুখ, ব্রহ্মাও বিমুখ ছুখের উপর ছুখ দাও তারে।’ বাস্তবিক এখন এই রাজতন্ত্র ওফে’ আমলাতন্ত্র মশাই-এর ‘অমিয়া সাগরে সিনান করিতে সকলি গরল ভেল!’ কেননা অদৃষ্টের ফেরে যাহা কিছু ভাল বুঝিয়া করিতে যাইতেছেন, তাহাই মন্দ হইয়া পড়িতেছে। কিন্তু আমরা বলি

কি, এ সমস্ত নিজেরই কর্মদোষ। কেহ যদি ইচ্ছা করিয়া গা
চুলকাইয়া আলকুসী লাগায়, তাহার জন্য দায়ী সে নিজে।—দেশের
লোক এখন তাহাদের ঘরের অবস্থা সাদাচোখে স্পষ্ট করিয়া
দেখিতে পাইয়াছে। ঘরে যে সিঁদেল চোর ঢুকিয়াছে, এতদিনে
তাহারা তাহা টের পাইয়া চোরের টুঁটি টিপিয়া ধরিয়াছে।
এখন তাহার অপহৃত জিনিস ছাড়িয়া না দিলে সে কিছুতেই
আর টুঁটি ছাড়িবে না। চোরে-গৃহস্থে দস্তুরমত এখন এই ধস্তাধস্তি
চলিতেছে। তবে চোরের সুবিধাটা এই যে, সে বেশী জোরালো,
তার হাতে হাতিয়ারও আছে, আর গৃহস্থ বেচারার একেবারে
নিরস্ত্র। কিন্তু তাই বলিয়া কেহ তো প্রাণ থাকিতে ঘরের
জিনিস পরকে লইয়া যাইতে দিবে না। যাক্ সে সব কথা।
আমরা বলিতেছিলাম, এই আমলা বাবাজীরা এমন করিয়া আর
কতদিন ছেলে-মানুষী দেখাইবেন? তাঁহারা যে সব বুদ্ধির পরিচয়
দিতেছেন, তাহার সকলগুলির পরিচয় দিতে হইলে একটি সপ্তকাণ্ড
‘আমলায়ণ’ লিখিতে হয়। তবে সবচেয়ে ঝাঁজালো বুদ্ধিটা
দেখাইতেছেন তাঁহারা, যাহার তাহার যে-কোন সময়ে সটান মুখ
বন্ধ করিয়া দিয়া। আচ্ছা, বিবেচনা করিয়া দেখা যাউক, এই
মুখ বন্ধ করাটা কি যুক্তি সঙ্গত?

ধরুন, দুইজন লোকের মধ্যে তর্ক হইতেছে এবং তাহাদের
মধ্যে একজন বেশী বলবান; কিন্তু দুর্বল বেচারার গায়ে জোর
না থাকিলেও সে মনের জোর লইয়া বলবান প্রতিদ্বন্দ্বীকে ক্রমেই
ঘায়েল করিয়া ফেলিতেছে; ঠিক এই সময়েই অনন্যোপায় হইয়া
বলবান রাগিয়া বলিয়া উঠে, ‘চুপ রও!’ অর্থাৎ কিনা তোমার
মুখবন্ধ, তুমি কোন কথাই বলিতে পাইবে না। যাহার মনের
জোর নাই—সত্যের জোর নাই, সে-ই এমন করিয়া গায়ের
জোরে দুর্বলকে থামাইতে চেষ্টা পায়। যদি তাহার যুক্তিযুক্তরূপে
বুঝাইবার বা মনে সত্য-দাবীর জোর থাকিত, তাহা হইলে গায়ের
জোর দিয়া বুঝাইবার দরকার হইত না। যাহাদের মনে পাপ,

তাহারা বাহিরে যতই গদাই-লঙ্করি চাল দেখাক, অন্তরে তাহারা খাঁকশিয়ালীর চেয়েও ভীক। যেই তাহারা দেখে যে, অশ্রু কেউ তাহাদের আঁতে ঘা দিতেছে বা মনের পাপটাকে বাহিরে দিনের আলোতে খুলিয়া দেখিতেছে, অমনি তাহারা 'ঐ রে চিচিং ফাঁক হ'ল' বলিয়া চোঁচাইয়া চিল্লাইয়া হুমকী দেখাইয়া তাহাদের মুখবন্ধ করিতে চেষ্টা পায়। কিছুতেই না পারিলে তখন আইনের শীল-মোহর! আজকাল ছোট দারোগা সাহেব হইতে আরম্ভ করিয়া বড়লাট সাহেব পর্যন্ত সকলেই এই উপায়টাকেই 'বিপদভঞ্জন মধুসূদন' রূপে জাপটিয়া ধরিয়াছেন। কিন্তু এখন তাঁহারা ক্রমেই হতাশ হইয়া পড়িতেছেন! কেননা ইহাতে উক্ত শ্রীমধুসূদন প্রসন্ন হইয়া ক্রমেই ভ্রুকুটী-কুটিল হইয়া পড়িতেছেন! কি গেরো! 'সখি হে, কি মোর করমে লিখি?' মনে করিয়াছিলেন, এ জলে আগুন না নিভিয়া যায় না; কিন্তু তাহা না হইয়া আগুন ক্রমেই শিখা বিস্তার করিয়া বাড়িয়া চলিতেছে। 'ইহারা এই সোজা কথাটা বুঝিতেছেন না যে, জোর করিয়া একজনকে চুপ করাইয়া দিলে তাহার ঐ না কওয়াটাই বেশী কথা কয়। কারণ, তখন তাহার একার মুখ বন্ধ হয় বটে, কিন্তু তাহার হইয়া—সত্যকে, ন্যায়কে রক্ষা করিবার জন্য—আরো লক্ষ লোকের জবান খুলিয়া যায়। বাস্তব বাঁধ দিয়া কি দামোদরের স্রোত আটকানো যায়?

সেদিন চিত্তরঞ্জনকে বলিলে, 'এখানে আমার এলাকায় টু'টি করিতে পারিবে না, এমন কি এখানে 'হাঁদাইতেই' পারিবে না।' কিন্তু যেই দেখিলে অবস্থা বড় বে-গতিক, অমনি সে হুকুম বাতিল ও না-মঞ্জুর করিয়া ফেলিলে। আবার মিঃ আলী শেরওয়ানীকে আগ্রায় বক্তৃতা দিতে মানা করিয়াছ। এমন করিয়া স্ক্যাপা কুকুরের মতন করিয়া যেখানে সেখানে হাবসাইলে কি হইবে? উন্টো জনসংঘ আরো ক্ষেপিয়া পাগল হইয়া উঠিবে! যদি তোমার ক্ষমতা থাকে,, সুশীল সুবোধ বালক হও, সাধারণকে সে কথা

বুঝাইয়া দাও। তাহা না হইলে অন্তায়কে ঢাকা দিয়া রাখিতে পারিবে না—পারিবে না।

জ্ঞোর জ্বরদস্তি করিয়া কি কখনও সচেতন জাগ্রত জন-সজ্জকে চূপ করানো যায়? যতদিন ঘুমাইয়াছিলাম বা কিছু বুঝি নাই, ততদিন যাহা করিয়াছি সাজিয়াছে; এতদিন মোয়া দেখাইয়া ছেলে ভুলাইয়াছি, এখনও কি আর ও-রকম ছেলে-মানুষী চলিবে মনে কর? আমাদের বড় ভয় হয়, এ মুখ-বন্ধ আমাদের নয়, তোমাদের। আশা করি আমাদের এ ভয় মিথ্যা হইবে না!

রোজ-কেয়ামত বা প্রলয় দিন

একজন বহুদর্শী বিজ্ঞ বৈজ্ঞানিক সম্প্রতি সিদ্ধান্ত করিয়াছেন যে, আমাদের পৃথিবীর ধ্বংস (প্রলয় বা রোজ-কেয়ামত) হইবার দিন যত দূর মনে করি, বাস্তবিক ততদূর নয়। গত কয়েক বৎসর ধরিয়া যে সব আলোচনা হইয়াছে, সেই সব লইয়াই আলোচনা করিয়া দেখা যাক।

গত অর্ধ শতাব্দী ধরিয়া ইহা লক্ষ্য হইতেছে যে, দক্ষিণ পোলার প্রদেশে ভাসমান তুষারের স্তূপ ক্রমশই বৃদ্ধি পাইতেছে। এডমন্টের ক্যাপ্টেন স্মিথার্থ সর্বপ্রথম ৫৮০ ফুট উচ্চ এক তুষার স্তূপ দেখিতে পান। অতঃপর স্কট সাহেব ৬০০ ফুটেরও উঁচু এক বরফের পাহাড় দেখিতে পান। কিন্তু এজনেটার একজন নাবিক সমুদ্রের উপরেও হাজার ফুটের বেশী উচ্চ এক পর্বতপ্রমাণ বরফ স্তূপ আবিষ্কার করেন এবং তাহাতে সমস্ত পৃথিবী চমকিত হইয়া যায়। পরে নির্ধারিত হয় যে, এই তুষার পর্বত ৯৬১২ ফুট পুরু অর্থাৎ পৌনে দুই মাইলেরও বেশী চওড়া।

দক্ষিণ বিষুব রেখায় অতি প্রকাণ্ড প্রকাণ্ড তুষার-পর্বত সমূহের সংখ্যা পূর্বাপেক্ষা ক্রমেই বৃদ্ধি পাইয়া চলিয়াছে। আর এই জন্যই দক্ষিণ-পোলার প্রদেশ সমূহ ভয়ানক উষ্ণ হইয়া উঠিতেছে। উত্তর দিকস্থ বহু দূরের ভাসমা তুষার স্তূপসমূহ দক্ষিণ আফ্রিকা এবং দক্ষিণ আমেরিকায় অত্যধিক শীতের সৃষ্টি করিয়াছে। এখানের শৈত্যের সঙ্গে অগ্ন্য স্থানের তুলনাই হয় না,। 'বুইনস্ এরিং' নামক স্থানে সম্প্রতি এক তুষার বৃষ্টি হইয়া গিয়াছে। এই দেশে আর কখনও তুষার-বৃষ্টি হয় নাই।

এ সবার মানে কি? প্রফেসর লুইস ও অগ্ন্যাগ্ন বড় বড় বৈজ্ঞানিকগণের মতে আমাদের পৃথিবীতে দ্বিতীয় মহাপ্লাবন বা মহাধ্বংস অতি আসন্ন। যদি সমস্ত ছনিয়াও ধ্বংস না হয়, তাহা

হইলে পৃথিবীর একাংশ যে ধ্বংস হইয়া যাইবে, তাহাতে আর সন্দেহ নাস্তি।

দক্ষিণ মেরুতে যে গগন-চুম্বী বরফের মহা আচ্ছাদন রহিয়াছে, তাহা লম্বাতে চৌদ্দ শত মাইল এবং কত শত মাইল যে পুরু তাহার ইয়ত্তাই নাই! এখন এই যে দক্ষিণ মেরুর আবহাওয়া এই রকমে ক্রমেই অসহ্য উষ্ণ হইয়া উঠিতেছে, ইহার পরিণাম কি? সকলেই জানেন বরফ গরম হইলে গলিয়া যায়। সুতরাং এখন দক্ষিণ মেরুর এই অত্যধিক উষ্ণতার দরুণ সেখানের ঐ সহস্র সহস্র যোজন ব্যাপী তুষারের মহাপর্বত সমূহ ভাঙ্গিয়া গলিয়া যাইবে, এবং আকাশ-সমান সচল হিমালয়ের মত তরঙ্গের রাশি চতুর্দিক ধুইয়া মুছিয়া লইয়া যাইবে। প্রথমে এই মহা-প্লাবনে আক্রান্ত হইবে পৃথিবীর ঢালু দিক অর্থাৎ দক্ষিণ মহাদেশ সমূহ।

পুরাকালে আমাদের পূর্বপুরুষগণ ধূমকেতুকে ভয়ানক ভয় করিতেন, কেননা তাঁহারা জানিতেন না যে, ধূমকেতু কি। আমাদের পরবর্তী পিতাগণ এ সম্বন্ধে বেশী জানিয়াছিলেন, কিন্তু তাঁহারাও ধূমকেতুকে অত্যন্ত ভয় করিতেন ও অলক্ষণে মনে করিতেন। কারণ, তাঁহারা মনে করিতেন এই সব ধূমকেতুর মস্তক নীরেট, সুতরাং পৃথিবীর এত নিকটে আসার দরুণ যদি তাহার সহিত দৈবক্রমে পৃথিবীর সংঘর্ষ হইয়া যায়, তাহা হইলে সারা ছনিয়া ধ্বংস হইয়া যাইবে।

এখন আমরা জানিতে পারি, ধূমকেতু নীরেট শক্ত নয়, উহা কুয়াশার মত নীহারময়। সুতরাং যদি দৈবক্রমে এক আধটা ধূমকেতুর পৃথিবীর সাথে সংঘর্ষও হইয়া যাইত, তাহা হইলে ইহা দ্বারা পৃথিবীর কোন অংশ গভীর গর্তও হইয়া যাইত না, বা ইহা আমাদের পৃথিবীর আকর্ষণের বাহিরে ছুঁড়িয়া দিতেও সক্ষম হইত না।

কিন্তু ফ্রান্সের বিখ্যাত জ্যোতির্বিদ পণ্ডিত মঁসিয়ে ক্যামিল্লি ক্ল্যামারিয়ন সাহেব এক বিভীষিকাময় সিদ্ধান্তে উপনীত হইয়াছেন।

তাহা এই যে, ধূমকেতুর ঐ যে নীহারময় পুচ্ছ তাহা বিষাক্ত গ্যাসে ভরপুর। সেই জন্য ধূমকেতু যদি একবার পৃথিবীর সংস্পর্শে আসিতে পারে, তাহা হইলে ঐ বিষাক্ত গ্যাসে সমস্ত পৃথিবী এক নিমেষে প্রাণীশূন্য হইয়া যাইবে, তাহার রূপ রস গন্ধ চিরদিনের তরে ধুইয়া মুছিয়া সাফ হইয়া যাইবে !

ধূমকেতুর সৃষ্টির রাসায়নিক ব্যাখ্যা এখনও সম্পূর্ণরূপে বোঝা যায় নাই, কিন্তু ইহা সুহজে সকলে বুঝিতে পারেন যে, ধূমকেতু ইহার পুচ্ছ নিশ্চয়ই গ্যাস ভরিয়া রাখে। এই গ্যাস অনায়াসে আমাদের পৃথিবীর বাতাস হইতে যবক্ষারজান শুষিয়া লইতে পারে ; এবং তাহা হইলে যেদিকে যাও সেই দিকেই মরণ আর কি ! সাধে কি আমাদের পূর্বপুরুষগণ এই জিনিষটাকে এত অপছন্দ করিতেন ! কথায় বলে, ‘ধূমকেতুর মত সে এসে আমার অদৃষ্টে উদয় হ’ল।’ পৃথিবীর অদৃষ্টেও ধূমকেতু বাস্তবিকই অলক্ষ্যে বা অমঙ্গলজনক।

যাক, যদি ইহা যবক্ষারজান বাতাস হইতে শুষিয়া লয়, তাহা হইলে আমরা শুধু অক্সিজেন বা অক্সিজান বাষ্পই পাইব। সত্য বটে যে, অক্সিজান বাষ্প রক্ত সঞ্চালন এবং মানসিক ও শারীরিক কর্মপটুতা বৃদ্ধি করে, কিন্তু তাই বলিয়া শুধু অক্সিজান বাষ্প আবার ভয়ানক মারাত্মক। সুতরাং নিশ্বাস গ্রন্থাসে শুধু উত্তেজক অক্সিজান বাষ্প পাইয়া আমাদের শরীর ক্রমেই উত্তপ্ত হইয়া উঠিবে এবং ক্রমে আমরা জ্বলিয়া পুড়িয়া ছারখার হইয়া যাইব।

কয়লা-যুগের সময় এই পৃথিবীর বাতাস কার্বনিক এসিডের দরুণ ভারী ছিল। সে সময় সে বাতাস মাছুষে সহ্য করিতে পারিত না। কেবল মৎস্য ও সরীসৃপ জাতীয় জীববৃন্দ শ্রোতময় জলাভূমিতে ও নিশ্চল বাতাসে বাঁচিয়া ছিল। ক্রমশঃ উদ্ভিদ ও গাছ-গাছড়ার বিপুল বৃদ্ধির সঙ্গে সঙ্গে ঐ বিষাক্ত নিশ্চল বাতাস দূর হইয়া যাইতে লাগিল, আকাশ পরিষ্কার হইল এবং এইরূপে এই বাতাস উষ্ণ রক্তময় জীবের উপযোগী হইয়া উঠিল।

বর্তমানে মানব জাতির কয়লা খনন কার্যে ও তাহার সাহায্য গ্রহণে বিঘ্নম্‌ ব্যস্ত। এই কয়লা কখনকার জানেন কি? ইহা ঐ বহু লক্ষ যুগ পূর্বের কার্বনিক এসিড-ভরা বাতাসের কালের এবং এই কয়লা সেই সময়কার গাছ-গাছড়ারই পরিণতি হইতে পারে, কেননা বনের গাছ-গাছড়াই এখনো ঐ কার্বনিক এসিড শোষণ করিতে ওস্তাদ।

প্রত্যেক কয়লার চাপ ও প্রত্যেকটি দেশল্লাই যাহা জ্বালানো হয়, তাহা প্রত্যহ আমাদের দরকারী অম্লজান বাষ্প নিঃশেষ করিতেছে।

একজন বিখ্যাত ইংরেজ বৈজ্ঞানিক সম্প্রতি ঘোষণা করিয়াছেন যে, জগতের অম্লজান ক্রমশঃই নিঃশেষিত হইয়া যাইতেছে, এবং বাতাসও সেই জন্ম ক্রমেই কলুষিত হইয়া উঠিতেছে, সুতরাং সেদিন আগতপ্রায়—যেদিন পৃথিবীর সমস্ত কিছু কার্বনিক এসিডময় যুগের জীবে পরিণত হইয়া যাইবে।

মানুষ ক্রমেই ক্ষুদ্র ও দুর্বল হইতে হইতে শেষে লিলিপুটিয়ানদের মত হইয়া পড়িবে, তারপর একেবারেই নেস্তনাবুদ! তারপর আদির মতই অন্ত! অর্থাৎ প্রথমে যেমন মৎস্য আর সরীসৃপ জাতিই ছিল, পরেও তেমনি য্যা প্রকাণ্ড প্রকাণ্ড মহা-মৎস্য আর মহা-সরীসৃপ অবতারগণ বহাল খোশ তবিয়েতে বিরাজ করিবেন।

প্রাগৈতিহাসিক যুগের খুব সরু লম্বা ঘৃণ্য সরীসৃপ জাতিও—যেমন কি কঁচো সাপ ইত্যাদি—প্রচুর পরিমাণে আবার আমাদের চিপেয় রাজত্ব করিবে।

যদি মানবজাতি বর্তমানের এই অনিষ্টকারী কয়লার মহা খরচা ছাড়িয়া দেয় (শুধু কয়লা জ্বালানোর জন্মই বৎসরে ১৬০০ মিলিয়ন টন অম্লজান বাষ্প নষ্ট হইতেছে।) এবং তৎপরিবর্তে ইলেকট্রিক দিয়া কয়লার কাজ চালাইয়া লয়, তাহা হইলে আমাদের আবার আর এক নূতন বিপদের মুখ-গহবরে পড়িতে হইবে! অর্থাৎ যদি কেই যাও, নিশ্চয়ই মরিতে হইবে। জলে কুমীর, ড্যাডায় বাঘ!

আগে হইতে আবহাওয়ার ক্রম-পরিবর্তন পরিলক্ষিত হইতেছে। বজ্রাঘাত—বিশেষ করিয়া শীতকালে বজ্রপতন—ক্রমশঃই বৃদ্ধি পাইতেছে, আর ইহার একদম সোজা কারণ রহিয়াছে যে, পৃথিবীর আর বাতাসের ইলেকট্রি সিটি ঠোকাঠুকির দরুনই এই বজ্র উৎপাতের সৃষ্টি। তাহা হইলে কঃ পন্থা? সেই জন্তই বুঝি পান্নাময়ী আগে হইতেই গাহিয়া রাখিয়াছে, ‘মরিব মরিব সখি, নিশ্চয়ই মরিব !!’

আচ্ছা ধরুন, যদি বায়বীয় ইলেকট্রি সিটির উপরে বর্তমান অপেক্ষা শত বা সহস্র গুণ ভার চাপানো হয়, তাহা হইলে আর কি বসন্তে ফুল ফুটিবে—কচি পাতা গজাইবে? আর কি তবে বর্ষার ব্যাকুল বরিষণ পৃথিবীর বক্ষ সিক্ত করিবে? না গো না! তার বদলে বজ্র-পতনই হইবে আমাদের পৃথিবীতে নিত্যনৈমিত্তিক ঘটনা। রোজ শত শত বজ্রপাতে পৃথিবী ছিন্না ভিন্না হইয়া যাইবে। একজন ধুরন্ধর উচ্চাত্ত্ববিৎ বৈজ্ঞানিক বলিতেছেন, হাঁ হাঁ, তাহাই হইবে অবশেষে! কি ভয়ানক! আমাদের এখন উচিত যে, আমরা সবাই মিলিয়া প্রাণপণে চক্ষু বুজিয়া বিশ্বাস করি, ও-ভদ্রলোকের কথা মিথ্যা এবং তিনি ভুল বুঝিয়াছেন! ঐ যে আমাদের আলোকদাতা সবিতা সূর্য্যি মামা,—উনি শুধু যে আলো আর উষ্ণতারই সৃষ্টি করেন তা নয়, তিনি ইলেকট্রিক শক্তিরও জনক। আর এই আমাদের একমাত্র মামা যিনি প্রকৃতির এই প্রেহেলিকাময় অজানা শক্তির সামঞ্জস্য রক্ষার জন্ত সব দিক সমঝাইয়া চলিবেন! মামা জীবতু!

বর্তমান সূর্য্যিমামার ক্ষমতা এত উগ্র প্রচণ্ড যে, যদি এঁর সমস্ত রশ্মি আর উগ্রতা শুধু আমাদের এই গরীব পৃথিবীর উপর আসিয়া পড়িত তাহা হইলে মাত্র দেড় মিনিটের মধ্যেই ঐ যে আগে মহামহা বরফ পর্বতের কথা বলিয়াছি, সে সমস্তই গলিয়া টগবগ করিয়া ফুটিত। এবং আর এগারো সেকেণ্ড থাকিলে দুনিয়ার এত বড় সমুদ্র, সমস্ত শুকাইয়া ফাটিয়া চৌচির হইয়া হাঁ করিয়া থাকিত।

কিন্তু সূর্য্যিমামাও দিন দিন সঙ্কুচিত হইয়া ছোট হইয়া চলিয়াছেন। দৈনিক কতটুকু করিয়া যে তাঁহার বর-বপুর সঙ্কোচন

হইতেছে তাহা এখনো জানা যায় নাই। প্রফেসর বার্ণস্ জোরেস সঙ্গে বলেন যে, সূর্যমামার এই সংকোচন বড় জোরেই চলিতেছে। এত জোরে যে আমরা তাহার একটা মোটামুটি ধারণাও করিতে পারি না। অতি অল্প কালের মধ্যেই সূর্যের উত্তাপের কম্টি দেখিয়া বুঝিতে পারিব যে, সত্যি সত্যিই সূর্য ছোট হইয়া যাইতেছে কি না।

এইরকম ক্ষুদ্রাদপি ক্ষুদ্র হইতে সূর্য-মামা পটল তুলিবেন, অর্থাৎ তাহার আর অস্তিত্বই থাকিবে না, তখন যে ছদ্দশা হইবে পৃথিবীর, তাহার চিন্তাও মহা-ভয়াবহ! যত জলু জমিয়া একেবারে পাথরের চেয়েও শক্ত হইয়া উঠিবে, কিন্তু দেখিতে হইবে খাসা—একে-বারে হীরের টুকরোর মতন জ্বলজ্বলে! এই যে বাতাস যাহাকে এখন দেখিতে পাওয়া যাইতেছে না, ইহা তখন বৃষ্টির মোটামোটা ফোঁটার মত হইয়া ঝড়িয়া পড়িবে। এইসব আবার গহ্বরে গহ্বরে জমিয়া কাচের চেয়েও স্বচ্ছ সরোবরে পরিণত হইবে, কিন্তু তাহাতে ঢেউ খেলিবে না, শুধু নির্বিকার, প্রশান্ত। কেননা তখন বাতাসই যে বহিবে না। সমস্ত পৃথিবী তখন নির্দয় শীতের প্রকোপে জমিয়া স্থির নিশ্চল হইয়া যাইবে। শুধু নীহারিকা আর অল্পষ্ট কুয়াসা!

সূর্য আস্তে আস্তে রক্তবর্ণ হইয়া উঠিবে, আবার সারাদিন অম্নি রক্তবর্ণ থাকিবে। ঠিক যেন আধ-নির্বাপিত একটা জ্বলন্ত গলিত লৌহপিণ্ড! দিনেই তখন সমস্ত আকাশ আরো উজ্জল তারায় ভরিয়া উঠিবে! আল্লা-হ আক্বর!

বাঙালীর ব্যবসাদারী

‘বাণিজ্যে বসতে লক্ষ্মী’ কথাটা যেমন দিনের মত সত্য, ‘বাণিজ্যে বসতে মিথ্যা’ কথাটা তেমনি রাতের মতই অন্ধকার। শিল্প বাণিজ্যের উন্নতি না করিতে পারিলে জাতির পতন যেমন অবশ্যজ্ঞাবী, সত্যের উপর ভিত্তি প্রতিষ্ঠিত না করিলে বাণিজ্যের পতনও আবার তেমনি অবশ্যজ্ঞাবী। মদকে মদ বলিয়া খাওয়ানো তত দোষের নয়, যত দোষ হয় মদকে দুধ বলিয়া খাওয়ানোতে। দুধের সঙ্গে জল মিশাইয়া বিক্রী করিলে লাভ হয় যত, প্রবঞ্চনা করার পাপটা হয় তার চেয়ে অনেক বেশী। একটা জাতি ব্যবসা-বাণিজ্য দ্বারা যত বড় হয় হউক, কিন্তু প্রবঞ্চনা বা মিথ্যার বিনিময়ে যেন তাহার জাতীয় বিশ্বস্ততা আর সুনাম বিক্রী করিয়া সে ছোট না হইয়া বসে। ভণ্ড লক্ষপতি অপেক্ষা দরিদ্র তপস্বী ঢের ভালো। হাঁ, এখন কথা হইতেছে—বাণিজ্য দ্বারা আমরা স্বজাতির নাম করিব, স্বদেশের মুখ উজ্জ্বল করিব, না—অন্য বড় জাতির নাম দিয়া নিজের নাম ভাঁড়াইয়া বড় হইয়া সেই বড় জাতিরই তেলা মাথায় তেল ঢালিব? কথাটা একটু খোলসা করিয়া বলি।

আমাদের বাঙালীদের হিন্দু মুসলমান অনেকেই ব্যবসা বাণিজ্যের দিকে বেশ একটু ঝোঁক দিয়াছেন, সেটা খুব মঙ্গলের কথা। তবে ইহার মধ্যে অমঙ্গলের কথা হইতেছে এই যে, ইহাদের অনেকেই নিজের বা স্ব-জাতির নাম ভাঁড়াইয়া ইংরাজী নামে নিজের নূতন নামকরণ করিতেছেন! কি সুন্দর মৌলিকতা! যিনি ঋতুটা না করেন, তিনি আবার নিজের পৈতৃক নামটাকে বিপুল গবেষণার সহিত বহু কসরৎ করিবার পর এমন একটা অস্বাভাবিক অশ্ব ডিঙ্গে পরিণত করিয়া বসেন, যাহা আমাদের পূর্ব বা পরপুরুষের কোন ব্যক্তিই বুঝিতে পারিবেন না, ইনি किनि! এইরূপে কৃষ্ণকে ক্রিষ্টো রূপে বাজারে বসাইয়া কতটা সুবিধা হয় জানি না, কিন্তু আমাদের

বিশ্বাস, ইহাতে অশুবিধাটাই হয় বেশী। শুনিয়াছি, এই রকম কাল চামড়ায় সাদা পালিশ বুলাইলে নাকি ছই একজন শ্বেতদ্বীপবাসী বা বাসিনী ভুলক্রমে ঐ দোকানে গিয়া উপস্থিত হন এবং তাঁহাদের মধ্যে যঁাহারা আসল ব্যাপার বুঝিতে পারেন না, তাঁহারা সম্ভ্রষ্টচিত্তেই সওদা করিয়া চলিয়া যান; কিন্তু প্রতারণা ধরা পড়িলে যে আবার অনেকে মুখের উপরেই দোকানদারকে প্রবঞ্চক ভণ্ড বলিয়া মধুর সম্ভাষণে আপ্যায়িত করেন, এটাও সত্য! অনেকে ভদ্রতার খাতিরে বাহিরে কিছু না বলিলেও মনে মনে দেশীয় দোকানদারের এই ক্ষুদ্রত্বের নিন্দা না করিয়া পারেন না। আর, নাম ভাঁড়াইয়া কোন কাজ করিবার পর আসল নামটা প্রকাশ হইয়া গেলে কেহ যদি মুখের উপরেও গালাগালি করে, তাহা নির্বিকার চিত্তে হজম করা ভিন্ন কোন উপায় থাকে না। কিন্তু, দ্বারে আসল নামটা লেখা থাকিলে অন্তরের বাহিরের এ সব কোন বিড়ম্বনাই আর সহ্য করিতে হয় না। তা ছাড়া, এই রকম কালার গায়ে সাদার দাগ লাগাইয়া লাভও যে খুব বেশী হয় তাহা আমরা কিছুতেই বিশ্বাস করিতে পারি না। কারণ ইহাতে এই রকম দোকানদারগণ যেমন ছ-একটি বিদেশী খরিদদার পান, তেমনি আবার অনেকগুলি স্বদেশী খরিদদারও হারান। কেননা আমাদের দেশের শহরের সোজা বা পাড়াগাঁয়ের ভদ্র মাঝারি লোকে সহজে সাহেবের দোকান মাড়াইতে চান না। ইহাদের কেহ বা ও-সব বিজাতীয় হাঙ্গামের মধ্যে যাইতে চান না, কেহ বা স্বদেশী দোকানেই জিনিস কিনিতে ভালোবাসেন, আবার কেহ বা নানান দিক দিয়া নিজের দীনতা ধরা পরিবার ভয়েই ওসব দোকানে যান না।

আমাদের অনেক দেশীয়-লোকের আবার একটা ধারণা এই যে, সাহেবের দোকানের জিনিসের দাম দেশীয় দোকানের চেয়ে অনেক বেশী। কাজেই বেশী দামে ছই চারিটা জিনিস সাহেবদের বিক্রী করিতে পারিলেও অল্প দিক দিয়া এ সব দোকানের অনেক ক্ষতি। সাহেব খরিদদারগণ বেশী দামে দামী জিনিস কিনিলেও তাঁহারা সংখ্যায় কম। সে অশুপাতে কম-দামী জিনিসের ক্রোতা বহু দেশীয় লোকের

অপেক্ষা বেশী টাকার জিনিসও দোকানে বিক্রী হয় না। অথচ, যদি দেশীয় দোকানদার বানিজ্যে পসার করিয়া একবার সুনাম অর্জন করিতে পারেন, তাহা হইবে বহু বিদেশী বা সাহেব-খরিদার আপনিই জুটিয়া যাইবে। এই ধরুন, আমাদের বটকুঞ্চ পালের কথা। ইনি অনায়াসেই নিজের পৈতৃক নাম কাটছাঁট করিয়া অন্ততঃ ‘মটোক্রিষ্টো পল’ হইতে পারিতেন। কিন্তু তাহাতে তাঁহার ব্যবসায়ে যদিই বা পসার হইত, কিন্তু সকলের নিকট এত নাম হইত না, এবং আমরাও গর্বের সহিত একজন বাঙালী ব্যবসায়াজিজ্ঞ লোকের নাম যেখানে সেখানে উদাহরণ স্বরূপ পেশ করিতেও পারিতাম না। বে-নামীতে যে ছ-একজন বাঙালী ব্যবসাদার বেশ একটু পসার করিয়াছেন, তাঁহাদের আমরা বাঙালী বলিতে সন্কোচ করি, লজ্জা হয়। কেননা তাঁহারা নিজেই সর্বপ্রথমে নিজের বাঙালীত্ব অস্বীকার করিয়াছেন! কাজেই ইহারা হইয়া পড়িয়াছেন বাহুড়ের মতন—না পাখী না পশু!

তাহা ছাড়া, ইহা আত্ম-প্রবঞ্চনা নয় কি? ইহাতে নিজেকে, দেশকে, জাতিকে ছোট করিয়া দেখা হয় না কি? নিজের কৃতিত্বে দেশের লোকের সুনামে, জাতির আত্ম-বিশ্বাসে আমাদের নিজের লোকেরাই কত বেশী হেয় ক্ষুদ্র ধারণা পোষণ করে, ইহাই তাহার প্রকৃষ্ট উদাহরণ। কেন, আমরা কি জগতের এতই ঘৃণ্য অসম্পৃশ্য জীব যে, আমাদের নিজ সত্যিকার পরিচয় লুকাইতে হইবে? আমরা কি এতই অমানুষ, এবং যাহাদের নামের দৌলতে এই জঘন্য অর্থ-লাভ তাহারা কি এত মস্তমানুষ? দেখিয়াছি, অনেকে তথাকথিত নীচ বংশে জন্ম বলিয়া নিজের পিতৃপুরুষের পরিচয় গোপন করে, কিন্তু তবু সে শাস্তি পায় কি? লোকে তাহার এই মিথ্যা মুখোसे বরং আরো টিটকারী দেয় না কি? সে নিজের অন্তরেই নিজে লজ্জাতুর ছোট হইয়া যায় না কি? তাহার চেয়ে তাহার গৌরব করিবার ছিল, যদি সে বুক ফুলাইয়া তাহার পিতৃপুরুষের পরিচয় দিয়া নিজের কৃতিত্বে আপন মনুষ্যত্বের উপর দাঁড়াইয়া বলিতে পারিত যে জন্মটা কিছুই নয়—পুরুষকারই

হইতেছে আসল জিনিস। তাহাতে তাহার নিজের অন্তরেও সে বল পাইত, আনন্দ পাইত এবং অন্তরেও তাহার নির্ভিকতার, মনুষ্যত্বের কাছে সসম্মানে মাথা নত করিত। আমরা আজ ভারতে এক অখণ্ড জাতি গড়িয়া তুলিতে চলিতেছি, আর আজো যদি আমাদের আত্ম-সম্মান না জাগে—আজো যদি আমরা আত্মবিশ্বাসে ভয় করিয়া নিজের মনুষ্যত্ব ও পুরুষকারের জোরে মাথা উঁচু করিয়া বিশ্বের মুক্ত-পথে চলিতে না পারি, তবে আমাদের জাতি-গঠন তো দূরের কথা, মুক্ত-দেশের অন্তরে এ কথা শুনিলে মাথায় টোঁকর লাগাইয়া বলিয়া দিবে যে, আগে মাথা উঁচু করে চলতে শেখো।

যাহা হইয়া গিয়াছে তাহা এখন অপরিবর্তনীয়, কিন্তু যাহাদের সাহস আছে, আত্মসম্মান আছে, জাতিকে যিনি বড় করিয়া দেখিতে পারেন, তাঁহার উচিত এখুনই এ মিথ্যা মুখোসটাকে দূর করিয়া ফেলিয়া আবার নতুন করিয়া নিজের বিশ্বাসে নিজের কৃতিত্ব, কর্ম-কুশলতা ও পৌরুষতার পূঁজি লইয়া ব্যবসাক্ষেত্রে দাঁড়ানো। তাহাতে তাঁহার নাম, তাঁহার দেশের নাম, তাঁহার জাতির নাম। আর সব চেয়ে বড় জিনিস তাঁহার নিজের অন্তরের শাস্ত পূত মহাত্মপ্তির অপূর্ব আত্মপ্রসাদের বিপুল গৌরব।

এই জাতীয়তার যুগে, এই নিম্নেকে সত্য বলিয়া জানার সাহসী কালেও ঐ পুরানো বিক্রী অভিনয়ের হেয় অনুকরণ হইতেছে বলিয়া আমরা এত কথা বলিলাম। ডোম যদি ডোম বলিয়া সসঙ্কোচে পথ ছাড়িয়া দিয়া আমাকে দীর্ঘ গোলামী সালাম ঠুঁকে, তাহা হইলে স্বতঃই তাহার প্রতি আমার একটা উঁচু নীচুর ভাব আসে, কিন্তু সে যদি ডোম বলিয়া পরিচয় দিয়া সহজ হইয়া আমার পথে মানুষের মত দাঁড়াইতে পারে, তাহা হইলে বাহিরে আমি অভ্যাসবশতঃ যতই ফুক হই, অন্তরে তাহার আত্মসম্মান ও মনুষ্যত্ব জ্ঞানকে প্রণাম না করিয়া থাকিতে পারি না। সমাজ বা জন্ম লইয়া এই যে বিক্রী উঁচু নীচু ভাব, তাহা আমাদের জোর করিয়া ভাঙিয়া দিতে হইবে।

আমরা মানুষকে বিচার করিব মনুষ্যত্বের দিক দিয়া, পুরুষকারের দিক দিয়া। এই বিশ্ব-মানবতার যুগে যিনি এমনই করিয়া দাঁড়াইতে পারিবেন, তাঁহাকে আমরা বুক বাড়াইয়া দিতেছি—তাঁহাকে নমস্কার করি !

হাঁ,—ব্যক্তিত্বের দিক ব্যতীত দেশীয় লিমিটেড কোম্পানীগণও তাঁহাদের ম্যানেজিং এজেন্টের কল্পিত ইংবেজী নাম রাখিয়া লোকের চক্ষে ধূলা দিতেছেন। কি বিশ্রী প্রতারণা ! কি ঘৃণ্য অধঃপতন !

আজ আমরা তাঁহাকেই ভাই বলিয়া আলিঙ্গন করিব, তাঁহারই পায়ের ধূলা মাথায় লইব,—তিনি মুচি, ডোম, হাড়ি যেই হউন,—যিনি মহাবীর কর্ণের মত উচ্চশিরে সর্বসমক্ষে দাঁড়াইয়া বলিতে পারিবেন, আমি স্মৃতপুত্রই হই, আর যেই হই, আমার পুরুষকারই আমার গৌরব, আমার মনুষ্যত্বই আমার ভূষণ !

আমাদের শক্তি স্থায়ী হয় না কেন ?

এ প্রশ্নের সর্বপ্রথম উত্তর, আমরা চাকুরী-জীবী। মানুষ প্রথম জন্মে তাহার প্রকৃতিদত্ত চঞ্চলতা, স্বাধীনতা ও পবিত্র সরলতা লইয়া। সে চঞ্চলতা চির-মুক্ত, সে স্বাধীনতা অবাধগতি, সে সরলতা উন্মুক্ত উদার। মানুষ ক্রমে যতই পরিবারের গণ্ডী, সমাজের সঙ্কীর্ণতা, জাতির—দেশের ভ্রান্ত গোঁড়ামি প্রভৃতির মধ্য দিয়া বাড়িতে থাকে, ততই তাহার জন্মগত মুক্ত প্রবাহের ধারা সে হারাইতে থাকে, ততই তাহার স্বচ্ছপ্রাণ এই সব বেড়ীর বাঁধনে পড়িয়া পঙ্কিল হইয়া উঠিতে থাকে। এ সব অত্যাচার সহিয়াও অন্তরের দীপ্ত স্বাধীনতা ফুটিয়া উঠিতে পারে, কিন্তু পরাধীনতার মত জীবন-হনন-কারী তীব্র হলাহল আর নাই। অধীনতা মানুষের জীবনী-শক্তিকে কাঁচা বাঁশে ঘুণ ধরার মত ভূয়া করিয়া দেয়। ইহার আবার বিশেষ বিশেষত্ব আছে, ইহা আমাদের একদমে হত্যা করিয়া ফেলে না, তিল তিল করিয়া আমাদের জীবনী-শক্তি, রক্ত-মাংস-মজ্জা, মনুষ্যত্ব, বিবেক সমস্ত কিছু জোঁকের মত শোষণ করিতে থাকে। আখের কল আখকে নিঙ্ড়াইয়া পিষিয়া যেমন শুধু তাহার শুষ্ক ছ্যাঁবা বাহির করিয়া দিতে থাকে, এ অধীনতা মানুষকে—তেমনি করিয়া পিষিয়া তাহার সমস্ত মনুষ্যত্ব নিঙ্ড়াইয়া লইয়া তাহাকে ঐ আখের ছ্যাঁবা হইতেও ভূয়া করিয়া ফেলে। তখন তাহাকে হাজার চেষ্টা করিয়াও ভালমন্দ বুঝাইতে পারা যায় না। আমাদেরও হইয়াছে তাহাই। আমাদেরকে কোন স্বাধীন-চিন্তা লোক এই কথা বুঝাইয়া বলিতে আসিলেই তাই আমরা সাফ্ বলিয়া দিই, এ লোকটার মাথা গরম !

সারা বিশ্বে বাঙ্গালীর এই যে সকল দিকেই শুনাম, কিন্তু তবুও আমরা কেন এমন দিন-দিন মনুষ্যত্ব-বঞ্চিত হইয়া পড়িতেছি ? কেন ভণ্ডামী, অসত্য, ভীরুতা আমাদের পেশা হইয়া পড়িয়াছে ? কেন আমরা কাপুরুষের মত এমন দাঁড়াইয়া মার খাই ? ইহার মূলে ঐ

এক কথা, আমরা অধীন—আমরা চাকুরীজীবী। দেখাইতে পার কি, কোন জাতি চাকুরী করিয়া বড় হইয়াছে? আমরা দশ পনের টাকার বিনিময়ে মনুষ্যত্ব, স্বাধীনতা অনায়াসে প্রভুর পায়ে বিকাইয়া দিব, তবু ব্যবসাবাণিজ্যে হাত দিব না, নিজের পায়ে নিজে দাঁড়াইতে চেষ্টা করিব না। এই জঘন্য দাসত্বই আমাদেরকে এমন ছোট হীন করিয়া তুলিতেছে। যে দশ টাকা পায় সে যদি পাড়ারগায়ে গিয়া অন্তত মুদি, ফেরিওয়ালার ব্যবসা করে, তাহা হইলেও সে বিশ পঁচিশ টাকা অনায়াসে উপার্জন করিতে পারে। ইচ্ছা থাকিলেই উপায় হয়, আদতে আমরা ইচ্ছাই করিব না, চেষ্টাই করিব না, হইবে কোথা হইতে? যে জাতির মধ্যে ব্যবসাবাণিজ্য, কৃষি শিল্প যত বেশী, সে জাতির মধ্যে স্বাধীন চিত্ত লোকের সংখ্যা তত বেশী। আর কাজেই যে জাতির জনসঙ্ঘের অধিকাংশেরই চিত্ত স্বাধীন, সে জাতি বড় না হইয়া পারে না। ব্যাপ্তি লইয়াই সমাপ্তি।

আমরা আজ অনেকটা জাগ্রত হইয়াছি, আমরা মনুষ্যত্বকে একআধটুকু বুঝিতে পারিতেছি, কিন্তু আমাদের এ মনুষ্যত্ব-বোধ, এ শক্তি স্থায়ী হইতেছে না, শুধু ঐ চাকুরী-প্রিয়তার জন্ত। সোডা-ওয়াটারের মত আমাদের শক্তি, আমাদের সাধনা, আমাদের অনুপ্রাণতা এক নিমিষে উঠিয়াই থামিয়া যায়, শোলার আগুনের মত জ্বলিয়াই নিবিয়া ছাই হইয়া যায়। আমরা যদি বিশ্বে মানুষ বলিয়া মাথা তুলিয়া দাঁড়াইতে চাই, তবে আমাদের এ-শক্তিকে, এ-সাধনাকে স্থায়ী করিতে হইবে, নতুবা ‘যে তিমিরে সে তিমিরে’! এবং তাহা করিতে হইলে সর্বপ্রথমে আমাদেরকে চাকুরী ছাড়িয়া, পর-পদলেহন ত্যাগ করিয়া স্বাধীনচিত্ত উন্নত-শীর্ষ হইয়া দাঁড়াইতে হইবে। দেখিয়াছ কি, চাকুরী জীবিকে কখনও স্বাধীনচিত্ত সাহসী ব্যক্তির মত মাথা তুলিয়া দাঁড়াইতে? তাহার অন্তরের শক্তিকে যেন নির্মম ভাবে কচলাইয়া দিয়াছে—ঐ চাকুরী, অধীনতা, দাসত্ব। আসল কথা, যতক্ষণ না আমরা বাহিরে স্বাধীন হইব, ততক্ষণ অন্তরের স্বাধীন-শক্তি আসিতেই পারে না।

কালী আদমিকে গুলি মারা

একটা কুকুরকে গুলি মারিবার 'সময়ও এক আধটু ভয় হয়, যদিই কুকুরটা আসিয়া কোন গতিকে গাঁক করিয়া কামড়াইয়া দেয় ! কিন্তু আমাদের এই কালী আদমিকে গুলি করিবার সময় সাদা বাবাজিদের সে ভয় আদৌ পাইতে হয় না। কেননা তাহারা জানে যে, আমরা পশুর চেয়েও অধম। একবার এক সাহেবের গুলির চোটে আমাদের স্বগোত্র এক কালী আদমী মারা যায়, তাহাতে সাহেব জিজ্ঞাসা করেন, 'কৌন্ মারা গিয়া ?' একজন আসিয়া বলিল, 'এক দেহাতি আদমী ছজুর !' সাহেব দিব্যি পা ফাঁক করিয়া সুস্থির নিশ্বাস ফেলিয়া বলিল, 'ওঃ, হাম সম্বা ঠা, কোই আড্‌মি !' অর্থাৎ ঐ গ্রাম্য বেচারী সাহেবের বিড়াল-চোখে মানুষই নয়। মানুষকে এত বড় ঘৃণা করিতে আর কেহ কোথাও পারে কিনা, জানিনা। ইহার পরাকর্ষ দেখানো হইয়াছে জালিয়ানওয়ালাবাগে ও অন্যান্য স্থানে। আবার এই সেদিনও তাহারই পুনরাভিনয় হইল কালী-কাটে। নিরস্ত্র জনসঙ্ঘ—যাহাদের হাতে একটু বে-মানানসই বংশধর দেখিলেও অস্ত্র-আইনের কজায় আসে, তাহাদিগের প্রতি গুলি চালাইয়া কি ঘৃণ্য কাপুরুষতাই না দেখাইতেছে এই গোরার দল ! কিন্তু এ সব বর্বরতার জন্ত দায়ী কে ?

খোদ কর্তাই নন কি ? এই 'মাকড় মারলে ধোকর হয়'-নীতিকে কি গবর্ণমেন্টই প্রোত্ৰয় দিতেছে না ? এই সব মনুষ্যত্ব-বিবর্জিত খুন-খারাবী যে যত করিতে পারিবে, তার তত পদোন্নতি, তত চাঁপরাস বৃদ্ধি সরকারের দরবারে। অথচ সাধারণকে বলা যাইতেছে, দোষ আমাদের নয়, ইত্যাদি। যদি তাই হয়, তবে এই অবাধ হত্যা—নিরস্ত্র নির্দোষ জনসঙ্ঘের উপর হাসিতে খেলিতে গুলি চালানো ব্যাপারটাকে নিবারণ করিবার জন্ত চেষ্টা করিলে গভর্ণমেন্ট তাহাতে বাধা দেয় কেন ? সাধারণের কথায় কর্ণপাত বা করে না কেন ?

এই একগুঁয়েমীর জন্মই ত আজ এমন করিয়া হিমালয় হইতে কুমারিকা পর্যন্ত একটা বিপুল কম্পন শুরু হইয়া গিয়াছে। এ ভূমিকম্পকে চাপা দিয়া রাখিবার ক্ষমতা আর স্বেচ্ছাতন্ত্রের নাই! তেত্রিশ কোটী মানুষকে অবহেলা করিয়া ঘৃণা করিয়া তিন শত লোক ভাগদিগকে চাবুক মারিবে এবং তাহারা তাহা সহিয়া থাকিবে, সে দিন আর নাই। নেহাৎ অসহ্য না হইয়া পড়িলে মানুষ বিজোহী হয় না। শান্তিপ্রিয় জনসাধারণ যে কত কষ্ট, কত যন্ত্রণায় তবে অশান্তিকে বরণ করিয়া লয়, তাহা ভুক্তভোগী ব্যতীত কেহ বুঝিবে না; এখন মনুষ্যত্ব না জাগুক, অন্ততঃ এই পশুত্বটুকুও আমাদের মনে জাগিয়াছে যে, মনুষ্যত্বের অপমান সহ্যের মত পাপ আর নাই। এ শিক্ষাও আমাদের চৈকিয়া শিখিতে হইতেছে।

আমাদের সব কথাই ভূয়ো—কর্তাদের নিমক-হালাল ছেলেগুলির কাছে। এই সেদিন মিঃ শাস্ত্রী একটা সোজা কথা লাট দরবারে পেশ করিয়াছিলেন যে, লোকগুলোকে মারিবার সময় একটু বুঝিয়া শুঝিয়া মারিও। কিন্তু চোরা না শুনে ধর্মের কাহিনী! বলা বাহুল্য, তাঁহার এ আর্জি বাতিল ও না-মঞ্জুর হইয়া গেল। কালা আদমীকে মারিবে, তাহার আবার বুঝিয়া শুঝিয়া কি? ইচ্ছা হইল, না,—বাস্, চালাও গুলি! মিঃ শাস্ত্রী সাতটি কথা পেশ করিয়াছিলেন, এবং তাহার যে-কোনটি সম্বন্ধে সরকারের অতিবড় নিমক-হালালেরও কোন কিছু বলিবার ছিল না। অন্ততঃ আমরা তাহাই মনে করিয়াছিলাম; কিন্তু ‘লোকদিগকে আগে সাবধান করিয়া দিয়া তবে গুলি ছুঁড়িবে’—উপদেশটি ব্যতীত আর প্রায় সব ক’টিই নাকচ হইয়া গিয়াছে। মিঃ শাস্ত্রীর পাণ্ডুলিপিতে মোটামুটি এই কথা ক’টি ছিল :—প্রথমে ম্যাজিষ্ট্রেটের নিকট হইতে লিখিত লুকুম লইতে হইবে। ম্যাজিষ্ট্রেট না থাকিলে পুলিশ সুপারিন্টেন্ডেন্ট লুকুম দিবেন, কিন্তু সকল দায়িত্ব তাঁহার এবং তাঁহাকে প্রমাণ করিতে হইবে যে, গুলি না চালাইলে বহু প্রাণ হানি ও ক্ষতি হইত ইত্যাদি। আরো কয়েকটি এই রকম সহজ কথা। কিন্তু কালা আদমি মারিতে এত সব বাঁধাবাঁধি নিয়ম-

কানুন ! বাপ ! বলে কি ? অতএব মিঃ শাস্ত্রীর কথা এক ফুঁয়ে উড়িয়া গেল ।

আর, শুধু এ সাদাকেই দোষ দেওয়া বৃথা । দোষ আমাদেরই । কিন্তু সে সব বলিতে গেলে সাদা দাদারা ভয়ানক রকমের চটিতং হইয়া যাইবেন এবং ক্রমান্বয়ে আমাদের মুখ বন্ধ, (হাত বন্ধ তা আছেই !) পা বন্ধ—শেষকালে কাঁচা মুণ্ডটাও খণ্ড বিখণ্ড করিয়া ফেলিবেন । ‘হুক কথায় আইনমুক রুপ্ত’—তাই আমাদের অতি সোজা কথাটাও আইন বাঁচাইয়া বাঁকাটেরা করিয়া বলিতে হয় । আজো সাদাদের এই গুলি মারা লইয়া কিছু বলিবার দরকার নাই । তবে, আমাদের ক্রন্দন ব্যর্থ হইতেছে না । এই যে মানুষের ব্যথিত মনের অভিশাপ, ইহা অন্তরে অন্তরে তোমাদিগকে পিষিয়া মারিতেছে । তোমাদের বিবেককে, মনুষ্যত্বকে বিক্ষুব্ধ করিয়া তুলিতেছে । এই গুলির সমস্ত গুলিই তোমাদেরই হৃৎপিণ্ডে ঢুকিয়া তোমাদিগকে পচাইয়া মারিবে । আমরা জাগিতেছি—আমরা বাঁচিতেছি,—তোমরা মরিতেছ, তোমরাই ধ্বংসের পথে চলিয়াছ !

শ্যাম রাখি না কুল রাখি

বিহারের শাসনকর্তা লর্ড সিংহ বাহাদুর ভয়ানক মুণ্ডকিলে পড়িয়া গিয়াছেন। ঠিক যেন সাপের ছুঁচো গেলা গোছ। ছাড়িতেও পারেন না, গিলিতেও পারেন না। সহযোগিতা-বর্জন আন্দোলন বিহারে যে রকম জোরে চলিতেছে, - সেরূপ আর কোথাও নয়। মহাত্মা গান্ধীও এই লইয়া সেদিন 'ইয়ং ইণ্ডিয়ায়' বিহারের জোর প্রশংসা করিয়াছেন। এই ব্যাপারে বিহার গবর্ণমেন্ট দস্তুর মত বে-সামাল হইয়াছেন বলিলেও অত্যাুক্তি হয় না। কেননা ইহার ছোট শাসনকর্তারা রাগের বা ভয়ের চোটে যখন যা তা করিয়া বসিতেছেন। সেদিন পুরুলিয়ার ডেপুটী কমিশনার উকিলদিগকে ধমকাইতে গিয়া অপ্রতিভের একশেষ হইয়াছেন। তারপর মহকুমায় মহকুমায়, জেলায় জেলায় ম্যাজিস্ট্রেটগণ যে রকম সৃষ্টিছাড়া হুকুম জারি করিতেছেন, তাহা দেখিয়া বুঝা যায় যে, বাস্তবিকই এবার তাঁহারা চটিয়াছেন। মদের উপকারিতা লইয়া যে সরকারী ইস্তাহার জারি হইয়াছিল, তাহার কেলেঙ্কারী আর বলিলাম না। লর্ড সিংহ বাহাদুর বড় অসময়ে লাট ও শাসনকর্তা হইয়াছেন। এখন তিনি দেশের লোকের মন যোগাইয়া চলিতে পারেন না, আবার তাঁহার অধীন বিলিতি শাসনকর্তাদিগকেও জোর করিয়া কিছু বলিতে পারেন না, পাছে তাঁহারা তাঁহার বিরুদ্ধে ধর্মঘট করিয়া বসেন! দেশের লোক এখন যাহা চায়, তাহাও যদি আবার তিনি বিনা বাধায় চলিতে দেন, তাহা হইলে তো আবার তাঁহাকে একদিনেই পাততাড়ি গুটাইতে হয়।

আর তাহা ছাড়া দেশের লোকের বর্তমান দাবী-দাওয়া পূর্ণ করাও তাঁহার ক্ষমতার বাহিরে। একটা প্রাদেশিক শাসনকর্তাকে আমরা যতটা স্বাধীন মনে করি, আসলে তিনি ততটা স্বাধীন নন। তিনিও প্রকারান্তরে শুধু তাঁহার উপরওয়ালারই হুকুম তামিল করেন, বলা যাইতে পারে। কাজেই বুঝিয়া হউক, না বুঝিয়া হউক, দেশের লোকে তাঁহার উপর বিষম চটিয়া উঠিতেছে এবং নানান রকমের টিকাটিপ্পনীও কাটিতেছে! এ হলের বিষ-জ্বালা তাঁহাকে অতি কষ্টে নীরবেই সহ্য করিতে হইতেছে, কেননা আমরা ছেলেবেলায় পড়া পাঠে পড়িয়াছি, ‘অসহ্য জ্ঞাতির বাক্য সহ্য নাহি হয়, সাপের মাথায় যেন ব্যাঙে প্রহারয়!’ কিন্তু ইহাতে তাঁহার চোখ-কষ্ট অনুভব করা উচিত নয়। কেননা সর্বপ্রথম দেশীয় শাসনকর্তা বলিয়া দেশের লোক তাঁহার নিকট অনেক কিছু আশা করিয়াছিল। কিন্তু কর্মের বা গ্রহের ফেরে সমস্ত ওলটপালট হইয়া গেল। এখন তিনি দেশের লোককে সন্তুষ্টও করিতে পারেন না এবং খুব কঘিয়া কড়া শাসন চালাইয়া তাহাদিগের মুখবন্ধ বা তাহাদের দোরস্ত করিতেও পারেন না। কেননা বেশী জোর জবর-দস্তি করিলে দেশের লোক আরো বেশী ক্ষেপিয়া উঠিবে। মানুষের চামড়া কিছু গণ্ডারের চামড়া নয়, অতএব দেশ-ভাইএর এ আঘাত হয়ত তাঁহার গায়ে দারুণ বাজিবে। আজ যদি বিহারের শাসনকর্তা কোন ইংরেজ হইতেন, তাহা হইলে হয়ত দেশবাসী বিহার লইয়া এত বেশী আলোচনা করিত না। অথবা তিনি যে প্রদেশেরই লাট হইতেন, সেই প্রদেশের শাসন ইত্যাদি ব্যাপারে দেশের লোক বেশী করিয়া চোখ রাখিত। দেশীয় শাসনকর্তার নিকট দেশভাইএর একটু বেশী অধিকারের দাবী বাড়াবাড়ি বোধ হইলেও অন্ততঃ অত্যাচ্য নয়।

এ তো গেল এদিককার কথা। অন্য পিঠ—অর্থাৎ তাঁহার অধীন ইংরেজ শাসনকর্তারা যত বেশী প্রভুভক্তি ও কর্মকুশলতাই দেখান না কেন, এদেশী ‘নেটিভ’ শাসনকর্তার অধীন হইয়া থাকিতে

তাঁহাদের মর্মস্থলে বেশ একটু বাজে এবং হিংসাও হয়। ইউরোপীয় গভর্ণর থাকিলে তাঁহারা (বিশেষ করিয়া বিহার প্রদেশ বলিয়া) অনায়াসে দেশী লোককে নেটিভ, নিগার ইত্যাদি বলিয়া এ গোলমালে খুব একচোট গালি গালাজ করিয়া গায়ের ঝাল আর রসনার চুলকনি মিটাইতেন। কিন্তু এখন আর ও রকম গালি গালাজ দিতে পারিবেন না, কেন না তাহা হইলে প্রকারান্তরে লর্ড সিংহকেই গাল দেওয়া হইবে। অথচ তাঁহারা এটুকুও বুঝিয়াছেন যে, ইউরোপীয় শাসন-কর্তার আমল অপেক্ষা তাঁহারা অধিকতর স্বাধীনভাবে এখন দেশকে শাসাইতে পারিবেন। কেননা যতই হোক দেশীয় গভর্ণর তো! তিনি কিছুতেই ইহাদের এই নীতিকে একদম বন্ধ করিয়া দিতে পারিবেন না। কেননা, তখন এই ইউরোপীয় ‘ডিমিনিউটিভ’ শাসনকর্তার দল দল বাঁধিয়া ইহার বিরুদ্ধে হৈ রৈ মার লাগাইয়া উপরওয়ালার কাণে ঝালাপালা লাগাইয়া দিবে। এই সব এবং এই রকম আরো নানান গতিকে লর্ড সিংহ বাহাদুর চূপ করিয়া ভাবিতেছেন, ‘শ্যাম রাখি কি কুল রাখি!’ তিনি এখনো প্রাণপণে ‘ত’ নোকায় পা দিয়া আছেন বলিলেই হয়। কেননা এখন তিনি হতাশ হইয়া বলিতেছেন, প্রকারান্তরে আমি গান্ধীজিকে সমর্থন করিতেছি। তাঁহার মত তোমাদের দুঃখহৃদশা দূর করাই আমার কাজ।

কিন্তু অবস্থা ক্রমেই যে রকম বিগড়াইয়া যাইতেছে, তাহাতে তাঁহার আর এ ‘ন যযৌ ন তসৌ’ ভাব চলিবে না।

আমরা তাঁহাকে আক্রমণ করিতেছি না, বরং তাঁহার এ ত্রিশঙ্কুর মত অবস্থা দেখিয়া সহানুভূতি প্রকাশ করিতেছি। দোষ তাঁহারও নয়, আমাদেরও নয়, এ দোষ বুরোক্রাসীর বা স্বৈচ্ছাতন্ত্রের।

যতক্ষণ দেশের আদত শাসনকর্তা স্বৈচ্ছাতান্ত্রিক, যতক্ষণ দেশ পরাধীন থাকে, ততক্ষণ দেশীয় ছোটখাট শাসনকর্তারা কিছুতেই লোককে সন্তুষ্ট করিতে পারেন না। আজ যদি লর্ড সিংহ ভারতের বড়লাটও হন, তাহা হইলেও তিনি দেশের জন্ত তেমন কিছু করিতে পারিবেন না। তাঁহাকে অধিকাংশ সময়েই তাঁহার বিবেক বিরুদ্ধ

কার্য করিতে হইবে। দেশীয় লোক যত বড় পদই পান, তবু তিনি যে দেশীয় বা 'নেটিভ' একথা ইংরেজ কর্তারাও ভুলিবেন না, আর তিনি নিজেও ভুলিতে পারিবেন না। আজ যদি লর্ড সিংহ একটু দেশের লোকের দিকে ঝুঁকিয়া পড়েন, তাহা হইলেই সকলে বুঝিতে পারিবেন, ইংরেজ মন্ত্রীর দল কি রকম আপিস-তাপিস করিয়া উঠেন। তখন স্পষ্টই দেখিতে পাইবেন—'এক যাত্রায় পৃথক ফল!' এ দোষ কাহারও নয় ভাই—দোষ আমাদের এই কাল চামড়ার!

লার্ট-শ্রেমিক আলি ইমাম

হায়দ্রাবাদের নিজামের প্রধান মন্ত্রী সার সৈয়দ আলি ইমাম বিলাতে গত ১১ই-মার্চ রাত্রে লর্ড এবং লেডি রিডিং-এর সম্মানার্থে এক ভোজ দিয়াছিলেন। সেই ভোজ-সভায় বক্তৃতা দিবার সময় তিনি মিঃ মণ্টেগুকে আন্তরিক কৃতজ্ঞতা ও ধন্যবাদ জানাইয়া বলেন, মিঃ মণ্টেগু ভারতের কল্যাণের জন্ত, মুক্তির জন্ত প্রবল প্রতিবন্ধক সত্ত্বেও ভীষণ যুদ্ধ (অবশ্য বাকযুদ্ধ) করিয়াছেন। লর্ড হার্ডিঞ্জ আশ্চর্য তৎপরতার সহিত গত ১৯১৪ সালের মহাবিপদের সময় ভারতীয় সৈন্যদিগকে চটপট আসরে নামাইয়া ভারতীয়দিগের ভীষণ রাজভক্তির কথা সপ্রমাণ করিয়াছেন। লর্ড রিডিং ভারতের লার্টগিরি করিতে স্বীকৃত হইয়া ব্যক্তিগত স্বার্থত্যাগের পরাকাষ্ঠা প্রদর্শন করিয়াছেন। তাঁহার এই নিঃস্বার্থ বলিদানে ভারত কৃতার্থ হইয়া যাইবে! ভারতের বর্তমানে যে সঙ্কটাপন্ন অবস্থা, তাহাতে এই রকম একজন গুণসম্পন্ন প্রতিভাবিত ইংরাজ রাজপুরুষের ভয়ানক দরকার ছিল। তিনি লর্ড রিডিংকে ভরসা দিয়া আরো বলেন যে, ভারতের জঁন্ত বা সাম্রাজ্যের মঙ্গলের জঁন্ত যাহা কিছু করিতে হইবে, তাহাতেই তিনি (না ডাকিতেই) গিয়া হাত লাগাইতে পিছপা নন।...লর্ড রিডিং প্রত্যুত্তরে বলেন, 'আমি সার আলি ইমামের সব কথা মানিয়া লইতেছি, তবে তিনি আমার যে স্বার্থত্যাগের কথা বলিয়াছেন, তাহা সত্য নয়! (ঈ্যা,—যার জঁন্তে চুরি করি, সেই বলে চোর!) যে কোন মহাপুরুষই হউন, ত্রিশ কোটি লোকের উপর হর্তাকর্তা বিধাতা হওয়াটা তাঁহার পক্ষে বড় সোজা কথা নয়। পরম করুণাময় চরম প্রসন্ন না হইলে কোন ভায়ার এ (গয়াসুরের) পাদপদ্ম লাভ হয় না। (অত্যধিক

আনন্দে 'মনে মনে' ঈশ্বরকে নমস্কার!) মস্ত বড় একটা বিরাট রকমের মহাপদ-প্রাপ্তির জন্য আমি লাটের মলাটে নিজের নাম লিখাইতে রাজি হই নাই, আমাকে ঐ পদের সর্বাপেক্ষা উপযুক্ত লোক ভাবিয়া লাট নিযুক্ত করা হইয়াছে বলিয়া আমার এই স্বার্থত্যাগ!' লর্ড রিডিং এইখানেই না থামিয়া ছড়ছড় করিয়া আরো বলিতে থাকেন যে, তিনি যে এত বিস্তৃততর একটা স্থান ও কাজ দেখাইবার সুযোগ পাইলেন ইহার জন্য তিনি গর্বিত। এইবার তিনি দেখাইয়া দিবেন যে, তাঁহার কার্য-ক্ষমতা কত বেশী। এতদিন তাঁহাকে আইন অনুসারে বিচার নিষ্পত্তি করিতে হইয়াছে, কিন্তু এইবারে তিনি বিবেক দিয়া বিচার করিতে পারিবেন। তাই 'এই ভারত-ত্রাতার পদমঞ্জুরী। তিনি 'বহু আশা করিয়া' ভারত-যাত্রা করিতেছেন যে, ভারত পঁছছিয়াই তিনি দেশব্যাপী এমন এক জলবায়ুর সৃষ্টি করিয়া ফেলিবেন, যাহাতে গভর্ণমেন্ট আর ভারতীয় জনসাধারণের মধ্যে পরস্পরে একটা সহানুভূতিপূর্ণ বোঝাপড়া বা লেখাপড়া হইয়া যাইবে। জাতিবর্ণ নির্বিশেষে প্রজাপালন করিবেন বলিয়া তিনি মহৎ আশা করেন! আশ্চর্য কথাই কিনা শুনিলাম! তাঁহার স্বেচ্ছা কতবড় দায়িত্বের জোঁয়াল চড়াইয়া দেওয়া হইয়াছে ভাবিয়া তিনি প্রতিদিন সকাল সন্ধ্যায় কাতর মিনতি জানাইবেন, যেন তিনি তাঁহার ঐ গদানের জোঁয়ালোপযুক্ত হন!

মিঃ মন্টেগু তখন উঠিয়া নিজামের, তাঁহার প্রধান মন্ত্রী সার আলি ইমাম সাহেবের ও তাঁহার বেগম সাহেবার স্বাস্থ্য কামনা করিয়া.....নিজাম যে গত যুদ্ধের সময় লোক-লশ্কার গোলা-গুলি দিয়া ইংরাজের ইজ্জৎ রক্ষা করেন, তজ্জন্য খুব গরমাগরম কৃতজ্ঞতা প্রকাশ করেন। যদিও ভারতের অবস্থা এখন জট-পাকানো জটীর মতই জটিলতাপূর্ণ, তবুও তাঁহার আশা আছে, এসব জট খুলিয়া যাইবে, এবং ইংরাজ ও ভারতীয়দের মধ্যে একটা নূতন যুগের নব প্রেরণার আজানু-লব্ধিত বাহর আবির্ভাব হইয়া

পরস্পর পরস্পরকে নিবিড় প্রেমে জড়াজড়ি করিয়া কসিয়া বাঁধিবে !

ইহার উপরে আর আমাদের কথা নাই ! এ যেন একেবারে ‘দুধকে দুধ, জলকে জল !’

সবাই তো নিজের নিজের মনের মতন কথাগুলি দিবিয় আওড়াইয়া গেলেন, কিন্তু যাহাদের জন্ম এত নাড়ীর টান ইহাদের, তাহাদের কেমন লাগিল বা লাগিবে সেটা কি ভাবিয়া দেখিয়াছেন ? রাজতন্ত্র, স্বৈচ্ছাতন্ত্র বা আমলাতন্ত্রের মজাই হইতেছে এই যে, কর্তারা কেবল নিজের দিকটাই দেখেন । নিজেদের সুখ সুবিধাটাই তাঁহাদের লক্ষ্য—বাকী সব চুলোয় যাক, তাঁহাদের সেদিকে দ্রক্ষেপও নাই !

সার আলি ইমাম এখন লাট হইবার আশায় কতরকম টলানই ঢলাইবেন এবং কর্তাদের মনস্তত্ত্বের জন্ম কত রকমেই না পুছ নাড়িয়া নিজের কৃতজ্ঞতা ও প্রভুভক্তি জানাইবেন, কিন্তু সে আশা কি সফল হইবে শেষ পর্যন্ত ? ভারতের বিনা-জবাবদিহির লাটমসনদে কস্মা লইয়াও তিনি যাঁহার নিঃস্বার্থ ত্যাগ দেখিয়া বিনাইয়া বিনাইয়া গুণ ব্যাখ্যা করিলেন বা খোত্বা পড়িলেন, তিনিই কিনা তাঁহার মুখের উপর এমন অপমানটা করিয়া বসিলেন, ‘না ভাই, না, এতে আমার স্বার্থত্যাগের কোন সুগন্ধই নাই—আমি বুদ্ধদেব নই ; ত্রিশ কোটি মানুষ-মেঘের রাখাল, পঞ্চাশটি হাজার করে’ টাকা হাসহারা (যা দিয়ে ইংলণ্ডে দু-পাঁচটা লয়েড জর্জ কিন্তে পাওয়া যায়), ‘এ কি ভাই সবই ফাঁকি, সে লভ্য কি গেছ ভুলে ?’ লর্ড রিডিং সাংঘাতিক লোক, তাই খাঁটী সত্যিকথা (তা যত বড়ই অপ্রিয় হউক না) একেবারে মুখের উপর চাঁচাছোলা ভাষায় বলিয়া দিয়াছেন ! এঁদের কাছে বাবা ঢাক-ঢাক গুড়-গুড় নাই, সোজা কথা । সোজাসুজি বলিয়া দেওয়া,—বাস ! ইহাতে তুমি রাগ তো, ঘরে বেশী করিয়া ভাত খাইবে ! এ তো আর এদেশী রাজা মহারাজা নন যে, ছোটো চাটুবােক্যের আঁচ দিয়াই তাঁহাদিগকে ননীর মতন গলাইয়া ফেলিবে !

সার আলি ইমামকে শুধু জিজ্ঞাসা করি, আমাদের গায়ের
দাগগুলো কি এমন করিয়া মাখন ডালিলেই এত শীঘ্র মিলাইয়া
যাইবে ?—

‘সেথা যে বহে নদী নিরবধি সে ভোলেনি,
তারই যে স্রোতে ঝাঁকা বাঁকা বাঁকা চোখা বাণী,
এখনো গুঁতোর রেখা আছে লেখা পিঠের কূলে !—
আজই কি সবি ফাঁকি, সে কথা কি গেছ ভুলে ?

ভাব ও কাজ

ভাবে আর কাজে সম্বন্ধটা খুব নিকট বোধ হইলেও আদতে এ জিনিস দুইটায় কিন্তু আসমান জমিন তফাৎ ।

ভাব জিনিসটা হইতেছে পুষ্পবিহীন সৌরভের মত, একটা অবাস্তব উচ্ছ্বাস মাত্র । তাই বলিয়া কাজ মানে যে সৌরভবিহীন পুষ্প, ইহা যেন কেহ মনে করিয়া না বসেন । কাজ জিনিসটাই ভাবকে রূপ দেয়, ইহা সম্পূর্ণভাবে বস্তুজগতের ।

তাই বলিয়া ভাবকে যে আমরা মন্দ বলিতেছি বা নিন্দা করিতেছি, তাহা নহে ; ভাব জিনিসটা খুবই ভাল । মানুষকে কজ্জায় আনিবার জ্ঞাত্ত তাহার' সর্বাপেক্ষা কোমল জায়গায় ছৌওয়া দিয়া তাহাকে মাতাইয়া না তুলিতে পারিলে তাহার দ্বারা কোন কাজ করানো যায় না, বিশেষ আমাদের এই ভাব-পাগলা দেশে । কিন্তু শুধু ভাব লইয়াই থাকিব, লোককে শুধু কথায় মাতাইয়া মশগুল করিয়াই রাখিব, এও একটা মস্ত বদ-খেয়াল । এই 'ভাব'কে কার্যের দাসরূপে নিয়োগ করিতে না পারিলে ভাবের কোন সার্থকতাই থাকে না । তাহা ছাড়া ভাব দিয়া লোককে মাতাইয়া তুলিয়া যদি সেই সময় গরমাগরম কার্যসিদ্ধি করাইয়া লওয়া না হয়, তাহা হইলে পরে সে ভাবাবেশ কর্পূরের মত উড়িয়া যায় । অবশ্য, এখানে কার্যসিদ্ধি মানে স্বার্থসিদ্ধি নয় । যিনি ভাবের বাঁশী বাজাইয়া জন-সাধারণকে নাচাইবেন, তাঁহাকে নিঃস্বার্থ ত্যাগী ঋষি হইতে হইবে । তিনি লোকদিগের স্মৃষ্টি অনুভূতি বা ভাবকে জাগাইয়া তুলিবেন মানুষের কল্যাণের জ্ঞাত্ত, নিজের স্বার্থসিদ্ধির জ্ঞাত্ত নয় । তাঁহাকে একটা খুব মহত্তর উদ্দেশ্য ও কল্যাণ কামনা লইয়া ভাবের বন্তা বহাইতে হইবে, নতুবা বানভাসির পর পলিপড়ার মত সাধারণের সমস্ত উৎসাহ ও প্রাণ একেবারে কাদাঢাকা পড়িয়া যাইবে । এই জ্ঞাত্ত কেহ কেহ বলেন যে, লোকের কোমল অনু-

ভূতিতে ঘা দেওয়া পাপ। কেননা অনেক সময় অনুপযুক্ততা প্রযুক্ত ইহা হইতে সুফল না ফলিয়া কুফলই ফলে। আগে হইতে সমস্ত কার্যের বন্দোবস্ত করিয়া বা কার্যক্ষেত্র তৈয়ার রাখিয়া তবে লোকদিগকে সোনার কাঠির ছোঁওয়া দিয়া জাগাইয়া তুলিতে হইবে। নতুবা তাহারা যখন জাগিয়া দেখিবে যে, তাহারা অনর্থক জাগিয়াছে, কোন কার্য করিবার নাই, তখন মহা বিরক্ত হইয়া আবার ঘুমাইয়া পড়িবে এবং তখন আর জাগাইলেও জাগিবে না। কেন না, তখন যে তাহারা জাগিয়া ঘুমাইবে এবং জাগিয়া ঘুমাইলে তাহাকে কেহই তুলিতে পারে না। তাহা অপেক্ষা বরং কুস্তকর্ণের নিদ্রা ভালো, সে ঘুম ঢোল কঁাসি বাজাইয়া ভাঙানো বিচিত্র নয়।

এ কথাটা যে একটা মস্ত সত্যি, তাহা এতদিনে আমরা ঠেকিয়া শিখিয়াছি। এই যে সেদিন একটা হুজুগে মাতিয়া হুড়হুড় করিয়া হাজার কতক স্কুল-কলেজের ছাত্রদল বাহির হইয়া আসিল, কই তাহারা তো তাহাদের এই সং সঙ্কল্প, এই মহৎ ত্যাগকে স্থায়ীরূপে বরণ করিয়া লইতে পারিল না। কেন এমন হইল? একটা সাময়িক উত্তেজনার মুখে এই ত্যাগের অভিনয় করিতে গিয়া ‘স্পিরিটকে’ কি বিলী ভাবেই না মুখ ভ্যাঙানো হইল! যাহারা শুধু ভাবের চোটে না বুঝিয়া না শুঝিয়া শুধু একটু নামের জঘ বা বদ্‌নামের ভয়ে এমন করিয়া তাহাদের ‘স্পিরিট’ বা আত্মার শক্তির পবিত্রতা নষ্ট করিল, তাহারা কি দরকার পড়িলে আবার কাল এমনি করিয়া বাহির হইয়া আসিতে পারিবে? আজ যাহারা মুখে চাদর জড়াইয়া কল্যকার ত্যক্ত বিশ্ববিদ্যালয়ে আবার মুখটি চূর্ণ করিয়া চুকিল, কাল দেশের সত্যিকার ডাক আসিলে তাহারা কি আর তাহাতে সাড়া দিতে পারিবে? ইঠকারিতা করিয়া একবার যে ভোগটা ভুগিল বা ভ্রম করিল, তাহারই অনুশোচনাটা তাহারা কিছুতেই মন হইতে মুছিয়া ফেলিতে পারিবে না—বাহিরে যতই কেন লি-পরওয়া ভাব দেখাক না। এখন সত্যিকার ডাক শুনিয়া প্রাণ চাহিলেও সে লজ্জায় তাহাতে আসিয়া যোগদান

করিতে পারিবে না। এইরূপে আমরা আমাদের দেশের প্রাণশক্তি এই তরুণদের ‘স্পিরিটটাকে’ কুব্যবহারে আনিয়া মজলের নামে দেশের মহাশক্ততা সাধনই করিতেছি না কি? রাগিবার কথা নয়, এখন ইহা রীতিমত বিবেচনা সাপেক্ষ। আমাদের এই আশা ভরসা-স্থল যুবকগণ এত দুর্বল হইল কিরূপে বা এমন কাপুরুষের মত ব্যবহারই বা করিল কেন? সে কি আমাদেরই দোষে নয়? সাপে লইয়া খেলা করিতে গেলে তাকে দস্তুরমত সাপুড়ে হওয়া চাই, শুধু একটু বাঁশী বাজাইতে পারিলেই চলিবে না। আজ যদি সত্যিকার কর্মী থাকিত দেশে, তাহা হইলে এমন সুবর্ণ সুযোগ মাঝ মাঠে মারা যাইত না। ত্যাগী অনেক আছেন দেশে, কিন্তু কর্মীর অভাবে বা তথা-কথিত কর্মী নামে অভিহিত লোকদের সত্য সাধনার অভাবে তাঁহারা কোন ভাল কাজে আর কোন অর্থ দিতে চাহেন না, বা অন্য কোনরূপ ত্যাগ স্বীকার করিতেও রাজী নন। কি করিয়া হইবেন? তাঁহারা তাঁহাদের চোখের সামনে দেখিতেছেন যে, কত লোকের কত মাথার ঘাম পায়ে ফেলার খন দেশের নামে, কল্যাণের নামে আদায় করিয়া বাজে লোকে নিজেদের উদর পূর্ণ করিতেছে। যাঁহারা সত্যিকার দেশকর্মী—সে বেচারী সত্যি কথা স্পষ্টভাবে বলিতে গিয়া এই সব কর্মীদের কারচুপিতে পুয়ালচাপা পড়িয়া গিয়াছে। বেচারারা এখন ভাল বলিতে গেলেও এই সব মুখোস পরা ত্যাগী মহাপুরুষগণ হট্টগোল বাধাইয়া লোককে সম্পূর্ণ উল্টা বুঝাইয়া দিয়া তাকে একদম খেলো বুটা ইত্যাদি প্রমাণ করিয়া দেন। সহজ জনসাধারণের সরল মন এ সব না ধরিতে পারার দরুণ তাহাদের মন অতি অল্পেই ঐ সত্যিকার কর্মীদের বিরুদ্ধে বিঘাইয়া উঠে। দশচক্রে ভগবান ভূত কথাটা মস্ত সত্যি কথা।

তাহা হইলে এখন উপায় কি? এক সহজ উপায় এই যে, এখন হইতে জনসাধারণের বা শিক্ষিত কেন্দ্রের উচিত, ভাবের আবেগে অতি মাত্রায় বিহ্বল হইয়া কাণ্ডাকাণ্ড ভালমন্দ জ্ঞান হারাইয়া না ফেলা। ভাব জিনিসটা মদের নেশার চেয়েও গাঢ়। পাঁড় মাতালরা

বলে, ‘মদ খাও, কিন্তু তোমায় যেন মদে না খায়।’ আমরাও বলিব, ভাবের সুরা পান কর ভাই, কিন্তু জ্ঞান হারাইও না। তাহা হইলে তোমার পতন, তোমার দেশের পতন, তোমার ধর্মের পতন, মনুষ্যত্বের পতন! ভাবের দাস হইও না, ভাবকে তোমার দাস করিয়া লও। কর্মে শক্তি আনিবার জন্য ভাব-সাধনা কর। ‘স্পিরিট’ বা আত্মার শক্তিকে জাগাইয়া তোল, কিন্তু তাই বলিয়া কর্মকে হারাইও না। অন্ধের মত কিছু না বুঝিয়া না শুনিয়া ভেড়ার মত পেছন ধরিয়া চলিও না। নিজের বুদ্ধি, নিজের কর্ম-শক্তিকে জাগাইয়া তোল। তোমার এই ব্যক্তি-স্বাতন্ত্র্যই দেশকে উন্নতির দিকে, মুক্তির দিকে আগাইয়া লইয়া যাইবে। এ সব জিনিস ভাব-আবিষ্ট হইয়া চক্ষু বুঝিয়া হয় না। কোমর বাঁধিয়া কার্ঘ্যে নামিয়া পড়িতে হইবে এবং নামিবার পূর্বে ভাল করিয়া বুঝিয়া সুঝিয়া দেখিয়া লইতে হইবে ইহার ফল কি। শুধু হোড়ের মত বা উদ্‌মো ঘাঁড়ের মত দেওয়ালের সঙ্গে গা ঘেঁসাইয়া নিজের চামড়া তুলিয়া ফেলা হয় মাত্র। দেওয়াল প্রভু কিন্তু দিব্যি দাঁড়াইয়া থাকেন। তোমার বন্ধন ওই সামনের দেওয়ালকে ভাঙিতে হইলে একেবারে তাহার ভিত্তি মূলে শাবল মারিতে হইবে।

আবার বলিতেছি, আর ভাবের ঘরে চুরি করিও না। আগে ভাল করিয়া চোখ মেলিয়া দেখ। কার্ঘ্যের সম্ভাবনা অসম্ভাবনার কথা অগ্রে বিবেচনা করিয়া পরে কার্ঘ্যে নামিলে তোমার উৎসাহ অনর্থক নষ্ট হইবে না। মনে রাখিও, তোমার ‘স্পিরিট’ বা আত্মার শক্তিকে অস্ত্রের প্ররোচনায় নষ্ট করিতে তোমার কোন অধিকার নাই। তাহা পাপ—মহাপাপ!

সত্য-শিক্ষা

তোরণে তোরণে ভৈরব-বিষাণ বাজিয়া উঠিয়াছে—‘জাগো পুরবাসি!’
দিকে মঙ্গল-শঙ্খ তাহারাই প্রতিধ্বনি উঠিয়া আমাদের রক্তে
রক্তে ছায়ানটের নৃত্যরাগ তুলিয়াছে। এই যে আমাদের
জীবনের উন্মাদ নট-নৃত্য, এ শুধু বিশ্বের কল্যাণ-মুক্তিতে নয়,
এই মুক্তি-যুগে আমরাও আমাদের ভাবী সিংহ-দ্বারের পূর্বতোরণে
নহবতের বাঁশী শুনিয়াছি বলিয়া। তাই আর আমরা শুধু দার্শনিকের
ভিতরের-যুক্তিতে সন্তুষ্ট নই, এখন চাই বাইরের ব্যবহারিক জীবনে
মুক্তি। এই ‘আজাদী’র সাড়া না পাইলে আমাদের জীবনে আজ
এমন তরুণের উচ্ছৃঙ্খলতা, সবুজের স্বেচ্ছাচারিতা দেখা দিত না।
রক্তনিশান লইয়া আজ আমাদের নূতন করিয়া যাত্রা শুরু; এই
শোভা-যাত্রার দুর্মদ অগ্র-যাত্রী আমাদের যে কিশোর আর তরুণের
দল, সর্বাত্মে তাহাদিগেরই অন্তরে বাহিরে ‘আজাদী’র নেশা জমাইয়া
তুলিতে হইবে। কারণ, ইহাদেরই নৃত্য-বিদ্রোহে অলস ভীকু
জীবন-পথ-যাত্রীর বুকে সাহস সঞ্চার হইবে। আমরা কিন্তু
আমাদের এই উন্মুক্ত উদার প্রাণগুলির চারিপাশে নিত্য বন্ধনবাধা
সৃজন করিয়া তাহাদিগের উচ্ছল গতিকে অচল করিতেছি। তাই
বিজাতীর বিভিন্ন শৃঙ্খল কাটিয়া জাতীয় বিদ্যালয়ের প্রতিষ্ঠার
কথা শুনিয়া আমরা আজ এত আনন্দধ্বনি করিতেছি। যাহাতে
এই জাগরণ-যুগের স্মৃতিচিহ্নস্বরূপ এই জাতীয় বিদ্যালয়ের প্রতিষ্ঠা
বাহিরে না হইয়া, অন্তরে হয়, সেই জন্যই আমরা এ সম্বন্ধে
কিঞ্চিৎ আলোচনা করিতেছি। আজ ইংরাজের সহযোগিতা বর্জন
করিতেছি বলিয়াই যে রাগের মাথায় যেন-তেন-প্রকারেণ ছুই
একটা ঠাটকবাজি-গোছ জাতীয় স্কুল-কলেজ দাঁড় করাইয়া সরিয়া
পড়িতে হইবে, তাহা নয়; অ-সহযোগিতার মৌশুম না আসিলেও
জাতীয়তার দিক দিয়া আমাদের জাতীয় বিদ্যালয়ের প্রতিষ্ঠা অনেক
আগেই হওয়া উচিত ছিল। বিজাতীয় অমুকরণে আমরা ক্রমেই

আমাদের জাতীয় বিশেষত্ব হারাইয়া ফেলিতেছি। অধিকাংশ স্থলেই আমাদের এই অন্ধ অনুকরণ হাস্যাস্পদ ‘হনুকরণে’ পরিণত হইয়া পড়িয়াছে। পরের সমস্ত ভালো-মন্দকে ভালো বলিয়া মানিয়া আত্মা, নিজের শক্তি ও জাতীয় সত্যকে নেহায়েৎ খর্বই করা হয়। নিজের শক্তি, স্বজাতির বিশেষত্ব হারানো মনুষ্যত্বের মস্ত অবমাননা। স্বদেশের মাঝেই বিশ্বকে পাইতে হইবে, সীমার মাঝেই অসীমের সুর বাজাইতে হইবে। তাই, এই সহযোগিতা বর্জনের দিনে ‘খোশখবর কা বুটা তি আচ্ছা’ স্বরূপ আমাদের দীর্ঘ পরিপোষিত আশার কার্ঘ্যে পরিণত হইবার কথা শুনিয়া গভীর তৃপ্তি অনুভব করিতেছি।

জাতীয় বিশেষত্বের উপর ভিত্তি করিয়া আমাদের ভাবী দেশসেবকের চরিত্র ও জীবন গঠিত হইবে, বিদেশের বিজাতির বিষাক্ত বাষ্প লাগিয়া তাহাদের মঞ্জরিত জীবন-পুষ্প শুকাইয়া যাইবে না, বলপ্রয়োগে তাহাদিগকে মিথ্যা স্বজাতি-স্বদেশে-অনাস্থা শিখাইয়া আত্মশক্তিতে অবিশ্বাসী অলস একেজো করিয়া তোলা হইবে না,—ইহা কি কম সুখের কথা! তাহারা শিখিবে দেশের কাহিনী, জাতির বীরত্ব, ভ্রাতার পৌরুষ, স্বধর্মের সত্য—দেশের ভাইয়ের কাছ হইতে—তাহারা শিখিবে বীরের আত্মোৎসর্গ, কর্মীর ত্যাগ ও কর্ম, নির্ভীকের সাহস, দেশের উদাহরণে উদ্বুদ্ধ হইয়া,—ইহা কি কম আনন্দের কথা! তাই আবার বলিতেছি, শুধু হুজুগে মাতিলে চলিবে না, গলাবাজির চোটে ষ্টেজ ফাটাইয়া তুলিলে হইবে না,—আমরা দেখিতে চাই কোন্ নেতার চেষ্টায় দেশ-সেবকের ত্যাগে কতটি জাতীয় বিদ্যালয়ের প্রতিষ্ঠা হইল। আমরা দেখিতে চাই, আমাদের কতগুলি তরুণের বুকে এই মহাশিকার প্রাণ প্রতিষ্ঠা হইল! আমরা দেশ-সেবক চিনিব ত্যাগে, বক্তৃতায় নয়। আমরা দেখিতে চাই কবির ভবিষ্যদ্বাণী—‘আসিবে সে দিন আসিবে’ গান দিকে দিকে বৈতালিক-কণ্ঠে বিধোষিত হইতেছে,—‘দিন আগত ঐ’।

জাতীয়-শিক্ষা

কথায় বলে, ‘টকের ভয়ে পালিয়ে গিয়ে তেঁতুলতলে বাসা।’ আজকাল ‘জাতীয়-শিক্ষা’, ‘জাতীয়-শিক্ষা’ বলিয়া যে একটা বিপুল সাড়া পড়িয়া গিয়াছে দেশে, ইহার প্রতিও উক্ত ব্যঙ্গোক্তি দিবি খাটে! সরকারী বিদ্যালয়ে বিদ্যা লয় হয় বলিয়াই যদি আমরা তাহাকে তালাক দিই, তাহা হইলে আমরা আমাদের শিক্ষার পরিপুষ্টির জন্য বা মনের মত শিক্ষা দিবার জন্য যে বিদ্যাপীঠ খাড়া করিয়াছি বা করিব, তাহা কিছুতেই ঐ সরকারী বিদ্যালয়েরই নামান্তর বা রূপান্তর হইবে না। তাহা হইলে টকের ভয়ে আমরা বৃথাই বাঁধা বাসা ফেলিয়া পলাইয়া আসিলাম, কেননা আবার আমাদের আর এক রকম ‘টকবৃক্ষ’-এরই ছায়াতলে আশ্রয় লইতে হইল।

শুনিয়াছি, ‘বন্দেমাতরমের’ যুগে যখন স্বদেশী জিনিসের সওদা লইয়া দেশময় একটা হৈ হৈ ব্যাপার, রৈ রৈ কাণ্ড পড়িয়া গিয়াছিল, তখন অনেক দোকানদার বা ব্যবসায়ীগণ বিলাতী জিনিসের ট্রেডমার্ক বা চিহ্ন দিবি চাঁচিয়া-ছুলিয়া উঠাইয়া দিয়া তাহাতে একটা স্বদেশী মার্ক মারিয়া লোকের নিকট বিক্রয় করিতেন। এখন যে পদ্ধতিতে জাতীয়-শিক্ষা আমাদের ভবিষ্যৎ আশা-ভরসাস্থল নব-উদ্ভাবিত জাতীয় বিদ্যালয়ে দেওয়া হইতেছে, তাহাও ঠিক ঐ রকম বিলিভী শিক্ষারই ট্রেডমার্ক উঠাইয়া ‘স্বদেশী’ মার্ক লাগাইয়া দেওয়ার মত। শিক্ষায় যা একটু মৌলিকতা দেখা যাইতেছে, তাহা কিন্তু বিশেষ দ্রষ্টব্য নয়। ওরকম এক-আধটু নূতনত্ব যে-কেহ একটা নূতন

জিনিসে লাগাইতে পারে। যদি আমাদের এই জাতীয় বিদ্যালয় ঐ সরকারী বিদ্যালয়গুলিরই দ্বিতীয় সংস্করণ রূপে আত্মপ্রকাশ করে, তাহা হইলে আমরা কিছুতেই উহাকে আমাদের জাতীয় বিদ্যালয় বলিয়া স্বীকার করিতে পারি না, বা গৌরবও অনুভব করিতে পারি না। যাহা আমাদের সম্পূর্ণ নিজস্ব নয়, যাহা অন্যের ভুল দাগে দাগাবুলানো মাত্র, তাহাকে কি বলিয়া কোন লজ্জায় 'হামারা' বলিয়া বুক ঠুকিয়া তাহাদেরই সামনে দাঁড়াইব—যাহাদিগকে মুখ ভ্যামচাইয়া বাহির হইয়া আসিয়া আবার তাহাদেরই হৃদয় 'হৃদয়করণ' করিতেছি! জাতীয় বিদ্যালয়ের শিক্ষা-পদ্ধতি ও শিক্ষাদাতা কর্তাদের সম্বন্ধে আমরা আজ পর্যন্ত যাহা জানিতে পারিয়াছি, তাহা খারাপ বলিতে আমাদেরই বক্ষে বাজিতেছে; কিন্তু সত্যকে অস্বীকার করিয়া ভণ্ডামী দিয়া কখনও মঙ্গল উৎসবের কল্যাণ-প্রদীপ জ্বলিবে না। শুধু চরকা দিয়া সূতা কাটানো ছাড়া এ চাশাচাল বিদ্যালয়ে তেমন কিছু নূতন পদ্ধতি অবলম্বন করা হয় নাই, যাহা সম্পূর্ণরূপে আমাদের দেশের ছেলেদের মনের বা এ দেশের আবহাওয়ার উপযোগী। এ সবই ইংরেজী কায়দাকানুনকে যেন মাথায় পগ্গ ও পায়ে নাগরা জুতা পরাইয়া এদেশী করা; অথবা সাহেবকে ধুতি ও মেমকে শাড়ি পরাইয়া বাবু ও বিবি সাজানো গোছ। এর পূর্বে স্বদেশী যুগে যখন আর একবার এই রকম জাতীয় বিদ্যালয়ের প্রতিষ্ঠা হইয়াছিল, তখনো এই ব্যাপার ঘটয়া সব কিছু পণ্ড হইয়া গিয়াছিল।

এ সব দোষ ত আছেই, তাহা ছাড়া একটা এমন ব্যাপার এখানে অনুষ্ঠিত হইতেছে যাহা কিছুতেই মার্জনা করা যায় না। যাহারা জাতীয় বিদ্যালয়ের প্রফেসর বা অধ্যাপক নিযুক্ত হইতেছেন, তাহারা সকলেই কি নিজ নিজ পদের উপযুক্ত? কত উপযুক্ত লোককে ঠেকাইয়া শুধু ছোটো বড়তা ঝাড়ার দরুণ ইহারা অনেকেই নিজের রুটীর যোগাড় করিয়া লইয়াছে ও লইতেছেন। আজ আমরা তাহাদের নাম প্রকাশ করিলাম না। যদি এখনো এই রকম ব্যাপার চলিতে থাকে, তবে বাধ্য হইয়া আরো অপ্রিয় সত্যকথা আমাদের

বলিতে হইবে। পবিত্রতার নামে, মঙ্গলের নামে এমন জুয়াচুরিকে
প্রশ্রয় দিলে আমাদের ভবিষ্যৎ একদম ফসাঁ! দেশবন্ধু চিত্তরঞ্জন বা
দেশের লোক কতকগুলো ভুতের বাথান ও আখড়া পাঁকাইবার জ্ঞান
বুকের রক্তসম টাকার আড়ি ছড় ছড় করিয়া ঢালিয়া দেন নাই।
তঁাহারা টাকা ঢালিয়া দিয়াছেন ইংরাজী মেম-ভারতীর জুতো-পরা
পায়ে নয়, বাগদেবী ভারতী-বীণাপানির কমল পায়ে। এর চেয়ে
উপযুক্ত লোক পাওয়া যাইতেছে না বলিয়া 'খোঁড়া ওজর' দেখাইলে
চলিবে না, তঁাহারা ইহার জ্ঞান চেষ্টা করিয়াছেন কি ?

জাতীয় বিশ্ববিদ্যালয়

জাতীয় (ন্যাশনাল) বিদ্যালয় লইয়া একটু খোঁচা দিয়াছি, তাহা অন্য কোন ভাব-প্রণোদিত হইয়া নয়। জাতীয় জিনিস লইয়া জাতির প্রত্যেকেরই ভাল মন্দ বিচার করিয়া দেখিবার অধিকার আছে। তাহা ছাড়া, ‘মুনিবাক্ষ মতিভ্রমঃ’, ভুল সকলেরই হয়; নিজের ভুল নিজে দেখিতে পায় না। অতএব আমাদেরই জাতীয় বিদ্যালয়ের যে ভুল আমাদের চোখে পড়িবে, তাহা আমাদের শুধরাইয়া লইতে হইবে। প্রথম কোন বড় কাজ করিতে গেলে অনেক রকম ভ্রম প্রমাদ হওয়া স্বাভাবিক, জানি, এবং তাহাকে ক্ষমা করিতেও পারা যায়—যদি জানি যে তাঁহারা জানিয়া ভুল করিতেছেন না। কিন্তু যদি দেখি যে, এই সব হোমযজ্ঞের হোতারা জানিয়া শুনিয়া ভুল করিতেছেন বা জাতীয়-শিক্ষা-রূপ পবিত্র জিনিসের নামেও নিজ নিজ স্বার্থ সিদ্ধির পথ খুঁজিতেছেন, তাহা হইলে হাজার অশ্রিয় হইলেও আমাদের কাছে তাহা লইয়া আলোচনা করিতে হইবে। পবিত্র কোন জিনিসে কীট প্রবেশ করিতে দেখিয়া চুপ করিয়া থাকাও অপরাধ। এই জাতীয় বিদ্যালয়ে কাঁচা কাঁচা অধ্যাপক নিয়োগ লইয়া যে ব্যাপার চলিতেছে তাহা হাজার চেষ্টা করিলেও চাপা দেওয়া যাইবে না; ‘মাছ দিয়া শাক ঢাকা যায় না’। কাঁচা অধ্যাপক মানে বয়সে কাঁচা নয়, বিদ্যায় কাঁচা। আমাদের আর সবই ভালো, কেবল যে-বন্দোবস্তই হইতেছে ‘গুণরাশিনাশী’। গোদের উপর বিষ ফোঁড়ার মত তত্বপরি আবার আমাদের এক-গুঁয়েমিও আছে। দোষ করিতেছি জানিয়া শুনিয়াও তাহা শুধরাইব না। যাঁহারা দেশের মঙ্গলের জন্য সকল স্বার্থ বলিদান দিয়া গোলাম-খানা হইতে বাহির হইয়া আসিয়াছেন মনে করিয়াছিলাম, আজ যদি কর্মগতিকে দেখিতে পাই বা বুঝিতে পারি যে, তাঁহারা অন্য এক স্বার্থের লোভে বা বেশী লাভের সম্ভাবনায়

ও-রকম লোক দেখানো ত্যাগ দেখাইয়াছেন, তাহা হইলে বড় কষ্ট বোধ হয়। এখন কিন্তু অনেকেরই কার্য দেখিয়া সেই রকম বোধ হইতেছে। যে সব অধ্যাপক গোলামখানা ছাড়িয়া আমাদের বাহবা লইয়াছেন, তাঁহাদিগকেই যে জাতীয় বিদ্যালয়ের অধ্যাপক করিতে হইবে এমন কোন কথা নাই। কেননা তাঁহারা কখনো এই ত্যাগের বদলে আর একটা বড় রকম লাভের আশায় এ ত্যাগ দেখান নাই। যদি তাহাই হয়, তাহা হইলে আরো অনেকে লাফাইয়া উঠিয়া এই রকম মিথ্যা ভণ্ডামীর ত্যাগ দেখাইতে ছুটিতে পারে। কেননা, ইহাতে তাঁহাদের ক্ষতি ত হইলই না, উণ্টো দেশময় একটা বাহবা পড়িয়া গেল যে, অমুক লোকটা একেবারে ত্যাগের চূড়ান্ত করিয়াছে—একেবারে বুদ্ধদেব ! কিন্তু এ মিথ্যাকে আর যেই প্রত্নয় দেন, আমরা প্রত্নয় দিতে পারি না। মঙ্গল উৎসবে মিথ্যার অমঙ্গল কিছুতেই প্রবেশ করিতে দিব না। আমরা অন্তর হইতে বলিতেছি, সত্যকে এড়াইয়া চলিও না, ইচ্ছা করিয়া বা স্বার্থান্ধ হইয়া এমন মহৎ অনাবিল অনবণ্ড জিনিসকে পঙ্কিল-কলঙ্কিত করিও না,—যদি বুঝি তুমি বুঝিবার দোষে তাহা করিতেছ ; ভণ্ডামী করিতেছ না, তবে তোমায় প্রাণ হইতে দেশবাসী ক্ষমা করিবে, স্নেহের দাবী লইয়া তোমার ভুল শুধরাইয়া দিবে, এবং তোমার গায়ে কাঁটাটিও ফুটিতে দিবে না। যে সত্যিকার ত্যাগী তাঁহার পায়ে কাঁটা ফুটিলে আমরা দাঁত দিয়া তুলিয়া দিতে রাজী আছি। দোষ রাজতন্ত্রের নয়, দোষ আমাদেরই। আমরাই নিত্য নিতুই মঙ্গলের নামে দেশের নামে নিজের স্বার্থ বাগাইয়া তো লইতেছি। এই ভণ্ডামী আর মোনাফেকাই তো সর্বনাশের মূল। প্রথমে আমাদেরই মাহুষ হইতে হইবে স্বার্থের মায়া ত্যাগ করিয়া সত্যকে বড় করিয়া দেখিতে শিখিতে হইবে, তাহার পর যেন বড় কাজে হাত দিই। সেবার জাতীয় বিদ্যালয় অঙ্কুরেই বিনষ্টপ্রায় হইয়াছিল, এবারও যদি ঐ রকম হয়, তাহা হইলে লজ্জায় আর মুখ দেখাইবার জো থাকিবে না। যাঁহারা সত্যিকার কর্মী তাঁহারাও কি অসত্যের জঞ্জাল হইতে মাথা ঝাড়া দিয়া

উঠিবেন না ? মিথ্যাকে সহ্য করার মত কাপুরুষতা আর পাপ নাই। মহান কোন কাজে অতি প্রিয়জনের দোষ থাকিলেও তাহা লুকাইলে চলিবে না লোক-লজ্জা বা মুখচোরা জিনিষটাই আমাদেরকে এমন দুর্বল করিয়া ফেলিয়াছে। বন্ধুর মর্যাদার চেয়ে সত্যের মর্যাদা অনেক উপরে।

তাহা ছাড়া, জাতীয় বিশ্ববিদ্যালয়ের কারিকুলাম কি ? ষ্টাণ্ডার্ডেরই বা কোন একটা নিয়ম কানুন বা প্রোগ্রাম আদি আছে কি ? হইবে কখন ? সকলেই তো দেখি, বসিয়া বসিয়া মাছি মারিতেছেন। অথচ কাঁছনি গাহিতেছেন, ‘ছেলে জুটিতেছে না, আবার গোলামখানায় গিয়া ঢুকিতেছে’, ইত্যাদি ! কিন্তু এই সব কাণ্ড দেখিয়া কয়জন বদ-সাহসী ছেলে ইহাতে আসিতে পারে ? ভাল করিয়া কোমর বাঁধিয়া লাগিয়া যাও তো, দেখিবে তোমায় তখন ডাকিতে হইবে না—আপনিই তোমার অঙ্গন-ভরা লক্ষ তরুণ কণ্ঠে ‘হাজির’ ‘হাজির’ রব উথিত হইবে। তোমার মস্ত্রে যদি ভূত না ছাড়ে, তবে সে তোমার দোষ বা ক্ষমতার অভাব, তাহা মস্ত্রের দোষ নয়। নাচতে না জানলে উঠান বাঁকা বলিয়া আক্ষেপ করা—ধৃষ্টতা আর বোকামি মাত্র।

আমরা চাই, আমাদের শিক্ষা-পদ্ধতি এমন হউক, যাহা আমাদের জীবন-শক্তিকে ক্রমেই সজাগ, জীবন্ত করিয়া তুলিবে। যে শিক্ষা ছেলেদের দেহ মন দুইকেই পুষ্ট করে, তাহাই হইবে আমাদের শিক্ষা। ‘মেদা-মারা’ ছেলের চেয়ে সে হিসাবে ‘ডাং-পিটে’ ছেলে বরং অনেক ভালো। কারণ পূর্বোক্ত নিরীহ জীবরূপী ছেলেদের ‘জান’ থাকে না ; আর যাহার জান নাই, সে মোর্দা দিয়া কোন কাজই হয় নাই, আর হইবেও না। এই দুই শক্তিকে—প্রাণ-শক্তি আর কর্ম-শক্তিকে একত্রীভূত করাই যেন আমাদের শিক্ষার বা জাতীয় বিশ্ববিদ্যালয়ের উদ্দেশ্য ও লক্ষ্য হয়, ইহাই আমাদের একান্ত প্রার্থনা। শতুরে যেন ইহাকে গোলাম-খানাবই তেলাম-খানা না বলিতে পারে।

জাগরণী

বকুল ! জা—গো ! জাগো বকুল, এই পল্লীমাঠের পথের পাশে
মেঠো-গানের সহজ সুরে জাগো । জাগো তারই রেশের ছোঁয়ায় ।
জাগো বেদন নিয়ে, পল্লী-শিশুর মুক্ত-বিথার প্রাণ নিয়ে, পল্লী-তরুণের
তাজা খুনের তীব্র কাঁপুনি নিয়ে ! জাগো,—জাগো বকুল,—জাগো !
শরম-রাঙা পাপড়ি ক'টি তোমার খুলে' দাও—ছড়িয়ে দাও
এই নবীন আষাঢ়ের কালো মেঘের জোলা ঝাপ্টায় । সঙ্কুচিতা,
ভীতা, ত্রস্তা বকুল ! ছোট্ট বকুল ! জাগো ! জাগো—পরাগ-মাথা
পবিত্র তোমার ধৌত-করণ চাউনি নিয়ে,—এই বাদর-রাগিনী-আহত
বাদল-প্রাতে । তোমার পরিমলের উদাস সুরভি নিয়ে এসে আমেজ
দাও রাজার যত গুল-ভরা বাগিচায় । অনাদৃতা তুমি, তাই বলে
তোমার ওই এক নিশ্বাসের সুরভিটুকু নিয়ে গর্বিতার মত এসো না ।
এস তুমি আধ-মুকুলিত-যৌবনা নববধূর মত ধীর-মধুর চরণে—
পায়ের মুখর পায়জোর সামলে ! লাজ-জড়িমা-জড়িত তোমার বুক
ভরে থাকে যেন পুত শালীনতার সংযম আর প্রশান্ত-প্রীতির স্নিগ্ধ
শান্তি ! জাগো বকুল, জাগো ! তুমি যেখানে ফোট, সেই পল্লীতেই
আছে আমাদের সত্যিকার বাঙলা,—বাঙালীর আসল প্রাণ ।

আমাদের এই শাস্ত-বাঙালীর সুষুপ্ত, ঘুমে-ভরা অলসপ্রাণ
জাগিয়ে তোল তোমার জাগরণের সোনার কাঠি দিয়ে ! তাদের
ফুলের প্রাণে দাগ বসিয়ে দিয়ো তোমার মদিরবাসের উন্মাদনার ছুরি
হেনে ! জাগো বকুল, জাগো ! ওই রাজবাগানের ফুল-বালাদের
সালাম কর, আর তোমার অশ্রু-ভরা অভিনন্দন জানাও । ছোট্ট
তুমি, এই পল্লী-বাটের পায়ে-চলার-পথ থেকে তাদিগে তোমার বুক-
ভরা ভক্তি-ভালোবাসা নিবেদন কর । তোমার ঐ পরাগালস্ত
নিবেদিত অর্ঘ্য নিয়ে সে গুলবাহার-পরা সুন্দরীদের বল,—‘ওগো,
আমি ছোট্ট বকুল—নেহাৎ ছোট্ট । আমি জেগেছি ! তাও সে অনেক

দূরে পল্লীর অচিন্-পথে! তোমরা আমায় ঘৃণা করো না আমি
 আনবো শুধু আমার পল্লীছল্লীদের বুকের বেদন, তাদের খাপছাড়া
 আকুল আবদার, আর যুগ-যুগ-ধরে—পিষ্ট ক্রিষ্ট প্রাণের ব্যথা-
 বিজড়িত সহজ চিন্তার স্মৃতি। এ বাছাদেরও ঘৃণা করো না, অবহেলা
 এদের প্রাণে বডেডা বাজবে! শিশু এরা—কুঁড়ি এরা, এখনও
 ফোটেনি। এরা তোমাদের দেশের হাওয়ায় উড়িয়ে দেওয়া রেণুকা।

‘দিয়ে গা দিয়ে, তোমাদের ঐ রাণীর স্নেহের শুধু একটি রেণু
 উড়িয়ে দিয়ে দখিণ বায়ে এদের পানে! আহা, অনাদৃত বিড়ম্বিত
 হতভাগা এরা, ঘৃণা করো না এদের!...জাগো বকুল, জাগো!
 ঝড়ো হাওয়ায় আর জ্বলো মেঘে তোমায় ডাক দিয়েছে। জাগো—
 জাগো, পল্লীবুকের বেদন নিয়ে, পল্লী-শিশুর ঝর্ণা হাসি নিয়ে, আ-
 তরুণদের সবুজ বুকের অরুণ খুনের উষ্ণগতি নিয়ে! জাগো, বকুল
 জাগো!! জাগো যৌবনের জয়টীকা নিয়ে!!!